

Riusu cocareba SAN LUCAS Toyani jo'case'e

Prólogo

¹ Yë'ë bainguë Teófilo: Cristobi mai naconi yo'oguë ba'ise'ere quëato, ai bain hua'nabi ja'an cocare toyani jo'cahuë. ² Yequécua, baguë yo'oguë ba'ise'e beoru ëñasi'cuabi quëani achojënnna, ai bain hua'nabi toyani maina jo'cahuë. ³ Ja'nca jo'crajënnna, yë'ë'ga bacua quëani toyase'e si'ayereba te'e ruiñe ëñani ro'taguë ye'yehuë. Ye'yeni, ja'nrebi, baguë yo'oguë ba'ise'ere re'oye toyani jo'caza caguë, ñen cocare te'e ruiñe toyani, më'ëna saohuë, ejaguë. ⁴ Bain ye'yose'ere te'e ruiñe masijë'ën, caguë, ñen cocare re'oye re'huani, më'ëna saohuë yë'ë.

Un ángel anuncia el nacimiento de Juan el Bautista

⁵ Herodes yua Judea yija ejaguë ba'isirëñ ba'iguëna, pairi bainguë Zacarías hue'eguë bají'i. Abías jubë bainguë ba'iguëna, baguë rënjo Isabel hue'egobi yua pairi jubë bain romigo baco'ë. Bago ira bainguë ba'isi'quë Aarón hue'eguë ba'nquëña. ⁶ Ai re'o bain baë'ë, ba samucua. Riusubi ejaguëna, gare te'e ruiñereba yo'ojën baë'ë. Riusu guanseni jo'case'e beoru achani, si'aye te'e ruiñe yo'ojën baë'ë. Ja'nca sëani, yequécuaabi bacuare gu'aye cañu ro'tacuata'an, poremaë'ë. ⁷ Ja'nca ba'icuabi,

bago gare zin beogo baco'ë. Zin garasi'co baco'ë. Si'a jubë yua ai ahuero hua'na baë'ë.

8 Ja'nrëbi, Zacarías yua Riusu huë'e ba'i ma'caréanre ëñaguë ba'iguë, baguë yo'o yo'obi, baguë yo'o yo'o umuguse cuencuese'e sëani. **9** Ja'an umuguse cuencuesi'quë sëani, Riusu huë'ena cacani, baguë ira pairi bain ba'isi'cua yo'ojën ba'ise'e'ru güina'ru ma'ñare misabëna ëoni, Riusuna mëobi. **10** Ja'nca cacani ëoguëna, bain jubëbi hue'sere ujajën nëcahuë, ma'ña ëorën ba'iguëna. **11** Ujajën nëcajënnä, ja'nrëbi, Zacarías yua ma'ñare ëoni mëoguëna, Riusu anje hua'guëbi yua misabë jëja ca'ncona gaje meji'i. **12** Gaje mequëna, baguë yua ai quëqué huesësi'quëbi caye beoye ëñabi. **13** Ja'nca ëñaguëna, anje hua'guëbi cabi:

—Zacarías, quëquëma'ijë'ën. Më'ëbi Riusuni senni achaguëna, Riusubi achani conji. Ja'nca conguëna, më'ë rënjo Isabelbi yua më'ë zinre të'ya raija'go'co. Të'ya raigona, baguë mami Juan hue'yojë'ën. **14** Aireba bojoguë ba'ija'guë'ë më'ë, zinre baguë sëani. Yequëcua'ga ai jai jubë bainbi më'ë naconi te'e bojobjen ba'ija'cua'ë. **15** Riusubi ëñaguëna, ai re'o ejaguë ba'ija'guë'bi. Jo'cha gare uncuye beoye ba'ija'guë'bi. Baguë të'ya rai umugusebi Riusu Espíritu naconi te'e zi'insi'quë bojorecoyo baguë ba'ija'guë'bi. **16** Ja'nca ba'iguëbi Israel bain gu'a ma'a ganicuani cu'eni rani, ba Ejaguë Riusuni recoyo se'e zi'in güeseja'guë'bi. **17** Riusu bainguë raosi'quë ba'ija'guë'bi. Riusu ira raosi'quë Elías hue'eguë, baguë jëja recoyo baguë, yua Riusu Espíritu naconi te'e zi'insi'quë

ba'iguë ba'nji. Ja'nca ba'iguëna, më'ë zin yua güina'ru ba'ija'guë'bi. Yequëcuabi bacua zincua naconi je'o bajënnä, yequëcuabi bacua pë'caguë sanhuë naconi je'o bajënnä, baguëbi yua sa'ñeña je'o beoye ba'i güeseja'guë'bi bacuare. Achaye yëma'icuani Jaë'ë sehuo güeseja'guë'bi. Sa'ñeña bojojen ba'i güeseja'guë'bi. Ba'i güeseguëna, se'e te'e ruiñe ro'tajën ba'ija'cua'ë. Bainbi bacua Ëjaguë Riusuni te'e ruiñe ro'taja'bë caguë, bacua recoyo ro'tayete mame re'huaja'guë'bi baguë, cani jo'cabi Riusu anje hua'guë.

18 Caguëna, Zacarías yua baguëni senni achabi:

—Më'ëbi coca quëaguëna, ¿queaca masiye'ne yë'ë? Yë'ë, yë'ë rënjo, yëquënabi ai ahuero hua'na ba'ijënnä, huesë éaji, cabi.

19 Caguëna, anje sehuobi:

—Yë'ë yua Gabriel hue'eguë, yua Riusu raosi'quë'ë. Baguëbi guanseguëna, më'ëna gaje meni, baguë bojo güese cocare quëahuë yë'ë.
20 Quëaguëna, më'ëbi te'e ruiñe ro'tama'iguë achamaë'ë. Ja'nca achama'isi'quë sëani, yua yi'o ma'tëbë ba'ija'guë'ë më'ë. Më'ë zin të'ya raima'i ñësebë, coca caye gare porema'iñë më'ë, yë'ë case'e'ru ba'ija'ye tëca, anjebi sehuobi.

21 Ja'nreëbi, bain jubë yua hue'se ca'ncore nëcajën, Zacaríasni éjojen, ¿Guere yo'oguë baguë, sa'nuahuë zoe ba'iguë'ne? cahuë. **22** Cajënnä, ja'nreëbi baguëbi yua etani, bacuani coca caye porema'i hua'guë baji'i. Ja'nca ba'iguëna, baguë guënamë toya éñase're masihuë. Baguë éntë sarañabi bacuani ro ña'queye se'ga quëabi.

23 Ja'nrëbi, baguë cuencuesi umuguseña si'aguëna, Riusu huë'e yo'o ma'carëanre yo'oni tëjini, baguë huë'ena goji'i. **24** Go'iguëna, ja'nrëbi yo'je, baguë rënjo Isabelbi yua zin nëcago, te'e ëntë sara ñañaguë hua'ire huë'ena bëago, huë'ere etaye beoye baco'ë. **25** Ja'nca ba'igobi ja'ansi'co ro'tago: Yë'ë Ëjaguë Riusubi yë'ëre ai re'oye conguëna, bainbi se'e yë'ë zin të'ya raima'iñete gu'aye caye beoye ba'ija'cua'ë, ro'tago bojogo.

Un ángel anuncia el nacimiento de Jesús

26 Ja'nrëbi, te'e ëntë sara te'e ñañaguë hua'i zinbë ba'igona, Riusubi baguë guënamë re'oto yo'o conguë, Gabrielni guansení, Galilea yija huë'e jobo, Nazaret huë'e jobo, ja'an jobona baguëte saobi. **27** Ja'anru ba'i romi zingo María hue'egoni coca quëaguë saobi Riusu. Bago yua José hue'eguë, ira ëjaguë ba'isi'quë David bainguë, ja'anguëni huejajaza cago ro'tago ba'igona, **28** Riusu anje hua'guëbi bagona ti'anni, bagoni saludaguë cabi:

—Bojogo ba'ijë'ën. Riusubi më'ë naconi ba'iguëna, baguë quë'rë ta'yejeiye consi'co'ë më'ë. Më'ëni ai re'oye ëñaguë sëani, si'a romicua'ru më'ëni quë'rë ai conji Riusu, cabi.

29 Caguëna, Maríabi ai quëquëni huesësi'cobi caye beoye ëñago. **30** Ja'nca ëñagona, anjebi bagoni cabi:

—Quëquëma'ijë'ën, María. Riusubi më'ëni re'oye ëñaguë, më'ëni ai re'oye conja'guë'bi. **31** Më'ëbi yua zin nëcago, ëmëguëni të'ya raija'go'ë. Të'ya rani, baguë mami Jesusre hue'yojë'ën. **32** Ai ta'yejeiye ëjaguë ba'ija'guë'bi. Mai ta'yejeiyereba Riusu Zin casi'quë ba'ija'guë'bi. Riusubi baguë bain ta'yejeiye ëjaguëre baguëre re'huaye ro'taji, baguë

ira ëjaguë ba'isi'quë David ba'ise'e'ru. ³³ Israel bain ëjaguë si'arën ba'ija'guë'bi. Gare carajeiye beoye guansegüe ba'ija'guë'bi, anjebi quëabi.

³⁴ Quëaguëna, Maríabi cago:

—Ënjëre beogo sëani, ¿queaca zin ba'ija'go'ne? cago, senni achago.

³⁵ Senni achagona, anjebi quëabi:

—Riusu Espíritubi më'ëna ti'anni, mai ta'yejeiyereba Ëjaguë Riusubi më'ëni guënamë pico naconi gaje meni, më'ëni na'oni baguëna, Riusu Zinre të'ya raija'go'ë më'ë. Të'ya raigona, Riusu Zin casi'quëbi Riusu cuencuesi'quë ba'ija'guë'bi.

³⁶ Më'ë baingo Isabelre'ga ro'tajë'ën. Të'ya raima'igo garasi'co case'eta'an, bago yua te'e ëntë sara te'e ñañaguë hua'i zinbë ba'igo. Ai ahuera hua'go ba'igota'an, ja'nca të'ya raija'gota'an ba'igo.

³⁷ Bain yo'oye porema'icuata'an, Riusubi si'aye yo'oye poreji, anjebi quëabi.

³⁸ Quëaguëna, Maríabi cago:

—Riusu yo'o con hua'go se'ga ba'i hua'go'ë yë'ë. Më'ë quëase'e'ru ba'iyé yë'ëre yo'oja'guë Riusu, cago sehuogo bago.

Cago sehuogona, anjebi quëani tonni huesëbi.

María visita a Isabel

³⁹ Ja'nrëbi, Maríabi huëni, Yë'ë baingo Isabelni ëñajaza cago, cu re'oto huë'e jobo, Judea yija huë'e jobo, ja'anruna besa saco'ë. ⁴⁰ Sani, Zacarías huë'ena ti'anni, Isabelni saludago. ⁴¹ Saludagona, Isabelbi achagona, Isabel zinbi bago guëtabë sa'nuahuë yua ñu'cuebi. Ñu'cueguëna, Isabel yua Riusu Espíritu naconi te'e zi'inni ba'igobi bojo

recoyo bago runc'oë. **42** Runni, ja'nrebi, re'oye achoye Maríani bojogo ai jéja ujago cago:

—Riusubi si'a romicuare éñaguëta'an, më'ëre quë'rë ta'yejeiye conguë baji. Më'ë zin të'ya raija'guëre'ga ai conji Riusu. **43** Më'ëbi, mai ñaguë pë'cagobi yë'ëni éña raigona, ai bojoyë yë'ë. Riusubi bojo güeseguë, yë'ë hua'go, ro baingo ba'igote ai re'oye éñani, Riusu re'huabi.

44 Më'ëbi yë'ëni saludagona, yë'ë zin sa'nahue ba'iguëbi ja'ansirën ai bojoguë ñu'cuebi. **45** Më'ëbi Riusu coca quëase'ere achani, ja'nca ba'ija'guë ro'tago, ai bojogo ba'iyë më'ë, cago Isabel.

46 Cagona, Maríabi cago:
Yë'ë recoyo ai bojoyereba bojogo ba'iyë yë'ë.

47 Riusu ai ta'yejeiguë'bi ba'iji, cayë yë'ë hua'go, yë'ëre téani baja'guëre sëani.

48 Baguë yo'o con hua'go se'ga ba'igona, yë'ëna re'oye ro'tani, yë'ëre téani baji yë'ë hua'gore.

Ja'nca sëani, si'a bainbi yë'ëre éñani,
Bagoni ai re'oye ai conji Riusu cajën bojoja'cua'ë.

49 Ta'yejeiyereba Riusubi yë'ëre conreba conguëna, ai bojoreba bojoyë yë'ë, Riusu se'ga re'oye ba'iguë sëani.

50 Si'a hua'na baguëna oijën gugurijën ba'itoca, bacuani oiguë, bacuani conji Riusu.

Ja'nca conguë, gare carajeiye beoye baguë bainre oiguë conji.

51 Yequëcua ro bacua se'gare'ru huanoguëna, bacuabi ai huacha ro'tajënnna,

Riusubi yua bacuare te'e jéana etoni senjobi.

52 Yequëcua bain ta'yejeiye ejacua ba'icuareta'an,

Riusubi bacuare etoni saoni, yequëcua ro porema'icua se'gare ñani, bacuani éja bain re'huani baji Riusu.

⁵³ Yequëcua aon caracuare ñani, bacuani ai re'oye conreba conguë insibi.

Yequëcua a'ta bonse bacuareta'an, ro bonse beo hua'nare etoni saobi Riusu.

⁵⁴ Mai ira bain ba'isi'cuani coca cani jo'case'ere ro'tani, güina'ru yo'ojo Riusu.

Baguë bain Israel hue'ecuani gare huanë yeye beoye conji.

⁵⁵ Abrahamre'ga ro'tani, baguëni ai oiguë ai re'oye combi Riusu.

Abraham bain ba'ija'cua, yureña ba'icua, yequëcua yuta ba'ima'icuare'ga, si'acuare ro'tani, gare carajeiye beoye conreba conji Riusu, cago María.

⁵⁶ Ja'nca cani, ja'nrëbi samute ñañaguë hua'i Isabel naconi bëani ba'igo, ja'nrëbi bani tējini, bago huë'ena goco'ë.

Nacimiento de Juan el Bautista

⁵⁷ Ja'nrëbi, Isabel tē'ya rai umuguse ti'anguëna, émëguëni tē'ya raco'ë. ⁵⁸ Tē'ya raigona, bago bain gaje hua'nabi bagona ti'anni ñajën, bago naconi bojoreba bojohuë, Riusu ai re'oye conse'e sëani. ⁵⁹ Ja'nrëbi, zin hua'guëbi te'e éntë sara samute umuguseña baguëna, bainbi baguë go neño ga'nirëte tēyojën rani, Baguë pë'caguë mami Zacarías hue'eja'guë, cahuë. ⁶⁰ Cajënnna, pë'cagobi:

—Banji. Juan hue'eja'guë'bi, cago.

⁶¹ Cagona, bacua cahuë:

—¿Më'ë guere cago'ne? Më'ë bain Juan hue'ecua beoyë, cahuë.

⁶² Ja'nca cani, ja'nrëbi, baguë pë'caguëna bonëni, bacua èntë saraña se'gabi ro ña'queni, mamaquë mami hue'eja'yete senni achahuë. ⁶³ Senni achajënnä, Zacaríasbi uti ja'ore senni, ja'nrëbi, Juan hue'eji, toyani eñobi. Ja'nca toyani eñoguëna, bacuabi ai eñajën rën'ë. ⁶⁴ Èñajën rëinjënnä, ja'ansirënbì, Zacaríasbi, yi'obobi tí'jiguëna, yua Riusuni re'o cocareba bojoguë ca bi'rabi. ⁶⁵ Ca bi'raguëna, baincuabi ai huaji yëjën, ba huë'ebi sani, si'aye quëajënnä, ba yo'ose'e si'a Judea yija cu re'oto ba'iruan'ga quëani achojaise'e bají'i. ⁶⁶ Si'acua ja'an cocare achani ro'tani, sa'ñeña senni achahuë:

—¿Gueguë ba'ija'guëguë'ne ba zin hua'guë? senni achahuë.

Riusubi oiguë, baguëre eñani consi'quëre sëani, si'a bainbi eñani, ja'anre sa'ñeña senni achahuë.

El canto de Zacarías

⁶⁷ Ja'nca ba'iguëna, Juan pë'caguë Zacaríasbi Riusu Espíritu naconi zi'inni, bojo recoyo runji'i. Runni, Riusu coca yihuoni raose'ere quëani acho bi'rabi:

⁶⁸ Israel bain, mai Ta'yejeiye Èjaguë Riusu, baguë ba'iyete ro'tajën bojojëñ gantañuni.

Baguë bain jucha zemosi'cuani conguë raisi'quë'bi ba'iji.

Maire huajëreba ba'icuare etojeiguë raisi'quë'bi ba'iji.

⁶⁹ Riusu raoja'guë, baguë bainguë David yo'je ba'ija'guë, maire tëani baja'guë, ja'anguëre

mai ta'yejeiye ëjaguëre re'huani, maina
raobi Riusu.

70 Baguë ira bain raosi'cua naconi quëani jo'case'e
ba'iguëna, güina'ru maina quëani jo'cabi
Riusu:

71 Yequëcuabi maini je'o bajën, maire hueso ëaye
yo'ojënnna, Riusubi maire tëani, maini baye
cabi.

72 Mai ira bain ba'isi'cuani oiguë, bacuani coca
cani jo'case'ere ro'taguë, baguë cani
jo'case'e'ru güina'ru yo'obi Riusu.

73 Riusu coca cani jo'case'e, mai ira bainguë
ba'isi'quë Abrahamni ganreba cani
jo'case'e ën coca bají'i:

74 Yequëcuabi maini je'o bajënnna, maire tëani, maini
baye cabi Riusu.

Maini baguë, baguë yo'o con hua'nare re'huani,
Mésacua gare huaji yëye beoye yë'ëni conjën
ba'ijë'ën, cabi.

75 Si'a mai ba'i umuguseñabi baguë naconi ba'ijën,
baguë ai yëreba yësi'cua ba'ijënnna, te'e ruiñe
yo'ocuare maire re'huani baye cabi Riusu,
cabi Zacarías.

Cani ja'nrebi, baguë zin hua'guëre ëñani, baguëte
cabi:

76 Ja'nca sëani, yë'ë mami, më'ë yua mai
ta'yejeiyereba Riusu cuencueni raosi'quë'ë.

Baguë coca quëaja'guëre më'ëre re'huabi Riusu.

Më'ëbi ru'ru sani, mai Ëjaguë rai ma'are re'huaye
bayë.

77 Baguë bainna sani, bacua gu'a juchare jo'cani
senjojënnna, Riusubi bacuare tëani bani,

bacua gu'a jucha yo'ojën ba'ise'ere gare ro'tama'iñe caja'guë'bi Riusu.

Ja'anre bacuani quëani achoye bayë më'ë.

⁷⁸ Mai Ëjaguë Riusubi maini ai oiguë conji.

Mai hua'nabi ro porema'icuareta'an, maini ai re'oye cuiraguë oiguë conji.

Go'sijei umuguse ñatani saoye'ru maina ti'an rani, bojo recoyo ba hua'nare maire re'huani jo'caji.

⁷⁹ Ja'nca re'huani jo'caguëbi zijkei re'oto ba'icua, gare bënni senjosí'cua ba'ija'cua, ja'ancuani baguë go'sijei re'otore te'e ruiñe masigüeseki Riusu.

Mësacua gare huaji yëye beoye yë'ëni te'e zi'inni conjën ba'ijë'ën caguë, maire choiji Riusu, gantaguë cabi Zacarías.

⁸⁰ Caguëna, ja'nrëbi, baguë zin hua'guëbi irani, jëja baguë, te'e ruiñe ba'i recoyo re'huani bají'i. Irani tëjini, ja'nrëbi, bain beo re'otona sani, bëani bají'i. Israel bainna sani quëa umuguse ti'añe tëca baruna bëani ba'iguë ejobi Juan.

2

Nacimiento de Jesú

¹ Ja'nrëbi, bain ejaguëreba, Augusto hue'eguëbi si'a bainni guanseguë, Si'acua mamire ejá bain uti pëbëna toya güesejë'ën caguë guansení jo'cabi.

² Ja'nca guansení jo'caguë, bain cuencuese'e, ru'ru ba'iyé cuencuese'e bají'i. Ja'nca ba'iguëna, Cirenio hue'eguëbi yua Siria yija bain quë'rë ta'yejeiye ejaguë bají'i, ja'anrën. ³ Bainre cuencueye guanseguë, Si'acuabi mësacua të'ya raisi huë'e

jobona go'ini, mësacua mamire ëja bain uti pëbëna toya güesejë'ën, guansení tonni jo'cabi. ⁴ Ja'nca guansení jo'caguëna, Josebi baguë huë'e jobona sai bi'rabi. Nazaret huë'e jobo, Galilea yija ba'i jobobi sani, Belén huë'e jobo, baguë ira ejaguë ba'isi'quë David hue'eguë, baguë huë'e jobo, Judea yija ba'i jobo, ja'anruna sani, baguë mamire toya güesejaji'i. ⁵ Toya güesejaiguë, Mariare'ga sabi, bago naconi huejaye ro'taguë sëani. Yua ira zinbë ba'igoni sabi. ⁶⁻⁷ Ja'nca sani, Belenna ti'anni, bain cain huë'ena cainru cu'eni jëhuani, cainru beoguëna, jo'ya hua'na be'jerëna sani cacani baë'ë. Ba'ijën, bago të'ya rairën ti'anguëna, bago zin ru'ru ba'iguëte të'ya rani, canbi ganoni, jo'ya hua'na aon aonguna uango.

Los ángeles y los pastores

⁸ Ja'nrébi, ja'ansi ca'nco jo'ya hua'na cuiracua baë'ë. Cuirajën ba'icuabi bacua oveja jo'ya hua'nare ñamibi ëñajën baë'ë. ⁹ Ja'nca ëñajën ba'ijënnna, Riusu guënamë re'oto yo'o con hua'guëbi bacuana gaje meni ti'anbi. Ti'anguëna, ai go'sijeí re'otora ti'anguëna, jo'ya ëñacuabi ai quëquësi'cua ëñajën baë'ë. ¹⁰ Ja'nca ba'ijënnna, yo'o con hua'guëbi bacuani quëabi:

—Quëquëma'ijë'ën mësacua. Bojo güese cocare mësacuani quëaguë raisi'quë'ë yë'ë. Si'a bainbi achani ai bojoreba bojoye'ë. ¹¹ Yure, ira ejaguë David huë'e jobo, Belenre ba'iguë, Riusu raosi'quë të'ya raisi'quë'bi ba'iji. Mësacuana ti'an rani, mësacuare Riusu bainrebare re'huani baza caguë raji'i. Mai ta'yejeiyereba ejaguë ba'ija'guëbi Cristo hue'eji baguë. ¹² Mësacuabi huë'e jobona sani

cu'eto, Riusu Zin raosi'quëre tinjani ëñaja'cua'ë. Canbi ganosi'quëbi jo'ya hua'na aon aongute uinguëna, baguëte ëñani masija'cua'ë, cabi. **13** Caguëna, ja'nrébi, ai jai jubë anje hua'nabi te'e jéana gaje meni ti'anhuë. Ti'anni, si'a jubëbi Riusuni bojoreba bojojën gantahuë:

14 Mai ta'yejeiyereba Riusubi guënamë re'oto
ëjaguëreba'bi ba'iji.

Baguë bain ai yësi'cua, yija re'otore ba'icuani
bojoguë, huaji yëye beoye ba'ija'bë caji,
Riusure yo'o con hua'nabi gantajën
quëahuë.

15 Gantani tonni, yua guënamë re'otona
go'ijënnä, jo'ya hua'na cuiracuabi sa'ñeña ca
bi'rahuë:

—Belenna saiñu. Riusu raosi'quëre yure quëani
achosi'quëni sani ëñajaiñu cahuë.

16 Cani, besa sani ëñato, María, José baë'ë. Zin
hua'guëbi jo'ya hua'na aon aongute uinguëna,
ëñahuë. **17** Ja'nca ëñani, ba zin hua'guë ba'iyé,
anje hua'guë cani jo'case'ere bacuani quëahuë.
18 Ja'nca quëajënnä, si'a hua'nabi ai bojoreba
bojojën achahuë. **19** Ja'nca bojojënnä, Maríabi
ja'an si'aye ro'tani, bago recoyona re'huani,
gare huanë yeye beoye baco'ë. **20** Ja'nrébi, jo'ya
hua'na cuiracuabi yua Riusu quëani achose'e
beoru achani, Riusu yo'oni jo'case'e beoru ëñani,
Riusuni bojoreba bojojën, baguëni gantajën goë'ë.
Riusure yo'o conguë quëase'e'ru güina'ru baj'i,
cajën bojojën goë'ë.

El niño Jesús es presentado en el templo

21 Ja'nrébi, te'e ëntë sara samute umuguseña ba'ini, ba zin hua'guë go neño ga'nirëte tëyo güeseni, baguë mami Jesùs hue'yohuë. María yuta zin nëcama'irëen, Riusure yo'o conguëbi gaje meni quëaguëna, ja'an mamire yure baguëte hue'yohuë.

22 Hue'yoni ja'nrébi pë'caguë sanhuë pa'roma'i umuguseña carajekiye tëca ba'ijën, Moisés coca cani jo'case'e'ru yo'ojën, tënosi hua'na runni tonni, ja'nrébi Zin hua'guëre Riusu huë'ena sani, Riusu conja'guëte re'hua güeseñu cajën, Jerusalén huë'e jobona sani, Riusu huë'ena cacahuë. **23** Moisés coca toyani jo'case'e'ru güina'ru yo'ohuë:
 Si'a zin hua'na ru'ru të'ya raisi'cua banica,
 Riusu conja'cuare re'hua güesejë'ën,
 cani jo'case'e
 sëani, Jesusre sani, Riusu conja'guëte re'hua güesehuë.

24 Ja'nca re'hua güesejëen, Moisés coca toyani jo'case'e'ru yo'ojën, jo'ya ca hua'i hua'nare inni, samu jure hua'na, o samu ju'ncubo hua'na, ja'an hua'nare inni, misabëna éoni Riusuna mëojën, zin hua'guëre Riusu conja'guëte re'hua güesehuë.

25 Ja'nca re'hua güesejëenna, yequë Simeón hue'eguëbi Riusu huë'ena cacani bají'i. Ja'an ba'iguëbi ai re'o bainguë ba'iguë, Riusuni caraye beoye yo'o conguë te'e ruiñe yo'oye se'ga bají'i. Israel bain etojeirënen ai ro'taguë, Riusu etojeiyete caraye beoye éñaguë éjoguë bají'i. Ja'nca ba'iguëna, Riusu Espíritubi baguë recoyona gaje meni bëani, ba'iguë bají'i. **26** Bëani ba'iguëbi Simeonni masi güeseguë bají'i: Më'ë yija yuta ba'iguë, Riusu raoja'guëte éñaja'guë'ë më'ë, masi güesebi Riusu. Ja'nca masi güeseguë sëani, **27** yureca Riusu

Espíritubi saguëna, Simeonbi Riusu huë'ena cacani baj'i'i. Cacani ba'iguëbi, Jesús pë'caguë sanhuëbi Riusu coca cani jo'case'e'ru yo'ojetenna, bacuana ti'anbi. ²⁸ Ti'anni, zin hua'guëre inni cuanni ëñaguë, Riusuni ai bojoreba bojoguë cabi:

²⁹ Ah, Ëjaguë, më'ë coca cani jo'case'e'ru güina'ru yo'osi'quë sëani, yë'ë hua'guë më'ë yo'o con hua'guë se'ga ba'iguëbi më'ëni ai bojoreba bojoyë yë'ë.

Më'ë raosi'quërebabi ti'anguëna, yurera baguëni ai bojoguë ëñañë yë'ë.

Ja'nca ëñaguë, yureca bojo hua'guëbi junni, ën yi-jare gare jo'caye poreyë yë'ë, Ja'quë.

³⁰ Më'ë bainrebare re'huani baja'guëre raoguëna, baguëte yure ëñahuë yë'ë.

³¹ Si'a bainni baguëre ëñani masija'bë caguë raoguëna, yurera ti'an raisi'quë'bi ba'iji baguë.

³² Si'a ën yija bainni go'sije re'otorebare ëñoni masi güeseja'guë'bi ti'anguëna, bojoyë yë'ë.

Judío bain jubë ba'ima'icuare'ga go'sijeyete te'e ruiñe ëñoni, Israel bainre quë'rë ëja bainre re'huani jo'caja'guë'bi ba'iji ënquë, bojoguë cabi Simeón.

³³ Ja'nca caguëna, ba zin hua'guë pë'caguë sanhuë, José, María, bacuabi ai bojo recoyo re'huani baë'ë, bacua zinre case'e sëani. ³⁴ Ba'ijënnna, Simeonbi bacuani ai re'oye caguë, ëñani jo'cani, ja'nrebi Jesús pë'cago Maríani jë'te ba'ija'yete cani achobi:

—Achajë'ën. Riusubi ënquëre cuencueni raoguëna, ai bain Israel ba'icuabi baguë yo'oguë ba'iyete ëñaja'cua'ë. Ëñani, yequëcuabi baguëni

zi'inni re'oye ba'ija'cua'ë. Yequëcuaca baguëni gu'a güejën, gu'aye ba'ija'cua'ë. Baguëte Riusu raosi'quërebare ro jo'cani senjojën, ³⁵ bacua gu'a recoyo ro'tayete te'e ruiñe masi güesejën ba'ija'cua'ë. Baguëte ro jo'cani senjojën gu'aye yo'ojënnna, më'ëbi aireba sa'ntigo, si'a recoyo oireba oigo ba'ija'go'ë, cani jo'cabi Simeón.

³⁶ Cani jo'caguëna, yeco'ga Ana hue'egobi querë baco'ë. Riusu baingobi baguë cocare masini quëago baco'ë. Aser jubë baingo ba'igo, bago taita Fanuel hue'eguëna, ai ahuera hua'go baco'ë. Romi zingo ba'isirën huejani, bago ënjë naconi te'e ëntë sara samu técahuëan ba'igona, junni huesëguëña baguë. ³⁷ Junni huesëguëna, bago hua'jeni ba'irëen yua ochenta y cuatro técahuëan te'e hua'go baco'ë. Ja'nca ba'igobi Riusu huë'e se'gare ba'igo, Riusu yo'o coñe se'ga ba'igo. Aon aiñe jo'cago, Riusuni ujago, jo'caye beoye Riusu yo'o se'gare yo'ogo. ³⁸ Ja'nca ba'igobi ja'ansirën Jesús pë'caguë sanhuëna ti'an rani, Riusu zin hua'guëni ëñani bojogo. Riusuni ai bojoreba bojogo, surupa cago, zin hua'guë ba'ija'yete bago bainni quëani acho bi'rago. Quëani achogona, bacuabi achani, Maire etoja'guëni ëjojën ba'icuareta'an, yua ti'anbi cajën bojojën achahuë.

El regreso a Nazaret

³⁹ Ja'nrëbi, Jesús pë'caguë sanhuëbi Moisés coca toyani jo'case'e'ru yo'oni téjini, bacua huë'e jobo Nazaretna goë'ë, Galilea yija huë'e jobo. ⁴⁰ Go'ini ti'anni ba'ijënnna, zin hua'guëbi irani, ai jëja baní, ai masiye ye'yeguëna, Riusubi baguëni ai re'oye conni cuiraguë bajl'i.

El niño Jesús en el templo

41 Yureca, Jesús pë'caguë sanhuëbi Nazaret huë'e jobore ba'ijën, si'a tëcahuëan Pascua umuguseña ba'iguëna, Riusuni bojojën yo'ojaiñu cajën, Jerusalén huë'e jobona saijën baë'ë. **42** Ja'nca ba'ijënnna, Jesusbi si'a sara samu tëcahuëanre bani, baguë bain yo'ojën ba'iye'ru yo'oguë, Pascua umuguseñabi Riusuni bojoñu cajën saijënnna, baguë yua te'e conguë saji'i. **43** Sani, Pascua umuguseña yo'oni tëjini, baguë bainbi go'ijënnna, Jesusbi Jerusalenna bëabi. Bëaguëna, baguë pë'caguë sanhuëbi huesejën, **44** Mai jubë bain naconi ba'ima'iguë baguë cajën, ma'abi go'ijën na'ijaë'ë. Na'ijani, ja'nrébi bacua bain ba'iruanna baguëre cu'e ganocuata'an, **45** gare baguëre tinjamajën, ja'ansirën Jerusalenna bonëni, baguëni cu'ejën, se'e goë'ë.

46 Go'ini, samute umuguseña baguëte cu'eni, ja'nrébi Riusu uja huë'ena cacani eñato, Riusu coca masiye ye'yocua naconi ñu'iguë baj'i'i baguë. Ja'nca ñu'iguëbi bacuani ai coca senni achaguë baj'i'i. **47** Senni achani bacua cocare'ga masiye se-huoguë ba'iguëna, ba hua'nabi ai achajën rëinjën, sa'ñeña cajën, ¿Queaca masiye sehuoye poreguë'ne baguë? ro'tajën cajën, baguëre eñahuë. **48** Ja'nca cajën eñajënnna, baguë pë'caguë sanhuë'ga ti'anni, ¿gue'ne? sa'ñeña cajën, pë'cagobi Jesusni cago:

—Mami, ¿më'ë guere yo'oguë, bëani ba'iguë'ne? Më'ë taita, yë'ë, yëquënabi më'ëni ai cu'ejën ai sa'ntijën baë'ë, cago.

49 Cagona, Jesús sehuobi:

—¿Mësacua queaca ro'tajën, yë'ëni cu'eye'ne? Yë'ë Ja'quë yo'o ma'carëanre yo'oguë bëaguëna, mësacua ro'tama'iñë? caguë sehuobi.

50 Ja'nca sehuoguëna, baguë coca case'ere ro huesë ëaye achahuë.

51 Ja'nrebi, bacua naconi Nazaret huë'e jobona goji'i Jesús. Go'ini ba'iguë, bacua guanseyete achani jaë'ë caguë yo'oguë bají'i. Yo'oguë ba'iguëna, baguë pë'cagobi ja'an si'aye ro'tani, bago recoyona re'huani, gare huanë yeye beoye baco'ë. **52** Ja'nrebi, Jesusbi irani, ai jëja baguë'ru runni, ai masiye ye'yesi'quë'ru ruinguëna, Riusubi baguëni ëñani bojoguë bají'i. Bain'ga baguëni re'oye ëñajën baë'ë.

3

Juan el Bautista en el desierto

1 Ja'nrebi, bain ta'yejeiye ejaguëreba Tiberio hue'eguëbi bëani, quince tëcahuëna ba'iguëna, ja'an tëcahuë ti'anguëna, Judea bain ejaguë Poncio Pilato bají'i. Herodes'ga Galilea bain ejaguë bají'i. Herodes yo'jeguë Felipe yua Iturea, Traconite, ja'an bain ejaguë bají'i. Lisanias yua Abilinia bain ejaguë bají'i. **2** Ja'an tëcahuë, judío bain pairi ta'yejeiye ejacua, Anás, Caifás, ja'ancua baë'ë. Ja'nca ba'ijënnna, ja'an tëcahuë, Zacarías mamaquë Juanbi bain beo re'otore ba'iguëna, Riusubi baguëna ti'anni, Ën cocare bainni quëani achojë'ën, caguë guansebi. **3** Caguë guanseguëna, Juanbi si'a Jordán ziaya ba'i re'otobi ganini, Riusu cocare quëani achoguë bají'i:

—Mësacua gu'aye yo'ojën ba'ise'e beoru jo'cani senjoni, bautiza güesejë'ën. Ja'nca yo'otoca, Riusubi mësacua gu'a jucha yo'ojën ba'ise'ere huanë yени, gare mësacua recoyore mame re'huani tënoni baja'guë'bi quëani achoguë baj'i Juan.

⁴ Yua Juanre cuencueni raose'ere ro'tato, Riusubi baguëte ai zoe cuencuebi. Riusu ira bainguë ba'isi'quë Isaíasbi ñaca toyani jo'cabi: Riusu bainguëbi beo re'otona ti'anni, Riusu cocare si'a jëja cani achoja'guë'bi:
Mësacua recoyore mame re'huani ba'ijë'ën.
Mai ëjaguë rai ma'are re'huaye'ru re'huani, te'e ruin ma'are yo'ocaijë'ën baguëre.

⁵ Si'a yorobëan ba'itoca, yua beoru ya'obi pë'npëye ba'iji.
Cubëan ba'itoca, yua beoru quëroni ñañoni tonni, senjoñe ba'iji.
To'nqueboan ba'i ma'a ba'itoca, yua te'e ruin ma'a ba'kiye re'huaye ba'iji.
Gu'a ma'a ba'itoca, te'e ruiñe gani güeseye ba'iji.

⁶ Ja'nca re'huani ba'iguëna, Riusubi baguë bainre tëani, baguë ba'i jobona sani baguëna, si'a bainbi ëñaja'cua'ë, toyani jo'caguë ba'nji Isaías.

⁷ Ja'nca ba'iguëna, ai bainbi Juanna ti'anni, Bautiza güesejañu cajënnna, Juanbi bacuani si'a jëja yihuoguë cabi:

—Mësacua yua aña hua'na'ru gu'aye ro'tajën raë'ë. Riusu bënni senjosi'cua yuara ba'ija'cua sëani, ¿mësacua queaca jéaye ro'taye'ne? ⁸ Mësacua gu'aye yo'ojën ba'ise'ere gare jo'cani senjoni, mësacua mame recoyo re'huani ba'ijë'ën. Te'e

ruiñe ro'tajën ba'ijë'ën. Mësacua sa'ñeña coca cajën ba'ije'ru gare se'e cama'ijë'ën: "Yëquëna yua Abraham re'o bain yo'je ba'icuare sëani, Riusubi bënni senjoma'iji" ro huacha ro'tayë mësacua. Mësacuani ganreba cayë. Riusubi Abraham re'o bainre re'huaye yëtoca, ënjo'on ba'i gatabëanre inni, baguë re'o bainre guaja beoye re'huaye poreji. ⁹ Gu'a sunqui cueye'ru yo'oji Riusu. Zu'ubo re'oye guë'tosibobi inni, si'a sunquire ëñani, gu'a sunqui ba'itoca, aon quëinma'iñë ba'itoca, yua si'a sunqui sitare cueni, sunquire taonni, toana senjoni ëoji. Ja'nca yo'oye'ru yo'oye ro'taji Riusu, yihuoguë cabi Juan.

¹⁰ Caguëna, bainbi baguëni senni achahuë:

—Ja'nca yo'oye ro'tatoca, yëquëna ¿queaca yo'ojacua'ne? senni achahuë.

¹¹ Senni achajënnna, bacuani sehuobi Juan:

—Mësacua bainni oijën conjë'ën. Samu ëntë sara cañare banica, te'e canre ëntë sara can beo hua'guëna ro insijë'ën. Mësacua aonre bajën, aon beocuana huo'hueni ro insijë'ën, sehuobi.

¹² Ja'nrëbi, impuesto curi cocuabi Bautiza güeseñu cajën, Juanna ti'anni, baguëni senni achahuë:

—Yequëna'ga ¿queaca yo'ojacua'ne, Ëjaguë? senni achahuë.

¹³ Senni achajënnna, bacuani yihuoguë cabi:

—Ëja bain guansení jo'casi cocare ëñani, ja'an coca caye se'gare'ru yo'ojën, impuesto curire coni bajë'ën. Coqueye beoye yo'ojën, quë'rë ta'yejeiye coni bama'ijë'ën, cabi.

¹⁴ Caguëna, ja'nrëbi soldado hua'nabi Juanna ti'anni, baguëni senni achahuë:

—Yequëna'ga ¿queaca yo'oja'cua'ne? senni achahuë.

Senni achajënna, Juan sehuobi:

—Bain bonsere coqueye beoye tētema'ijé'ën. Mësacua jubë yequëcuabi gu'aye cajën, Bain bonsere tēteni baza cajën, bainre ro huai éaye yo'ojën tēteyë. Yequëcuabi bainre preso zean éaye yo'ojën tēteyë. Ja'an yo'oye'ru yo'omajën ba'ijé'ën. Mësacua éja bain curi ro'ise'ere coni, ja'an se'gare bani, bojojën ba'ijé'ën, caguë sehuobi Juan.

¹⁵ Ja'nca sehuoguëna, bainbi achani, baguëte re'oye ñajëen, ¿Riusu raosi'quërebama'iguë baguë? sa'ñeña senni achajën baë'ë. ¹⁶ Ja'nca senni achajën ba'ijënnna, Juanbi si'acuani quëareba quëabi:

—Bañë. Ocona bautizaye se'ga ba'iguë'ë yë'ë. Yequëca yë'ë ba'iye'ru quë'rë ta'yejeiye ejaguërebabi yuara ti'anja'ñeta'an ba'iji. Baguëbi bainre bautizato, Riusu Espíritu naconi, toa naconi, ja'anre gaje me güesenri, bainre bautizaja'guë'bi. Ai ta'yejeiye ejaguërebare sëani, baguëni yo'o coñe gare ti'anma'iguë'ë yë'ë. Baguë guéon ju'i co'rore ti'jeye'ga gare ti'anma'iguë'ë yë'ë. ¹⁷ Bain recoyo ro'tayete masiza caguë, baguë ñacobi ñani, bain re'oye ro'taye, bain gu'aye ro'taye, ja'anre te'e ruiñe masija'guë'bi baguë. Trigo aonra'carëanre tutuna huéaye'ru yo'oguë raiji. Baguë huëa macabi inni aonra'carëanre tutuna huëani, hui'ya sëohuëan senjoguëna, trigo aonra'carëan se'gare baguë aon re'huaruna ayani bajì. Ja'nca bani, ja'nrëbi hui'ya sëohuëanre chiani, toana senjoni éoji. Ja'an toare cato, gare yayaye beoye ba'iji. Baguë bainrebare re'huani baja'yete

quëayë. Yequëcua, baguëte güeni senjocuare toana senjoni ñoja'guë'bi, bainni quëabi Juan.

¹⁸ Ja'nca quëaguë, si'a bainni ai yihuoguë, Riusu bojo güese cocarebare quë're ai ba'iyé quëani achoguë baji'i. ¹⁹ Ja'nca quëani achoguë, bain ñjaguë Herodesni ai bëinguë cabi: Më'ë yo'jeguë Felipe rënjure ro tëani baguë sëani, ai gu'aye yo'ohuë më'ë, bëinguë cabi. Herodías hue'egote ro tëani baguëre sëani, ai bëinguë cani, yequë baguë gu'aye yo'ose'ere'ga baguëni ro'ta güeseni, Herodesni bëin coca cani jo'cabi Juan. ²⁰ Cani jo'caguëna, Herodes yua achaye güeguë, quë're se'e ai gu'aye yo'oguë, Juanni preso zeanni, baguëte ya'o huë'ena guao güeseni babi.

Jesús es bautizado

²¹ Juanre zeanni guao güesesirën yuta ti'anma'iguëna, Juan yua bainre bautizaguë ba'iguëna, Jesusbi ti'an raji'i. Ti'an rani, Juanbi baguëte bautizaguëna, Jesusbi Ja'quë Riusu naconi coca ca bi'rabi. Ca bi'rani mëiñe ññato, guënamë re'otobi ja'anse'e a'nqueni saoguëna, ²² Riusu Espíritubi eta rani, ju'ncubo ba'iyé'ru ññoni, Jesusna gaje meni tuabi. Tuaguëna, guënamë re'otobi coca cani achobi:

—Më'ë yua yë'ë Zin ai yësi'quë'bi ba'iyë. Më'ëni ai bojoguë ññañë yë'ë, guënamë re'otobi cani achobi.

Los antepasados de Jesucristo

²³ Jesucristo ñen yija ba'iguë ba'iyete cato, baguë bainre con bi'raguë, yua treinta tëcahuëan baye'ru babi. Bainbi ro'tani cato, baguë pë'caguë yua José baquéña. José pë'caguë yua Elí baquéña. ²⁴ Elí pë'caguë yua Matat baquéña. Matat pë'caguë

yua Leví baquëña. Leví pë'caguë yua Melqui baquëña. Melqui pë'caguë yua Jana baquëña. Jana pë'caguë yua José baquëña. ²⁵ José pë'caguë yua Matatías baquëña. Matatías pë'caguë yua Amós baquëña. Amós pë'caguë yua Nahum baquëña. Nahum pë'caguë yua Elsi baquëña. Elsi pë'caguë yua Nagai baquëña. ²⁶ Nagai pë'caguë yua Maat baquëña. Maat pë'caguë yua Matatías baquëña. Matatías pë'caguë yua Semei baquëña. Semei pë'caguë yua Josec baquëña. Josec pë'caguë yua Judá baquëña. ²⁷ Judá pë'caguë yua Joanán baquëña. Joanán pë'caguë yua Resa baquëña. Resa pë'caguë yua Zorobabel baquëña. Zorobabel pë'caguë yua Salatiel baquëña. Salatiel pë'caguë yua Neri baquëña. ²⁸ Neri pë'caguë yua Melqui baquëña. Melqui pë'caguë yua Adí baquëña. Adí pë'caguë yua Cosam baquëña. Cosam pë'caguë yua Elmadam baquëña. Elmadam pë'caguë yua Er baguëña. ²⁹ Er pë'caguë yua Jesús baquëña. Jesús pë'caguë yua Eliezer baquëña. Eliezer pë'caguë yua Jorim baquëña. Jorim pë'caguë yua Matat baquëña. ³⁰ Matat pë'caguë yua Leví baquëña. Leví pë'caguë yua Simeón baquëña. Simeón pë'caguë yua Judá baquëña. Judá pë'caguë yua José baquëña. José pë'caguë yua Jonam baquëña. Jonam pë'caguë yua Eliaquim baquëña. ³¹ Eliaquim pë'caguë yua Melea baquëña. Melea pë'caguë yua Mena baquëña. Mena pë'caguë yua Matata baquëña. Matata pë'caguë yua Natán baquëña. ³² Natán pë'caguë yua David baquëña. David pë'caguë yua Isaí baquëña. Isaí pë'caguë yua Obed baquëña. Obed pë'caguë yua Booz baquëña.

Booz pë'caguë yua Sala baquéña. Sala pë'caguë yua Naasón baquéña. ³³ Naasón pë'caguë yua Am-inadab baquéña. Aminadab pë'caguë yua Admin baquéña. Admin pë'caguë yua Arni baquéña. Arni pë'caguë yua Esrom baquéña. Esrom pë'caguë yua Fares baquéña. Fares pë'caguë yua Judá baquéña. ³⁴ Judá pë'caguë yua Jacob baquéña. Jacob pë'caguë yua Isaac baquéña. Isaac pë'caguë yua Abraham baquéña. Abraham pë'caguë yua Taré baquéña. Taré pë'caguë yua Nacor baquéña. ³⁵ Nacor pë'caguë yua Serug baquéña. Serug pë'caguë yua Ragau baquéña. Ragau pë'caguë yua Peleg baquéña. Peleg pë'caguë yua Heber baquéña. Heber pë'caguë yua Sala baquéña. ³⁶ Sala pë'caguë yua Cainán baquéña. Cainán pë'caguë yua Arfaxad baquéña. Arfaxad pë'caguë yua Sem baquéña. Sem pë'caguë yua Noé baquéña. Noé pë'caguë yua Lamec baquéña. ³⁷ Lamec pë'caguë yua Matusalén baquéña. Matusalén pë'caguë yua Enoc baquéña. Enoc pë'caguë yua Jared baquéña. Jared pë'caguë yua Mahalaleel baquéña. Mahalaleel pë'caguë yua Cainán baquéña. ³⁸ Cainán pë'caguë yua Enós baquéña. Enós pë'caguë yua Set baquéña. Set pë'caguë yua Adán baquéña. Adán pë'caguë yua Riusu baquéña.

4

Jesús es puesto a prueba

¹ Yureca, Jesusbi Riusu Espírituna te'e zi'inni, recoyo bojoreba bojoguë, Jordán ziaya re'otore jo'cani saiguëna, Riusu Espíritubi baguëte beo re'otona sabi. ² Saguëna, cuarenta umuguseña

ba'iguëna, zupai huatibi ti'an rani, Jesusni gu'aye yo'o güeseza caguë, baguëni coqueguë ca bi'rabi. Ca bi'raguëna, Jesusbi gare aon ainmaquë ba'iguëna, cuarenta umuguseña ba'iguëna, ai aon gu'abi baguëre. ³ Aon gu'aguëna, zupai huatibi Jesusni gu'aye ro'ta güeseza caguë, ti'anni, cabi:

—Më'ëbi Riusu Zin sëani, ën gatabëte inni, jo'jo aonbëte re'huani ainjë'ën, cabi.

⁴ Caguëna, Jesús sehuobi:

—Bañë. Riusu coca toyani jo'case'ere ññato, ñaca caji: “Bain hua'nabi aon aiñe se'ga yo'ojën ba'itoca, re'oye ba'ima'iñë. Riusu cocareba cani jo'case'ere te'e ruiñe ye'yejën ba'itoca, ai re'oyereba ba'ijëñ ba'ijsa'cua'ë.” Ja'an coca toyani jo'case'e sëani, më'ë case'ere yo'oma'iguë'ë yë'ë, sehuobi.

⁵ Sehuoguëna, ja'nrëbi zupai huatibi baguëte ëmë cubë na'miñona më'ani nëconi, si'a ën yija re'otoñare te'e jëana ññobi. ⁶ Ëñoni, baguëni cabi:

—Ja'an si'ayete më'ëna insini, si'a ën yija re'otoña ëjaguëre më'ëre re'huayë yë'ë. Yë'ëna insini jo'case'e sëani, yë'ë yëse'e'ru më'ëna insini jo'caye poreyë yë'ë. ⁷ Ja'nca sëani, më'ëbi yë'ëna gugurini rëanni, ujatoca, si'a ññia re'otoña beoru më'ë se'gana ro insini jo'cayë yë'ë, cabi.

⁸ Caguëna, Jesús sehuobi:

—Bañë. Yë'ëre gare jo'cani saiјë'ën, Zupai. Riusu coca toyani jo'case'ere ññato, ñaca caji: “Mai Ëjaguë Riusu se'gana gugurini rëanni, baguë se'gana ujajëñ ba'ijë'ën” caji. Ja'nca toyani jo'case'e sëani, më'ë caye'ru yo'oma'iguë'ë yë'ë, sehuobi.

9 Sehuoguëna, zupaibi baguëte se'e sani, Jerusalén huë'e jobona ti'anni, Riusu huë'e mi'chiyona nécóni, baguëni cabi:

—Më'ëbi Riusu Zin sëani, yijana chajë'en.

10 Riusu coca cani jo'case'ere ññato, ñaca caji:

Riusubi guanseguëna, baguë guënamë re'oto yo'o con hua'nabi më'ëre ññajën cuirayë.

11 Gatana ju'njema'ija'guë cajën, më'ëre ññajën cuirajën, më'ëre tëani bayë, toyani jo'case'e ba'iji, cabi.

12 Caguëna, Jesús sehuobi:

—Bañë. Riusu coca yequë ca'nco'ga ñaca caji: “Riusuni gu'aye yo'o güeseza cama'ijë'en” toyani jo'case'e sëani, më'ë case'ere yo'oma'iguë'ë yë'ë, sehuobi Jesús.

13 Sehuoguëna, zupai huatibi baguëni se'e yo'o güeseye ro'taye porema'iguë sëani, baguëte jo'cani sani, se'e zoe raimaji'i.

Jesús comienza su trabajo en Galilea

14 Ja'nrëbi, Riusu Espíritu naconi te'e zi'inni ba'iguëbi ai ta'yejeiye yo'oguë, Galilea yijana go'iguëna, si'a bain ja'anruan ba'icuabi baguë ba'iyete ai cani achojën baë'ë. **15** Si'a huë'e joboñana sani ti'anni, bacua ñë'ca huë'eñana cacani, bainni coca yihuoguëna, si'acuabi bojöjen, baguë ta'yejeiye ba'iyete ai re'oye cani achojën baë'ë.

Jesús en Nazaret

16 Ja'nca ba'ijënnna, ja'nrëbi, Nazaret huë'e jobo, baguë zinrëñ ba'isi jobona sani, yo'o yo'oma'i umuguse ba'iguëna, baguë bain yo'ojën ba'ise'e'ru yo'oguë, bain ñë'ca huë'ena cacani baj'i. Ja'nca

ba'iguëbi bain jobona nécani, ¹⁷ Riusu coca toyani jo'case'ere cani achoza caguë, Isaías toyani jo'casi pëbëte insijénna, baguëbi inni anconi ëñato, ën coca toyasiru baj'i:

¹⁸ Riusu cuencueni raosi'quëre sëani, baguë Espírituni yë'ëna gaje meni ba güeseguëna, yë'ë yo'ore yo'oje'ën, caguë guansebi yë'ëre. Yë'ë bojo güese cocare bonse beo hua'nani quëani achojë'ën.

Recoyo ai yo'ojën sa'nti hua'nare bojo recoyo bacuare re'huajë'ën.

Jucha zemosicuana sani, bacua etojeiyete cani achojë'ën.

Ñaco ëñama'icuare se'e ëña güesejë'ën.

Je'o base'e ro'ire ai yo'ojën ba'icuana sani, bacua etojeiyete masi güesejë'ën.

¹⁹ Riusu rani mame re'huaja'yete si'acuani quëani achoguë ba'ije'ën caguë, yë'ëre cuencueni raobi Riusu, cani achobi Jesús.

²⁰ Cani achoni tëjini, uti pëbëte se'e ganoni, uti pëbë re'hua ëjaguëna go'yani, bëabi. Bëaguëna, si'a ñë'ca huë'e bainbi baguëni ai zoe ëñajën baë'ë.

²¹ Zoe ëñajënnna, Jesusbi bacuani coca ca bi'rabi:

—Ja'an coca cani jo'case'e ba'iguëna, yure umuguse Riusubi güina'ru yo'o bi'raguë, baguë Raosi'quërebare mësacuani ëñobi, cabi Jesús.

²² Caguëna, si'acuabi Jesus ba'iyete ai re'oye cajën, baguë re'o coca cani achose'ere ai bojoreba bojojën baë'ë. Yequëcuaca sa'ñeña senni acha bi'rahuë:

—¿José mamaquëma'iguë baguë? baguëte jayaye'ru cahuë.

²³ Cajënnna, bacuani sehuobi Jesús:

—Mësacua ira bain coca cani jo'case'ere ro'tajën, yequëre yë'ë ba'iyete güina'ru caye'ne? “Më'ëbi éco uañe masinica, ja'ansi'quère huachojë'ën” ja'an cocare ro'tani, yë'ë ba'iyete ro'taye mësacua? Yequë cocare'ga yë'ë ba'iyete ro'tajën, yë'ëre cama'iñe'ne? “Më'ëbi Capernaum huë'e jobo ba'iguë yo'ose'e, yëquëna achani masise'e, ja'an'ru güina'ru yëquënami re'oye yo'ojë'ën, më'ë zinrën ba'iguë ba'isi jobore sëani” ja'an coca yë'ëre cama'iñe'ne mësacua?

²⁴ Ja'nca ro'tajën cacuare sëani, mësacua gu'a recoyo ro'tayete masiyë yë'ë. Riusubi baguë bainre coca cani achocuare raoguëna, bacua zinrën ba'ijëن ba'isi jobo bainbi bacuani te'e ruiñe ëñamajën, bacuani bojoma'iñë. Ja'nca bojoma'icua sëani, Riusubi tinruan ba'icuare quë'rë re'oye ëñaguë conji. ²⁵ Riusu ira bainguë raosi'quë Elíasre ro'tajë'ën. Baguë ba'i umuguseña ba'iguëna, ai romi hua'je hua'na Israel yijare ba'ijëن, ai yo'ojëن bateña. Samute tëcahuëan jobo ocoma'iguëna, ai aon gu'ana ju'iñë ba'iguëna, Riusubi Elíasni baguë yo'ore guanseguëña: ²⁶ Israel romi hua'je hua'nana conguë saima'ijë'ën. Sarepta baingo, Sidón huë'e jobo ca'ncore ba'igona, ja'ango Israel bain jubë ba'ima'igore conguë saiјë'ën caguë, baguëte saoguëña Riusu. ²⁷ Riusu ira bainguë raosi'quë Eliseore'ga ro'tajë'ën. Baguë ba'i umuguseña ba'iguëna, ai ira ca'mi rau bacua Israel yijare ba'ijëن, ai yo'ojëن bateña. Ja'nca ba'ijënnna, Riusubi Eliseoni baguë yo'ore guanseguëña: Naamán hue'eguë, Siria yijabi raisi'quë, ja'anguë se'gare conguë, baguë ira ca'mi raure huachojë'ën caguë, baguëte saoguëña Riusu, cabi Jesús.

28 Caguëna, si'acua ñë'ca huë'ere ba'icuabi achani, ai bëinreba bën'ë. **29** Ja'nca bëinjën, bacuabi Jesusre zeanni rérëni, huë'e jobo ca'ncona sani, ja'anru ba'i cubëna mëani, Ëmë të'ntëbana senjoni baguëre tonñu cajën, senjo ëaye yo'ojënnä, **30** Jesusbi tijini, bacua joborebabi etajani saj'i.

Un hombre que tenía un espíritu impuro

31 Ja'nca sani, yequë Galilea huë'e jobo, Caper-naum huë'e jobona ti'anni, yo'o yo'oma'i umugusebi bainbi ñë'cajënnä, bacuani coca yihuo bi'rabi. **32** Yihuo bi'raguëna, bain hua'nabi achani, ai bojo recoyo re'huaní, Ai masiyereba te'e ruiñe caguë, maire yihuoji baguë, sa'ñeña cahuë.

33 Ja'nrëbi, yihuoguë ba'iguëna, yequëbi gu'a huati recoyo cacasi'quëbi bain jobona nëcani, ai jëja güiguë cabi:

34 —Më'ë guere yo'oguë raqué'ne, Jesús Nazareno? Yëquëna jobore jo'cani, gare saiјë'en. Yëquënaní ro carajei güeseguë raiguëna, gare saiјë'en. Më'ë yua Riusu raosi'quëreba ba'iguëna, më'ëni masiyë yë'ë, güiguë cabi baguë.

35 Güiguë caguëna, Jesusbi baguë huati cacasi'quëni ai bëinguë cabi:

—¡Caye beoye ba'ijë'en, huati! ¡Ba bainguëre jo'cani, etani saiјë'en! bëinguë cabi Jesús.

Caguëna, gu'a huatibi ja'an bainguëte te'e jëana yijana taonni uanni, ja'nrëbi baguëte jo'cani etani saj'i. Baguëte ja'si yo'oye beoye saj'i. **36** Saiguëna, si'a bain hua'nabi ai quëquëjën, sa'ñeña senni acha bi'rahuë:

—¿Gue'ne yureca? Ta'yejeiye ejaguërebabi coca guanseguëna, gu'a huati hua'ibi bainre jo'cani etani saiyë, sa'ñeña cajën baë'ë.

³⁷ Ja'nrébi, Jesus yo'ose'ere cani achojën, si'a ca'ncoña bainbi achani, bojo coca sa'ñeña cahuë.

Jesús sana a la suegra de Simón Pedro

³⁸ Ja'nrébi, yihuoni tējini, Jesusbi ñë'ca huë'ebi etani sani, Simón huë'ena ti'anbi. Ti'anni bainbi quëajënnä achato, Simón rënjo pë'cagobi ai rau jayoni uncoñia. ³⁹ Uingona, baguë yua bago uinruna cacani, ja'an rau jayoyete bëin coca cabi. Caguëna, bago rau yua ja'anse'e tēquëna, go'yago. Go'yani, bago yua ja'ansi'co huëni, bain cuira bi'rago.

Jesús sana a muchos enfermos

⁴⁰ Ja'nrébi ënsëguë ruajaquëna, si'a bainbi bacua rauna ju'incua, si'a rau bacuare Jesusna sani eñojënnä, bacuare huachobi. Baguë éntë sarañabi pa'roni ga ju'in hua'nani huachoguëna, si'a hua'nabi huajë hua'na saë'ë. ⁴¹ Gu'a huati hua'i cacasi'cuare'ga Jesusna sani eñojënnä, Jesusbi coca guanseguëna, huati hua'ibi ai güijën, bainre jo'cani etani gare saë'ë. Ja'nca güijën,

—Më'ë yua Riusu Zinreba'ë, güijën cajënnä, Jesusbi bëin coca caguë, bacua coca güijënnä, ënsegüë baj'i'i. Riusu raosi'quërebare masijënnä, Jesús yua bacua coca cayete ënsegüë baj'i'i.

Jesús anuncia el mensaje en las sinagogas

⁴² Ja'nca ba'iguëbi canni ñatani, huë'e jobobi sani, bain beojën ba'iruna ti'anni baj'i'i. Ti'anni ba'iguëna, bain hua'nabi huëni, ¿Jarona saquë'ne baguë? cajën, baguëni cu'ejaë'ë. Cu'ejani, baguëte

tinjani, Yéquëna naconi gare bëani ba'ijë'ën cajën ba'icuareta'an,⁴³ bacuani sehuobi Jesús:

—Porema'iñë. Si'a huë'e jobo bainna raosi'quë sëani, Riusu bainrebare mame re'huani baja'yete yequë huë'e joboña bainni quëani achoguë saiyüë yë'ë, cabi.

⁴⁴ Ja'nca cani, si'a Galilea yija huë'e joboñana sani, bain ñë'ca huë'eñana cacani, Riusu cocarebare quëani achoguë bají'i.

5

La pesca milagrosa

¹ Ja'nca ba'iguëbi yequë umuguse Genesaret zitara yëruhuana ti'anni ba'iguëna, ai éama'iñereba bain jubëbi baguëna ti'an rani, Riusu cocarebare achañu cajën, si'a ca'ncoñabi baguëni jë'jejën guiojën baë'ë. ² Ba'ijënnä, Jesusbi ca'ncore ëñato, samu yoguan mejabëna rërëni tëosiguan bají'i. Hua'i yocuabi mëani, bacua huanterëanre zoajën saimate. ³ Te'e yogu Simón yogu ba'iguëna, Jesusbi cacani, Simonni, Choa ma'carë quëñëni huahuañu cabi. Cani, ja'nca quëñëni, Jesusbi yogute ñu'iguë, bain hua'nani coca yihuobi. ⁴ Yihuoni tējini, ja'nrebi Simonni cabi:

—Rëi zitara ba'iruna saiñu. Më'ë huanterëanre senjoni, hua'ire yojë'ën, cabi.

⁵ Caguëna, Simonbi sehuobi:

—Ëjaguë, yëquënabi yure ñami hua'ire yojëñ nata hua'nata'an, ro hua'i beo hua'na raë'ë. Ja'nca ba'iyeta'an, më'ëbi guanseguëna, huanterëte se'e senjoni, ñana'a, cabi.

6 Cani, ja'nrëbi huanterëte senjoni, ziaya hua'ire ai ta'yejeiye yohuë. Huanterë ye're ëaye ba'iye ai hua'i yohuë. **7** Ja'nca yoni, bacua gajecua yequë yogute ba'ijënnna, bacua ëntë sarañabi ba'bojën choë'ë. Choni, bacuabi raijënnna, samu yoguan ruca ëaye ba'iye tëca hua'ire bu'iye ayahuë. **8** Ayajënnna, ja'nrëbi, Simón Pedrobi ba hua'i yose'ere ëñani, Jesusna gugurini rëanni, baguëni cabi:

—Ai gu'a bain hua'guë'ë yë'ë. Ja'nca sëani, Ëjaguë, yë'ëre jo'cani saijë'ën, cabi.

9 Ja'nca caguë, Simón, baguë naconi ba'icua, si'acuabi bacua hua'i yo'ose'e ai ba'iye yose'ere ëñajëen, ai quëquëhuë. **10** Simón gajecua Santiago, Juan, ja'an Zebedeo mamacua, bacua'ga güina'ru ai quëquëhuë. Quëquëjënnna, Jesusbi Simonni cabi:

—Quëquëma'ijë'ën. Yureca bainrebare yoguë ba'ijë'ën, cabi. Jesús.

11 Caguëna, bacuabi bacua yoguanre rërëni mëani, si'ayete gare jo'cani senjoni, Jesús naconi te'e conjën, gare saë'ë.

Jesús sana a un leproso

12 Sani, yequë huë'e jobona ti'anjënnna, ira ca'mi rauna ju'inguëbi yua Jesusna ti'anni, gugurini rëanni, baguëni senni achabi:

—Ëjaguë, më'ëbi yënicá, yë'ë hua'guëre hua-chojë'ën. Ta'yejeiye ba'iguë sëani, huachoye poreyë më'ë, cabi.

13 Caguëna, Jesusbi baguë ëntë sarare mi'nani, baguëna pa'rogue cabi:

—Aito. Yëyë. Huajë hua'guë ba'ijë'ën, cabi.

Ja'nca caguëna, ja'ansirën, ira ca'mi rau beo hua'guë runji'i. ¹⁴ Ruinguëna, Jesusbi baguëni guansegüë cabi:

—Yequëcuani më'ë huajë raise'ere gare quëamaquë ba'ijë'ën. Pairi se'gana saiguë ba'ijë'ën. Ja'nca ba'iguë, më'ë huajë raise'ere baguëni ëñojë'ën. Ja'nca ëñoni, ja'nrëbi, ba hua'i ëyo, Moisés guansení jo'case'e'ru inni, misabëna tëoni ëoni, Riusuna mëojë'ën. Ja'nca bojoguë yo'oguëna, bainbi më'ë huajë raise'ere masija'cua'ë, cabi.

¹⁵ Ja'nca caguëta'an, Jesús yo'ose'e, baguë ba'iyé cato, bain hua'nabi yua quë'rë se'e sa'ñeña quëajëen, si'aruanna quëani ganojaë'ë. Quëani ganojaijënnä, ai bainbi, Baguë coca yihuoyete achañu cajën, bacua rau huacho güesejëen raë'ë. ¹⁶ Raijënnä, baguë se'gabi yua bain beo re'otona gatini sani, Taita Riusu naconi ujaguë baj'i.

Jesús sana a un paralítico

¹⁷ Ja'nrëbi, yequë umuguse ba'iguëna, Jesusbi bainre coca yihuoguëna, yequëcua fariseo bain, yequëcua ira bain toyani jo'casi coca masiye ye'yocua, bacuabi achajëen ñuë'ë. Si'a huë'e joboñabi raisi'cua baë'ë. Galilea huë'e joboñña, Judea huë'e joboñña, Jerusalén, ja'anruanbi rani, Jesusre achajënnä, Ja'quë Riusubi ai ta'yejeiyereba conguëna, Jesusbi rau ju'incuare huachoguë baj'i.

¹⁸ Huachoguë ba'iguëna, yequëcuabi garasi'quëni camare uinguëna, cuanni rahuë. Rani, Jesusna cacani, Ënquerë uanjaiñu cajën ba'icuata'an, ¹⁹ ai bain ba'ijënnä, garasi'quë naconi cacaye gare poremaë'ë. Ja'nca sëani, huë'e ëmëje'ena mëani, huë'e ja'ore otani, goje yo'ohuë. Yo'oni ja'nrëbi,

garasi'quëre cama uinguëna, bain jobona meñe gachoni, Jesús ba'iruna uanhue. ²⁰ Ja'nca uanni, Jesusbi huachoye poreji cajën, baguëni recoyo ro'tajënna, Jesusbi baguë ñacobi ëñani, bacua ro'tase'ere masibi. Ja'nca masini, garasi'quëni cabi:

—Mami, më'ë gu'a jucha yo'oguë ba'ise'e yua gare huanë yeni tonse'e ba'iji. Më'ë recoyo yua mame re'huani ténose'e ba'iji, cabi Jesús.

²¹ Ja'nca caguëna, bain ye'yocua, fariseo bain nacconi, bacuabi achani, ja'ansi'cua ro'tajën, ¿Baguë guere yo'oguë, Riusure gu'aye caguë'ne? Ro bain-guë sëani, bain juchare gare huanë yeni toñe ti'anma'iji, ro'tajën ñuë'ë.

²² Ro'tajën ñu'ijenña, Jesusbi baguë ñacobi ëñani, bacua ro'tase'ere masini, bacuana bonëni cabi:

—¿Mësacua guere yo'ojën ja'nca ro'tajën cajën ñu'iñe'ne? ²³ Si'a bainbi “Më'ë gu'a jucha yua huanë yeni tonse'e ba'iji” caye poreyë. Caye porecuata'an, “Huëni, më'ë camare inni ganijë'ën” catoca, bacua huachoye porema'iñete masi güeseyë. ²⁴ Ja'nca güesecuata'an, yë'ë yua Riusu raosi'quëreba ba'iguë sëani, bain gu'a juchare huanë yeni toñe pore ejaguë'ë yë'ë. Ja'anre mësacuani yure ëñoñë cabi.

Cani ja'nrëni, garasi'quëni cabi:

—Achajë'ën. Më'ë camare inni, më'ë huë'ena go'ijë'ën cabi.

²⁵ Caguëna, si'acuabi ëñajënna, garasi'quëbi yua ja'ansirën huëni, baguë camare inni, Taita Riusuni ai bojo coca caguë, baguë huë'ena goji'i.

²⁶ Go'iguëna, si'a bainbi ai bojoreba bojobjë, Riusuni ai re'oye ro'tajën cahuë:

—Riusurebabi ai ta'yejeiyereba ai re'oye yo'oguëna, gare ñama'icuabi ñañë mai, cahuë.

Jesús llama a Leví

²⁷ Ja'nrebi, Jesusbi etani sani ñato, impuesto curi coguë, Leví hue'eguëbi baguë curi corute ñuji'i. Ñu'iguëna, Jesús yua baguëni

—Yë'ere te'e conguë raijë'en, caguë choji'i.

²⁸ Choiguëna, Levibi te'e jéana huëni, si'aye gare jo'cani senjoni, Jesusni te'e conni saji'i.

²⁹ Sani ja'nrebi jë'te, Jesusni bojoguë, Fiestare yo'osa caguë, baguë gajecuare baguë huë'ena choji'i. Choiguëna, impuesto curi têtecua, yequëcua naconi, ai bainbi sani, Leví huë'ena ti'anni, Jesús naconi aon ainjën te'e bojobjen ñuë'ë. ³⁰ Ñu'ijënnna, fariseo bain, bacua gaje ye'yocua naconi ti'anni, Jesusre yo'o concuani ñani, bëin coca ca bi'rahuë:

—¿Mësacua guere yo'ojen, gu'a bain naconi te'e ñu'ijen, aon ainjën, gono uncujen conni ba'kiye'ne? Impuesto curi têtecua naconi te'e ñu'ijen, ai gu'aye yo'oye mësacua, senni achajen bën'ë.

³¹ Ja'nca senni achajenna, Jesusbi bacuani ye'yo coca caye'rú bacuani sehuobi:

—Huajë hua'nabi éco yo'oguëte senma'iñë. Rauna ju'incua se'gabi éco yo'oguëte señë.

³² Güina'rú, re'o bain casi'cua ba'itoca, bacuare choiguë raimaë'ë yë'ë. Gu'a bain se'gare choiguë raisi'quë'ë yë'ë, bacua gu'a juchare senjoni mame recoyo re'huacuare, caguë sehuobi Jesús.

La cuestión del ayuno

³³ Sehuoguëna, bacua yua yeque cocare baguëni senni achahuë:

—Juanre yo'o concua, fariseo bainre yo'o concua, bacuabi Riusuni ujaye se'ga yo'oñu cajën bacua aon ainmajënnä, ¿më'ëre yo'o concua queaca ro'tajën, güina'ru yo'oma'iñe'ne? Ro aon ainjën, ro gono uncujën yo'ocua'ë, senni achajën bën'ë.

³⁴ Senni achajënnä, Jesús sehuobi:

—Mësacua ¿queaca ro'tajën, bain hueja fiestana choisi'cuani aon ainma'iñe guanseye'ne? Huejaja'guëbi yuta ba'iguëna, aon aiñe gare jo'cama'iñë. ³⁵ Ja'nca jo'camajënnä, jë'te yequëcuabi ba huejaja'guëte preso zeanni quëñoja'cua'ë. Ja'nca quëñojënnä, ja'anrën ti'anguëna, yë'ëre yo'o concuabi aon aiñe jo'caja'cua'ë, sehuoguë cabi Jesús.

³⁶ Ja'nca cani, ja'nrebi se'e yeque ye'yo cocare bacuani quëa bi'rabi:

—Ira ye'resi canre re'huaye yëtoca, mame ju'i canbi ye'reni, ira canna ja'cheni ta'nëñe gare yo'oma'icua'ë. Ja'nca yo'otoca, mame can yua gu'a can'ru ruinguëna, ira can ja'chesse'ebi ai si'si ëñoji. ³⁷ Bisi ëye jo'cha huajë jo'cha ba'itoca, ira ga'ni corohuëanna ayaye gare yo'oma'icua'ë. Yo'otoca, huajë jo'chabi huo'coni, ira ga'ni corohuëanre juejueni, jañuni huesëji. Ga'ni corohuëan'ga gu'a corohuëan'ru ruinji. ³⁸ Ja'nca sëani, maibi huajë jo'chare mame ga'ni corohuëanna ayayë. Ja'nca ayajënnä, ba jo'cha, ba ga'ni corohuëan re'oye ba'iji. ³⁹ Bisi ëye jo'cha ira jo'cha, ja'anre uncuye ye'yesi'cuabi yua huajë jo'chare uncuye güeyë. “Ira jo'cha yua quë'rë hua'i sëñera ba'iji” cajën, huajë jo'chare güecua'ë.

6

Los discípulos arrancan espigas en el día de reposo

¹ Ja'nrëbi yequë umuguse, yo'o yo'oma'i umuguse ba'iguëna, Jesusbi baguëre yo'o concua naconi trigo zio re'otobi ganijën, baguëre concuabi trigo za'zare tëani, bacua ëntë sarañabi bo'teni, trigora'carëanre huajë ainjën saë'ë. ² Ja'nca ainjën saijënnä, fariseo bainbi ti'anni, bacuani bëinjën, coca senni achahuë:

—¿Mësacua guere yo'ojën, mai ira coca toyani jo'case'e'ru tin yo'oye'ne, yo'o yo'oma'i umuguse sëani? senni achahuë.

³ Senni achajënnä, Jesús sehuobi:
—Mësacua yua mai ira coca toyani jo'case'ere
ëñajën, ¿David yo'osi cocare ñamate'ne? Baguëre
concuia naconi sani, aon gu'aguëna, ⁴ baguë yua
Riusu huë'ena cacani, Riusuna jo'casi aonbëan,
jo'jo aonbëanre inni anquëña. Ainguë, baguëre
concuare'ga aon huo'hueguëña. Riusu pairi bain
se'gabi ja'an aonre ainja'bë cani jo'case'eta'an,
David yua bain ta'yejeiye ejaguë sëani, tin
yo'oguëña. Ja'an coca toyani jo'case'e ba'iguëna,
⁵ yë'ë'ga Riusu Raosi'quëreba ba'iguë, yo'o yo'oma'i
umuguse ejaguë'ë yë'ë, cabi.

El hombre de la mano tullida

⁶ Ja'nrëbi, yequë umuguse yo'o yo'oma'i umuguse ba'iguëna, Jesusbi bain ñë'ca huë'ena ti'anni, bainre coca yihuoguë baj'i'i. Yihuoguë ba'iguëna, yequëbi baguë jëja ëntë sara guë'nguësi sara ba'iguë, ja'anguëbi baj'i'i. ⁷ Ba'iguëna, fariseo bain, ira coca ye'yocua naconi ba'ijën, Jesusni

yahue ëñajën ëjohuë. Ja'an bainguëni huachotoca, baguë gu'aye yo'oyete cani achoñu cajën, yo'o yo'oma'i umuguse ba'iguëna, Jesusre yahue ëñajën ëjohuë. ⁸ Ja'nca ëjojënnna, Jesusbi baguë ñacobi ëñani, bacua yahue ro'tase'ere masini, guë'nguësi sara baguëte choiguë cabi:

—Huëni raijë'ën. Bain joborana nëcani ba'ijë'ën, caguë choji'i.

Choni, ba bainguëbi huëni raiguëna, ⁹ Jesús yua bain hua'nani cabi:

—Yë'ëbi coca senni achaguëna, mësacua ro'tajë'ën. Mai ira coca toyani jo'case'ere ëñato, yo'o yo'oma'i umuguse ba'itoca, ¿gue yo'o yo'oye poreye'ne mai? ¿Guere caguë'ne? ¿Bainni re'oye yo'oye, o bainni gu'aye yo'oye caguë? ¿Rauna ju'inguëte huachoye, o baguëte carajei güeseye caguë? ¿Guere caguë'ne mai ira coca toyani jo'case'e? senni achaguë cabi Jesús.

¹⁰ Ja'nca senni achaguë, si'acuani bonëjeiñe ëñani, ja'nrëbi guë'nguësi sara baguëni cabi:

—Më'ë ëntë sarare mi'najë'ën, cabi.

Caguëna, ba hua'guë yua baguë ëntë sara mi'nani, ja'ansirëñ huajë ëntë sara baguë runji'i.

¹¹ Ja'nca ruinguëna, ja'an gu'aye ro'tacuabi ai bëinreba bëinjën, sa'ñëña coca ca bi'rahuë: ¿Queaca yo'oni baguëte carajei güeseja'ye'ne mai? senni achajën, Jesusni bën'ë.

Jesús escoge a los doce apóstoles

¹² Ja'nrëbi jë'te, Jesusbi, Taita Riusu naconi ujajaza caguë, jai cubëna mëni, si'a ñami ujaguë ñatajaji'i. ¹³ Ñatajani ja'nrëbi, baguëre yo'o concuare choini, si'a sara samucuare cuencueni, Yë'ë

ta'yejeiye yo'ore yo'ojën ba'ijë'ën caguë jo'cabi.
14 Bacua mami hue'eyete cato, ñaca hue'ecua
baë'ë: Simón hue'eguëte yua yequë mami Pedrote
hue'yobi. Yequë Andrés, Simón yo'jeguë baji'i.
Yeque Santiago, yequë Juan, yequë Felipe, yequë
Bartolomé, **15** yequë Mateo, yequë Tomás, yequë
Alfeo mamaquë Santiago, yequë Simón hue'eguë
cananista jubë baji'i. **16** Yequë Santiago yo'jeguë
Judas, yequë Judas Iscariote hue'eguë, Jesusre
preso zean güesení senjoja'guë, ja'ancuare cuen-
cueni, baguë ta'yejeiye yo'o concuare re'huabi
Jesús.

Jesús enseña a mucha gente

17 Ja'nca re'huani tëjini, bacua naconi gajeni,
te'e ruin yija ba'iguëna, baguëre yo'o concua
naconi ti'anni, bainre yihuo bi'rabi. Ai jai
jubë bain ñë'casí'cua baë'ë. Judea yija bain,
Jerusalén huë'e jobo bain, Tiro, Sidón, ja'an huë'e
joboña bain, ai jai jubëbi ti'an rani, Jesús co-
care achañu cajën, Mai raure huacho güeseñu
cajën raisi'cua baë'ë. **18** Ja'nca ba'ijën, gu'a
huati cacasi'cua'ga ti'an raijënnä, Jesusbi si'acuare
huachobi. **19** Ja'nca huachoguë ba'iguëna, bain
hua'nabi, Baguë ta'yejeiyereba yo'oyete ëñani
masiñu cajën, baguëni pa'ro ëaye yo'ojën baë'ë.

La felicidad y la infelicidad

20 Ja'nrébi, Jesusbi baguëre yo'o concuani
ëñaguë, yihuo cocare cabi: Mësacua yua yo'jereba
ba'i hua'na ba'icuata'an, bojo recoyo re'huani
ba'ijë'ën. Riusu re'otorebare ba'ijën ai ta'yejeiye
coreba cojën ba'ija'cua'ë.

21 Mësacua yua Riusu ba'iyete quë'rë se'e masi
ëaye ba'icuata'an, bojo recoyo re'huani ba'ijë'ën.
Riusuni te'e ruiñereba masija'cua'ë.

Mësacua gu'a jucha yo'ojën ba'ise'ere ai oijën
ba'icuata'an, bojo recoyo re'huani ba'ijë'ën. Jë'te
gare oiye beoye chojën bojojën ba'ija'cua'ë.

22 Mësacua yua yë'ë bainreba, Riusu
Raosi'quëreba re'huasi'cua ba'ijënnä, yequëcuabi
ja'an ro'ina mësacuare ai je'o bajën, mësacuare
saoni senjojën, mësacuare ro a'ta gu'aye ro'tajën,
ai hui'ya cajën, ja'an ba'ija'cua'ë. Ja'nca ba'ijënnä,
mësacuabi ai yo'ojën ba'icuata'an, bojo recoyo
re'huani ba'ijë'ën. **23** Ja'an umuguseñabi ai yo'ojën
ba'icuata'an, mësacua ai bojoreba bojojën, Riusu
guënamë re'oto insija'yete te'e jëana coja'yeta'an
ba'iji yë'ëre cajën, ai bojo recoyo re'huani ba'ijë'ën.
Ja'an gu'a bainbi mësacuani je'o bajën, bacua ira
bain ba'isi'cua yo'ojën ba'ise'e'ru, Riusu bainre
gu'aye yo'ojën ba'ise'e'ru, mësacuani güina'ru
gu'aye yo'ojën ba'ija'cua'ë.

24 Yureca mësacua bonse ëjacua ba'ijën, ja'an
bonse se'gare bojojën ba'itoca, ai bëiñe cani
jo'case'e ba'iji mësacuare. Riusu insija'yete gare
coye beoye ba'ija'cua'ë.

25 Mësacua yua ro ën yija ba'iyete bojoreba
bojojën ba'itoca, mësacuare ai bëiñe cani jo'case'e
ba'iji. Mësacua yua ai aon gu'ana ju'injëen
ba'ija'cua'ë.

Mësacua yua yureña ba'iyé se'gare ai bojojën,
sa'ñeña gue güihuara chojën ba'itoca, ai bëiñe cani
jo'case'e ba'iji mësacuare. Mësacua yua si'a recoyo
ai sa'ntireba sa'ntijën ai oijën ba'ija'cua'ë.

26 Mësacua bainbi mësacua ba'iyete ai re'oye cajën ba'itoca, Riusu ro'tayete te'e ruiñe masijë'ën. Mësacuani bënni senjoja'ñeta'an ba'iji. Mësacua ira bain ba'isi'cuabi güina'ru yo'ojëñ bateña. Yequëcuabi ti'anjën, Riusu raosi'quë'ë yë'ë coquejën cajënnä, mësacua ira bain ba'isi'cuabi bacua ba'iyete ai re'oye cajën bateña. Mësacua bainbi yureña mësacuare'ga ai re'oye cajënnä, Riusu bënni senjoja'ñete masijë'ën.

El amor a los enemigos

27 Yureca, mësacua, yë'ë cocare achani Jaë'ë cajën ba'icua, mësacuani ñaca yihuoyë yë'ë: Yequëcuabi mësacuani je'o batoca, bacuare ai oijëñ conjëñ, bacuani ai yëreba yëjën ba'ijë'ën. Yequëcuabi mësacuani ai bëintoca, bacuare re'oye yo'oye se'ga ba'ijë'ën. **28** Yequëcuabi mësacuani gu'aye catoca, bacuani re'oye cani jo'caye se'ga ba'ijë'ën. Yequëcuabi mësacuani ai hui'ya yo'otoca, bacuani oire bajëñ, Riusuni senni achajën, bacua ba'iyete ujajën ba'ijë'ën. **29** Yequëbi më'ë huayohuana huaitoca, më'ë yequë huayohuare'ga baguëni huai güesejë'ën. Yequëbi më'ë guayoni se canre tëteni batoca, më'ë èntë sara canre'ga baguëna ro insijë'ën. **30** Yequëbi më'ë ba ma'caréanre sentoca, ènseye beoye baguëna ro insijë'ën. Më'ë bayete ro tëteni batoca, baguë se'e go'yayete senma'ijë'ën. **31** Yequëcuani re'oye yo'oye ro'tato, mësacuani re'oye yo'oye, mësacua yëyete ro'tajën, yequëcuare'ga güina'ru te'e ruiñe yo'ojëñ ba'ijë'ën.

32 Mësacuare ai yëcua se'gani ai yëjën ba'itoca, mësacuabi re'oye yo'oye ti'anma'icua ba'iyë. Gu'a

bainbi güina'ru re'oye yo'oye masiyë. ³³ Mësacuare re'oye yo'ocua se'gani re'oye yo'ojën ba'itoca, mësacuabi re'oye yo'oye ti'anma'icua ba'iyë. Gu'a bainbi güina'ru re'oye yo'oye masiyë. ³⁴ Mësacua bonse go'yajaicua se'gani bonse prestajën ba'itoca, mësacuabi re'oye yo'oye ti'anma'icua baesacua yëyete ro'tajën, yequëcuare'ga güina'ru te'e ruiñe 'iyë. Gu'a bainbi bacua gu'a gajecuani bacua bonsere prestajën, Bacuabi ja'anre go'yaja'bë cajën ba'iyë. ³⁵ Mësacuaca mësacuani je'o bacuani ai yëjën ba'ijë'ën. Bacuani re'oye yo'oye se'ga ba'ijë'ën. Mësacua bonsere prestaye sentoca, ja'anre se'e coni baye ro'tamajën, bacuana insijëن ba'ijë'ën. Ja'nca yo'ojën ba'itoca, Riusu ta'yejeiye insija'yete ai coni baja'cua'ë mësacua. Riusu ta'yejeiyereba ba'iguë sëani, mësacuani caraye beoye ai conreba conguë ba'iji. Baguë yua ro gu'a bain, baguëni surupa gare cama'icua, ja'ancuare ai re'oye conguë sëani, mësacuare'ga quë'rë ta'yejeiye conreba conguë'bi ba'iji. ³⁶ Ja'nca sëani, mësacua yua Taita Riusu oiguë bani coñete ro'tajën, mësacua güina'ru bainre oijëن conjëن ba'ijë'ën.

No juzgar a otros

³⁷ Mësacua yua yequëcua gu'aye yo'oyete bënjën cama'ijë'ën. Bacuare bënni senjo cocare caye beoye ba'ijë'ën. Ja'nca ba'itoca, Riusu'ga mësacuare bënni senjomä'ija'guë'bi. Bacuabi gu'aye yo'ojënnna, Më'ë gu'aye yo'oni tonse'ere huanë yeye se'ga ba'iyé yë'lë, bacuani cajë'ën. Ja'nca catoca, Riusubi mësacua gu'aye yo'ojën ba'ise'ere ëñani, mësacua gu'aye yo'ojën ba'ise'ere

huanë ye ye se'gare caja'guë'bi Riusu. **38** Mësacua bonsere éñajën, yequécuana ro insijën ba'ijë'ën. Ja'nca ro insijën ba'itoca, Riusu'ga mësacuana ai insireba insija'guë'bi. Gare énseye beoye insiguë, mësacua jai turubëna ayani, ña'goni guioni, turubë bu'ije teca ai ayaye'ru mësacuana ta'yejeiye ai insireba insija'guë'bi Riusu. Mësacua yua, Bonsere bendieza cajën, bonsere cuencueni insijënnna, Riusubi éñani, mësacua cuencuese'e'ru güina'ru cuencueni mësacuana insija'guë'bi.

39 Mësacua yua én cocare'ga ro'tani ye'yejë'ën. Ñaco éñama'iguëbi baguë ñaco éñama'i gajeguëni caguë: Raijë'ën. Saiñu. Ma'are më'ëni éñozá caguë, ja'nrëbi saitoca, ¿queaca ma'are éñóñe poreguë'ne? Porema'iji. Si'a samucuabi saiјén, yorobëna te'e gurujani tonni huesëyë. **40** Masiye ye'yoguëna, baguë coca ye'yequëbi ye'yoguë'ru quë'rë ta'yejeiye masiye ti'anma'iji. Ti'anma'iguë, baguë uti ye'yení têjini, baguë ye'yoguë ba'ije'ru te'e ba'ija'guë'bi.

41 Yureca, më'ë gaje hua'guëbi gu'aye yo'oguëna, baguëni bënni senjo cocare cama'ijë'ën. Baguë ñacogana éñani, Hui'ya zin'garëte rutaza caguë, yua jai hui'ya maca më'ë ñacogate ba'iguëna, ja'anre ro ro'taguë rutama'itoca, **42** ¿queaca më'ë gajeguë ñaco ba'i zi'ngarëte rutaguë'ne? Më'ë ñacoga ba'i macare rutaye ro'tama'itoca, ro coqueguë yi-huoyë më'ë. Ru'ru, më'ë ñacoga ba'i maca, ja'an jai hui'ya macare rutani, ja'nrëbi ai re'oye éñañe poreguëbi sani, më'ë gajeguë ñacogana re'oye éñani, ja'an hui'ya zi'ngarëte guaja beoye rutaye poreyë më'ë. Më'ë gajeguëni gu'a jucha

yo'ose'ere senjojë'ën yihuoye ro'tatoca, ru'ru më'ë
gu'a juchare jo'cani senjojë'ën.

El árbol se conoce por su fruto

43 Bain coca cayete achani, bacua recoyo ba'iyete masijë'ën. Re'o sunquiñë ba'itoca, gu'a uncue gare quëinma'iji. Gu'a sunquiñë ba'itoca, re'o uncue gare quëinma'iji. **44** Mësacua yua si'a sunquire ëñajëن, ba uncue quëinse'ere ëñajëن, ja'an sunquiñë ba'iyete masijë'ën. Miu sunquiñë ba'itoca, higo uncuere ja'añëna tëaye porema'iñë. Susihuë ba'itoca, ëyere tëaye gare porema'iñë. **45** Güina'ru, re'o bainguëbi coca catoca, re'oye se'gare caji, re'o recoyo baguë sëani. Gu'a bainguëbi coca catoca, gu'aye se'gare caji, gu'a recoyo baguë sëani. Ja'nca sëani, bain recoyo ba'iyete masiye yëtoca, bacua coca cayete achani masijë'ën.

Las dos bases

46 Mësacua jubë ba'icua yequëcuabi yë'ëre cajën, Ëjaguë, Ëjaguë, cajën ba'icuata'an, yë'ë cayete gare yo'oye beoye ba'iyë. **47** Yë'ëna ti'an rani, yë'ë cocare te'e ruiñë achani, gare güeye beoye yo'otoca, **48** re'o huë'e yo'oguë'ru ba'iyë. Ja'an huë'e yo'oguë, ai rëiye no'ani, gata yija tëca no'ani, huë'e ture gata naconi guioni, re'oye pë'npëni, re'o huë'e nëcoji. Nëcoguëna, ja'nrëbi, ziayabi ai co'jeya rëoni, ai saoya ti'anguëna, baguë huë'e gurujaima'iji, gata naconi guiose'e sëani. **49** Yequëbi yë'ëna ti'an rani, yë'ë cocare ro achani, ro yo'oye beoye saitoca, gu'a huë'e yo'oguë'ru ba'iji. Ja'an huë'e yo'oguë, bean goje no'aguë, huë'e ture re'oye guiomäiguë, huë'e te'e ruiñë nëcoma'iji. Ja'nrëbi, ziayabi ai

co'jeya rëoni, ai saoya ti'anguëna, baguë huë'e yua te'e jéana gurujani meaji, yihuoguë cabi Jesús.

7

Jesús sana al criado de un oficial romano

¹ Cani, bainre yihuoni tējini, ja'nërëbi Capernaum huë'e jobona sani baji'i Jesús. ² Ba'iguëna, romano bainguë soldado jubë ëjaguëbi baguë yo'o conguëbi rau neni ju'inguë ba'iguëna, baguëte ai oire baguë, ³ Jesús ba'iyete achani, Yë'ë yo'o con huaguëni huacho raija'guë caguë, judío éja bainni caguë guansebi: Jesusni quëajijé'en: Yë'ë yo'o con hua'guëbi rau neni ju'inguëna, huacho raija'guë caguë guansení saobi. ⁴ Saoguëna, bacuabi Jesusna sani, baguëni si'a jéja senni achahuë:

—Romano ëjaguëbi ai re'oye yo'oguëre sëani, baguëte conjé'en. ⁵ Yëquëna jubë judío bainni ai re'oye conguë, yëquëna ñë'ca huë'ere yo'oye guansení, si'aye roji'i. Ja'nca sëani, baguë yo'o conguëte huacho raijé'en, senni achajén cahuë.

⁶ Ja'nca cajëenna, bacua naconi saji'i. Sani, ti'an bi'rani, yuta so'orë ba'iguëna, romano ëjaguëbi baguë gaje hua'na naconi Jesusna coca raobi:

—Ëjaguë, më'ëni ro guaja choë'ë yë'ë. Më'ë yua ai ta'yejeiye ëjaguërebare sëani, yë'ë huë'ena cacayete më'ëni choiye ti'anma'iguë'ë yë'ë. ⁷ Yë'ë'ga sani, më'ëni choiye ti'anma'iguë'ë yë'ë. Ja'nca ti'anma'iguëre sëani, yë'ë huë'e ti'anma'ijé'en. Më'ë guanse coca se'gare caguëna, yë'ë yo'o con hua'guëbi huajé raija'guë'bi. Ja'an se'gare yo'oje'ën caguë saoyë yë'ë. ⁸ Ja'nca caguë saoguëbi yequëcua yë'ë ëjacuani sehuoye bayë yë'ë. Yequëcua soldado

hua'nare guanseye bayë yë'ë. Yequëni, Saijë'ën catoca, baguë saiji. Yequëni, Raijë'ën catoca, baguë raiji. Yë'ë yo'o con hua'guëre'ga, Yë'ë case'e'ru yo'oje'ën catoca, te'e ruiñe yo'oji baguë. Yë'ë case'e'ru te'e yo'ocua sëani, më'ë raima'iguë huacho coca guanseye se'ga cajë'ën, caguë raobi.

⁹ Caguë raoguëna, Jesusbi achani, romano ejaguë case'ere ai bojoguë, bain be'tejën raicuana bonëni cabi:

—Ja'an soldado ejaguëbi yë'ëni ai recoyo ro'taji. Si'a Israel bain recoyo ro'tayete ëñato, baguë recoyo ro'taye'ru ro'taye ti'anma'iñë si'acua, cabi Jesús.

¹⁰ Caguëna, judío ëja bainbi romano ejaguë huë'ena go'ini ëñato, baguë yo'o con hua'guëbi gare huajë raisi'quë bají'i.

Jesús resucita al hijo de una viuda

¹¹ Ja'nca ba'iguëna, ja'nrëbi, Jesús yua yequë huë'e jobo, Naín huë'e jobona saji'i, baguëre yo'o conjën ye'fecua naconi. Ai bain jubë be'tejën saë'ë. ¹² Sani, huë'e jobo caca sa'rона ti'anni ëñato, bain hua'nabi ju'insi'quëni tanza cajën, etajën baë'ë. Ju'insi'quë pë'cago hua'jeni ba'igobi gaña hua'guëni hueansi'co baco'ë. Ai bain jubëbi bagore conjën saë'ë. ¹³ Ja'nca saijënnna, Jesusbi ai oiguë, bagoni cabi:

—Oima'ijë'ën cabi Jesús.

¹⁴ Cani ja'nrëbi, baguëre tan ganjoguna ti'anni pa'rogueña, bagu sacuabi nëcajaë'ë. Nëcabajënnna, ja'ansi'quëbi ju'insi'quëni coca cabi:

—Huëijë'ën, mami, yë'ëbi cayë më'ëre, cabi Jesús.

15 Caguëna, ja'nrëbi ba bonsëguë junni uinguëbi huëni bëani, coca ca bi'rabi. Coca ca bi'raguëna, baguëte ba pë'cagoni éñobi. **16** Éñoguëna, si'a bainbi ai éñajën rëinjën, Taita Riusuni ai bojojën cahuë:

—Riusu Raosi'quë ai ta'yejeiye ejaguëbi maina ti'an raj'i. Baguë bainna rani, maini ai oiguë conji. Baguë bainrebare re'huani, maire tëani baza caguë raisi'quë'bi, cajën bojohuë bacua.

17 Cajën bojojënnna, ja'nrëbi yequëcuabi achani, baguë yo'ose'ere si'a Judea huë'e joboñana quëani achojaë'ë.

Los enviados de Juan el Bautista

18 Quëani achojaijënnna, Juanre concuabi achani, Juanna sani, si'aye quéahuë. Quéarena, Juan yua baguëre yo'o concuare samucuare choini, bacuani guanseguë cabi: **19** Mësacua yua Jesusni senni achajaijë'en. ¿Më'ë yua Riusu Raoja'guëreba cani jo'casi'quë ba'iguë'guë? Ba'ima'itoca, ¿Riusubi yequëre raoja'guë'guë? Ja'an cocare baguëni senni achani rani quëajë'en caguë, bacuare saobi. **20** Saoguëna, bacuabi Jesusna sani ti'anni, baguëre senni achahuë:

—Yëquëna yua Juan Bautizaguë raosi'cua'ë. Më'ëni coca senni achaye guansebi: ¿Më'ë yua Riusu Raoja'guëreba cani jo'casi'quë ba'iguë'guë? Ba'ima'itoca, ¿Riusubi yequëre raoja'guë'guë? Jesusni senni achahuë.

21 Ja'nca senni achajën éñato, Jesusbi ai bain hua'nani huachoguë baj'i. Yequëcuabi rauna ju'injënnna, yequëcuabi huati hua'ire bajënnna, yequëcuabi ñaco éñama'ijënnna, Jesusbi si'acuare

huachoguë baji'i. ²² Ja'nca huachoguë, bacuani sehuobi:

—Mësacua yua Juanna go'ini, mësacua ëñase'e, mësacua achase'e, ja'an si'ayete baguëni quëajaijë'ën. Ñaco ëñama'icuabi ñaco huajëyë. Ira ca'mi rau bacuabi huajë raiyë. Ganjo achama'icuabi ganjo huajëyë. Guëon garasi'cuabi se'e ganiñë. Junni huesësi'cuabi go'ya raiyë. Bonse beo hua'na'ga Riusu bojo güese cocare te'e ruiñe achaye poreyë. ²³ Ja'nca sëani, yë'ëni jo'caye beoye recoyo ro'tajën ba'itoca, ai bojoreba bojоjëñ ba'ijsa'ë. Ja'anre Juanna quëajaijë'ën caguë, bacuare Juanna saobi.

²⁴ Saoni, gotena, Jesusbi bain jubëni Juan ba'iyete quëa bi'rabi:

—Mësacuabi beo re'otona sani, Juanre ëñañu cajën, ¿neni ëñañe ro'tare'ne? “Ro jëja beo hua'guë, jë'je sahua tutu taonse'e'ru ba'iguëte ëñajaiñu” cacuata'an, ai jëja recoyo babi Juan. ²⁵ ¿Mësacua není ëñañe ro'tare'ne? “Ëjaguë caña ju'iguëte ëñajaiñu” cacuata'an, ja'nca ju'imaji'i. Ëjaguë caña ju'icua yua me'najeiñe ba'icua, ja'ancua yua ta'yejeiye ëja bain huë'ëña se'gare ba'iyë. ²⁶ ¿Mësacua není ëñañe ro'tare'ne? “Riusu coca quëani achoguëte ëñajaiñu” catoca, mësacua te'e ruiñe ro'tahuë. Aito. Riusu coca quëani achocua si'acua'ru quë're ta'yejeiye ëjaguë ba'iguëni mësacua ëñahuë. ²⁷ Riusu ira coca toyani jo'case'ere ëñato, yua Juanre ñaca toyani jo'case'e ba'iji:
Bain ëjaguë rai ma'are re'huacajia'guë caguë, yë'ë
coca quëani achoguëte bainna ru'ru saohuë
yë'ë, cani jo'cabi Riusu.

28 Ja'nca cani jo'caguëna, mësacuani ganreba quëayë yë'ë. Juanbi yua Riusu coca quëaye raosi'cua si'acua'ru quë'rë ta'yejeiye ëjaguë ba'iji baguë. Ja'nca ba'iguëta'an, Riusu ba'i jobona ñato, baru ba'iguë quë'rë yo'je ba'i hua'guëbi Juanre quë'rë ta'yejeiye ëjaguëbi ba'iji, caguë quëabi Jesús.

29 Ja'nca quëaguëna, bain hua'na, impuesto curi cocua ja'ancua yua Juanna sani bautiza güesesi'cua ba'ijën, ja'ancuabi achani, Riusubi te'e ruiñe yo'oji cajën baë'ë. **30** Ja'nca cajën ba'ijënnna, fariseo bain, ira coca ye'yocua naconi, bacuabi yua Juan bautizayete güejën, Riusu insini jo'caja'ye, baguë coñete gare gu'a güejën senjohuë. **31** Güejën senjojënnna, Mai Ëjaguë Jesusbi bacuani quëabi:

—Yureña bain ba'iyete ¿queaca quëaye'ne yë'ë? **32** Zin hua'na sa'ñeña huere yo'ocua'ru ba'iyë. Ja'nca ba'ijën, bacua gajecuani güijën cayë: “Yëquénabi jurihuëte juijënnna, ¿mësacua guere yo'ojën pairamate'ne? Yëquénabi sa'ntiye gantajënnna, ¿mësacua guere yo'ojën oimate'ne?” güijën cayë zin hua'na. **33** Ja'nca güijën cajënnna, yureña bainbi güina'ru yo'ojën ba'iyë. Juan Bautizaguëbi rani, baguë aon aiñe jo'caguë, bisi ëye jo'cha uncuye beoye ba'iguëna, mësacuabi Ro hue'nhue huati hua'guë'bi baguëte cajën baë'ë. **34** Ja'nrëbi yë'ë, Riusu Raosi'quëreba ba'iguëbi rani, aonre anni, gonore uncuguëna, mësacuabi yeque coca yë'ëre cajën, “Aon ain huati'bi. Jo'cha güebe huati'bi. Gu'a bain, impuesto curi cocua, ro bacua gajeguë'ru ba'i'te” yë'ëre ja'nca cajën ye'ere gu'a güeyë mësacua. **35** Ja'nca cacuata'an, Riusu masiyete ye'yeye yënicá, Riusu bain baguë

ba'iyete masicuare ñani masijë'ën quëabi Jesús.

Jesús en casa de Simón el fariseo

³⁶ Ja'nrebi, fariseo bainguë Simón hue'eguëbi Jesusre choiguëna, Jesusbi baguë huë'ena sani, baguë naconi bëani aon anji'i. ³⁷ Aon ainguëna, yeco gu'a romigo ba'igobi ja'ansi huë'e jobore ba'igo yua Jesús ba'ije, fariseo huë'ere aon ainguë ba'ije, ja'anre achani, bago yua ma'ña sën re'core inni, alabastro gata ro'rohuëna bu'ije teca queoni ayani, ³⁸ fariseo huë'ena saco'ë. Sani ti'anni, Jesús yo'je, baguë guëoña ba'iruna rëanni, ai oco'ë. Oni, bago oise'ebi baguë guëoñana ai meoni tonni zoago. Zoani, bago rañababi cuenani, baguë guëoña ai muchani, bago ma'ña re'core baguë guëoñana jañuni zoani tongo. ³⁹ Ja'nca yo'ogona, ja'an fariseo bainguë Simonbi bago yo'ose'ere ñani ro'tabi: “Enquë yua Riusureba Raosi'quë banica, bago gu'aye yo'ogo ba'iyete masire'abi. Bagoni ñani, gu'a romigo ba'iyete masini ënsere'abi” ro'taguë ñaguë ñuji'i. ⁴⁰ Ro'taguë ñu'iguëna, Jesusbi cabi:

—Simón, më'ëni coca quëaye yeyë yë'ë cabi.

Caguëna,

—Cajë'ën, Ëjaguë sehuobi.

⁴¹ Sehuoguëna, ye'yo cocare baguëni quëabi Jesús:

—Curi presta ñaguëbi curi prestaguëna, samucuabi baguëni ro'ija'cua baë'ë. Yequëbi quinientos denario so'coña ro'ija'ye baj'i. Yequëbi cincuenta denario so'coña ro'ija'ye baj'i. ⁴² Si'a jubëbi baguëni ro'ije porema'icua ba'ijenna, ba ñaguëbi bacua ro'iyete se'e senmaji'i. Mësacua yua gare

yë'ëre ro'iye beoye ba'ijë'ën caguë, bacuani huanë ye cocare cani tonbi. Ja'nca huanë yeye caguëna, ñjaroguëbi ba ejaguëni quë'rë ta'yeyejiye ai yëguë'ne? senni achabi Jesús.

43 Senni achaguëna, Simón sehuobi:

—Baguëni quë'rë ro'ija'ye ba'isi'quëma'iguë se-huobi.

Sehuoguëna, Jesusbi

—Te'e ruiñe sehuohuë më'ë cabi.

44 Cani, ja'nrëbi ba romigona bonëni ëñani, Simonni se'e cabi:

—Enconi ëñani ro'tajë'ën. Yë'ëbi më'ë huë'ena caca rani ba'iguëna, më'ëbi yë'ëni bojoguë con-maë'ë. Yë'ë guëoñare zoaye ocore gare guanse-maë'ë më'ë. Ënco'ga bago oise'e se'gabi yë'ë guëoña jo'caye beoye zoani tongo, bago rañababi cuenago, ja'an se'ga yo'ogo. **45** Më'ëbi yë'ëni gare oiyé beoye ëñani saludaguëna, ñenco'ga yë'ë ti'ansirënbì yë'ëni ai bojogo, yë'ë guëoñare muchago gare jo'caye beoye yo'ogo. **46** Më'ëbi hui'yabe re'core guanse-maë'ë, yë'ë sinjobëna queoni jañuñete. Ënco'ga ma'ña re'core rani, yë'ë guëoñana queoni jañuni tongo. **47** Ja'nca yo'ogobi yë'ëni ai ta'yeyejiye ai yë'reba yë'go sëani, bago ai gu'a jucha huanë yese'ere bainni masi güesego. Yequecua'ga choa ma'carë se'ga gu'aye yo'oni huanë ye güesejëñ, yë'ëni ta'yeyejiye yëma'icua ba'iyë cabi Jesús.

48 Cani ja'nrëbi, ba romigona bonëni cabi:

—Mami, më'ë gu'a jucha yo'ogo ba'ise'e si'ayete huanë yeyë yë'ë cabi.

49 Caguëna, yequecua ba aon aiñete choisi'cuabi yua sa'ñeña bëin coca ca bi'rahuë:

—¿Enquë, bain juchare huanë yeye caguë, gueguëguë'ne? sa'ñeña senni achajën cahuë.

⁵⁰ Cajënna, Jesusbi bagoni cabi:

—Yé'ëni si'a recoyo ro'tani bojogo sëani, Riusu ba'i jobona ti'anni ba'ija'go'ë më'ë. Yureca jucha beogo, bojogo saiјë'en cabi.

8

Mujeres que ayudaban a Jesús

¹ Ja'nrebi jë'te, Jesusbi sani, ai huë'e joboña, bain ba'iruanna ti'anni, Riusu bojo güese coca, Riusu bainreba re'huani baja'yete quëani achoguëna, baguëre ta'yejeiye yo'o concua si'a sara samucuabi baguëni te'e conjën saë'ë. ² Conjën saiјënnna, yequë romi hua'na'ga baguëni conjën saë'ë. Romi hua'na ba'iyete ñato, yequë romi hua'naca yua huati cacasi'cua baë'ë. Yequë romi hua'naca rauna ju'incua baë'ë. Ja'nca ba'isi'cua ba'ijënnna, Jesusbi si'acuani huachoni gare huajë rai güesebi. María hue'ego'ga, Magdalena mami bago, yua te'e éntë sara samu huati hua'i cacasi'co ba'igona, Jesusbi si'a huati hua'ire etoni saoni senjoguëna, querë huajë raco'ë bago. ³ Juana hue'ego'ga baco'ë. Bago ñejë Cuzabi Herodes meñe yo'je ejaguë baj'i. Yeco Susana, yequëcua romi hua'na naconi ba'ijënnna, Jesusbi si'acuani bacua rau base'ere huachobi. Huachoguëna, ba hua'na yua bacua porese'e Jesusni conjën, insijëñ baë'ë.

La parábola del sembrador

⁴ Ja'nrebi, ai jai jubëan bainbi si'a huë'e joboñabi etani, Jesusna ti'anni ba'ijënnna, bacuani ye'yo coca cani acho bi'rabi:

5 —Bainguëbi Aonre tanza caguë saj'i. Sani, yijare re'oye re'huani tējini, aonra'carëanre re'oye mo'gasi yijana senjoguë, yequëra'carëanre ma'ana tonguëna, bain za'nguye, bi'an uncueye, ja'anna huesëbi. **6** Yequëra'carëanre senjoguë, gata yijana tonguëna, ticubi irani, ja'nrébi yija yaquima'iguëna, ro güeanbi. **7** Yequëra'carëanre senjoguë, miubëna tonguëna, miubi irani huenni huesobi. **8** Yequëra'carëanre senjoguë, re'oye re'huasi yijana tonguëna, aon sahuabi irani, aonre quënji'i. Aonra'carëan quëinse'ere cuencueto, cien viaje ba'ije tēca quë'rë ta'yejeiye quënji'i, cabi Jesùs. Ja'an ye'yo cocare cani, bainni si'a jéja cabi:

—Mësacua yua ganjo banica, te'e ruiñe achani ro'tajëن ye'yejë'en cabi.

El porqué de las paráboras

9 Ja'nca caguëna, baguëre yo'o concuabi huesë ëaye achajëن baguëni senni achahuë:

—¿Gue cocare ye'yoguë caguë'ne, Ëjaguë? senni achahuë.

10 Senni achajënnna, baguë sehuobi:

—Riusubi baguë ba'i jobo ba'ija'yete cani achoza caguë, mësacuani si'aye te'e ruiñe masi güeseji. Yequëcureta'an banji. Bacuani cani achoto, ye'yo coca se'gare bacuani quëaji Riusu. Te'e ruiñe ye'yeje yëma'icua sëani, yë'ë cocare achani, ro huesë ëaye ba'icua'ë. Yë'ë èñonoñere'ga èñani, ro huesë ëaye èñajëن ba'iyë bacua, caguë sehuobi Jesùs.

Jesùs explica la parábola del sembrador

11 Caguë sehuoni, ja'nrébi zio tanguë cocare bacuani te'e ruiñe quëabi:

—Baguë yua aonra'carëan senjoguëna, yua Riusu coca cani achoye'ru ba'iji. ¹² Ma'ana tonsira'carëanre cato, bain hua'nabi Riusu cocare achani, ja'nrëbi ro ro'tajën saiyë. Zupai huatibi rani, Riusu bënni senjoja'ñete jéama'ija'bë caguë, bacua coca achase'ere ro tëteni saoni senjoji. Bacuabi ro recoyo ro'tamajën saiyë. ¹³ Gata yijana tonse'ere cato, Riusu coca achacua yequëcua ba'iyë. Riusu cocare achasi'cuata'an, ai bojoye achani, ja'nrëbi sani, zoe beoye ba'ijén, ba cocare gare huanë yeni jo'cani senjoñë. Be'su sita ba'iy'e'ru ba'iyë bacua. ¹⁴ Miubëna tonsira'carëanre cato, Riusu cocare achacua yequëcua ba'iyë. Riusu cocare achacuata'an, ën yija bonsere ba ëaye ba'ijén, ja'an se'gare ro'tani, Riusu yéyete gare se'e ro'tamajën, baguëte gare jo'cani senjoñë. Gare aon quëiñe beoye ba'iy'e'ru ba'iyë bacua. ¹⁵ Re'oye re'huasi yijana tonse'ere cato, Riusu cocare achacua yequëcua ba'iyë. Bacuabi achani, bacua recoyona re'oye re'huani, Riusu case'ere te'e ruiñe yo'oyë. Aon tëarën ti'añe tëca re'oye yo'o conjën, Riusu yéyete gare caraye beoye yo'ojën ba'iyë.

La parábola de la lámpara

¹⁶ Bainbi majahuëte zëontoca, guënarobi ro meñe jaoni ta'pima'iñë. Cama yijacuana ro yahuema'iñë. Bañë. Huë'ena ti'ancuabi re'oye ëñaja'bë cajën, majahuëte zëonni, ëmëna reoyë. ¹⁷ Ja'nca cani jo'caguëna, ëñere ro'tani ye'yejë'ën. Bain hua'nabi gu'aye yo'oni gatiza cajën yo'ocuareta'an, Riusubi si'aye ëñani, bacua yo'ose'ere si'acuani masi güeseja'guë'bi.

18 Ja'nca sëani, mësacua yua yë'ë cocare achani, te'e ruiñe ro'tajén ba'ijé'en. Riusu insise'ere ai coni batoca, quë'rë se'e ai coni baja'cua'ë. Riusu insise'ere choa ma'carë se'gare coni batoca, Riusubi ja'anre gare tëani, ro beo hua'guëre saoni senjoja'guë'bi, quëabi Jesús.

La madre y los hermanos de Jesús

19 Caguë quëaguëna, Jesús pë'cago, baguë yo'je hua'na naconi, bacuabi ti'an rani, ai jai jubë bain ba'ijénnna, baguëna ti'añe poremaë'ë.

20 Porema'ijénnna, yequëbi Jesusni cabi:

—Më'ë pë'cago, më'ë yo'jecua, bacua yua hue'se ca'ncore nëcajén, më'ëni cu'eyë cabi.

21 Caguëna, Jesusbi sehuoguë, si'acuani cabi:

—Bacuabi yë'ëre cu'ecuata'an, yë'ë cocare achani te'e ruiñe yo'o jénnna, Jesusbi umeni canji'i. Yë'ë mamá, yë'ë yo'jecua, ja'anre cayë bacuare, cabi Jesús.

Jesús calma el viento y las olas

22 Ja'nrëbi, yequë umuguse, Jesús yua baguëre yo'o concua naconi ba'iguë, yua yoguna cacani, Que të'huina saiñu caguëna, bacuabi conjén saë'ë.

23 Sani, jobo zitara ba'ijénnna, Jesusbi umeni canji'i. Canni ba'iguëna, ai jëja tutu raiguëna, yogu yua oco bu'i bi'rabi. Bu'i bi'raguëna, Rucani huesëma'iñne cajén, ai huaji yëjén, **24** Jesusni sëtoni cahuë:

—Ëjaguë, conjé'ën. Maibi rucani huesëyë cahuë.

Cajénnna, Jesusbi huëni, gue tutu, gue zitara të'a, ja'anre bëinguë cani, cuauye guanseguëna, si'aye beoru ja'anse'ebi cuauyi carajaji'i.

25 Carajaiguëna, Jesús yua baguëre yo'o concuani bëin coca cabi:

—¿Mësacua guere yo'ojën, yë'ëni recoyo ro'tama'iñe'ne? cabi.

Caguëna, bacuabi ai quëquéjën, sa'ñeña senni achahuë:

—¿Ba hua'guë gue bainguëguë'ne? Baguë coca guanseye se'ga caguëna, tutu'ga, zitara të'a'ga ja'anse'ebi achani Jaë'ë cani cuauibi, cahuë.

El endemoniado de Gerasa

²⁶ Cajënna, ja'nrëbi que të'huina ti'anni ëñato, Geresa yija baji'i, Galilea je'eñera. ²⁷ Ti'anjënna, Jesusbi mëj'i'i. Mëiguëna, baru bainguë huati zemosi'quëbi baguëna tëhuo raji'i. Tëhuo raiguëbi yua huë'e ba'kiye jo'cani senjosí'quë baji'i. Can beohuë ba'iguë, bain tanru se'gare baji'i. ²⁸ Ja'nca ba'iguëbi yua Jesusni ëñani, baguëna ti'anni, gugurini rëanni, baguëni ai jëja huaji yaye achoyereba güiguë cabi:

—Më'ë yua Ta'yejeiyereba Ëjaguë Riusu Zin sëani, ¿më'ë queaca ro'taguë raqué'ne, Jesús? Më'ëni senreba señë. Yë'ëni bënni senjoñe beoye ba'ijë'ën, güiguë cabi baguë.

²⁹ Jesusbi baguë huati etaye guanseguë sëani, ja'nca güiguë cabi baguë. Baguë huatibi yua baguëni ai hue'nhue yo'oguë baji'i. Ba'iguëna, baru bainbi guënameanbi inni, baguëni gueonza cani yo'ojënnna, baguë èntë sara gueonse'e, baguë guëon gueonse'e, ja'anre ro tëteni si'aguëna, huati hua'ibi ba bainguëre beo re'otona sani bahuë. ³⁰ Ja'nca ba'isi'quë ba'iguëna, Jesús yua baguëni senni achabi:

—¿Më'ë gue mami hue'eguë'ne? senni achabi.
Senni achaguëna:

—Yë'ë ai jai jubë hue'eyë sehuobi, ai jai jubë huati hua'i zemosi'quë sëani. ³¹ Sehuoguëna, ja'nrébi, huati jubë yua Jesusni senreba senni achahuë:

—Ja'an rëi gojena saoni senjoma'ijë'ën yëquénare, cajën sen'ë.

³² Senjëenna, ja'nrébi cubë jabare ëñato, ai jai jubë cuchi hua'na aon ainjën baë'ë. Ba'ijëenna, huati hua'ibi, Yëquénare cuchi jubëna saojë'ën, baguëni senni achajën cahuë. ³³ Cani, Jesusbi bacuare saoguëna, huati hua'ibi ba bainguëte jo'cani sani, cuchi hua'nana cacahuë. Cacajëenna, cuchi hua'na, si'a jubëbi ro ro'tajën, huë'huëjën sani, të'ntëbana tonni, zitarana chani runi huesëhuë.

³⁴ Runi huesëjëenna, cuchi cuiracuabi ëñani, ja'nrébi huaji yëjën, besa huë'huëni sani, si'aruan huë'e jobo ti'añe tëca sani, cuchi runi huesëse'ere quëani achojaë'ë. ³⁵ Quëani achojaijëenna, bainbi ëñajën raë'ë. Jesusna rani, ëñato, huati etoni saosi'quëbi yua Jesús guëon na'mi ca'ncore ñuji'i. Caña yua ju'iguëbi, yua te'e ruiñereba ro'taguë ñuji'i. Ja'nca ñu'iguëna, si'a bainbi ai huaji yëjën ëñahuë. ³⁶ Ëñajëenna, baguë huajë raise'ere ëñasi'cuabi yua bacuani quëahuë. ³⁷ Quëajëenna, si'acua Gerasa yija ba'icuabi ai huaji yëjën, Jesusna ti'anni, Ënjo'onbi gare go'ijë'ën, cajën cahuë. Ja'nca cajëenna, Jesús yua yoguna cacanigo'i bi'rabi. ³⁸ Go'i bi'raguëna, huati hua'ire saosi'quëbi yua Jesusni, Më'ë naconi saza senni achaguë cabi. Caguëna, Jesusbi baguëte sehuoguë cabi:

³⁹ —Ënjo'ona bëani ba'ijë'ën, mami. Më'ë huë'ena go'ini, Riusu conse'e, më'ëni ai re'oye yo'ose'e,

ja'anre coca quëaguë go'ijë'ën, caguë guansebi Jesús.

Caguë guanseguëna, baguë sani, Jesús conni yo'ose'ere si'a bainni quëani achojaj'i.

La hija de Jairo. La mujer que tocó la capa de Jesús

40 Ja'nrebi, Jesús yua go'ini, Galileana ti'anguëna, bain jubëbi baguëni zoe ëjocua sëani, baguëni ai bojojëñ, baguëni saludahuë. **41** Saludajëenna, ñë'ca huë'e ëjaguë Jairo hue'eguëbi raji'i. Rani, Jesusna gugurini rëanni, baguëni caguë senni achabi:

—Yë'ë huë'ena sani, yë'ë zin hua'gore ëñajajë'ën cabi.

42 Baguë zin hua'go gaña hua'go ba'igo, si'a sara samu tëcahuëan bagobi, ai ju'in hua'go baco'ë. Ja'nca caguëna, Jesusbi conguë saji'i. Ma'abi saiguëna, ai bain be'tejëñ baë'ë. Si'a ca'ncoñabi baguëni jë'jejëñ saë'ë.

43 Ja'nca saijëenna, yecobi u'chu rauna si'a sara samu tëcahuëan ju'ingo baco'ë. Ëco yo'ocuana ëñogo ba'igobi bago curire bacuana insini si'agota'an, gare huajë raima'igo baco'ë. **44** Ja'nca ba'igobi bain jubë naconi saigo, Jesús yo'jena ti'anni, baguë can na'mire pa'rogona, u'chu rau te'e jëana tëcabi.

45 Tëcaguëna, Jesús cabi:

—¿Nebi yë'ë can pa'rore'ne? senni achabi.

Senni achaguëna, si'acua, Banhuë cajëenna, Pedro, baguë gajecua naconi, bacua cahuë:

—Ëjaguë, bain hua'nabi si'a ca'ncoñabi më'ëna jë'jejënnna, ¿queaca ro'taguë, Nebi pa'rore'ne senni achaguë'ne? cahuë.

46 Cajënnna, Jesús sehuobi:

—Yë'ë huachose'e huanoguëna, yë'ëni pa'rosi'core cu'eyë yë'ë, cabi.

47 Caguëna, huajë raisi'cobi yua se'e gatiye porema'igo, yua ai huaji yëgo to'ntogo, Jesús guëon na'mina gugurini rëanni, baguëni pa'rose'e, bago te'e jëana huajë raise'e, ja'anre beoru quëago, si'acua ëñajënnna.

48 Quëagona, Jesús cabi:

—Yë'ëni si'a recoyo ro'tago sëani, huajë raë'ë më'ë, mami. Ja'nca ba'igo sëani, bojogo saiјë'ën, cabi.

49 Caguë, yuta cani tëjima'iguëna, ëjaguë Jairo bainguëbi coca quëaguë raji'i. Rani, Jaironi cabi:

—Më'ë zin hua'gobi yua junni huesëgo. Ja'nca sëani, yua mai Ëjaguëre se'e cama'ijë'ën, cabi.

50 Caguëna, Jesusbi achani, Jaironi cabi:

—Oima'ijë'ën. Më'ë recoyo ro'taye se'ga ba'ijë'ën. Bagobi huajë raija'go'co, cabi.

51 Ja'nca cani, baguë huë'ena sani ti'anni, yequëcuare cacaye ënsebi. Pedro, Santiago, Juan, ba romi zingo pë'caguë sanhuë, bacua se'gare baguë naconi sa'nahuëna guaobi. **52** Guaoni, si'a bainbi ba romi zingote aireba oijëñ sa'ntiye gantajëñ yo'ojetna, Jesusbi cabi:

—Mësacua oima'ijë'ën. Romi zingo ju'inmaco'ë. Ro cainsi'cobi uingo bago, cabi.

53 Caguëna, si'acuabi baguëni ai jayajëñ ai chohuë, bago junni huesëse'ere masicua sëani.

54 Ja'nca jayajënnna, ja'nrëbi, Jesús yua romi zingo éntë sarana zeanni, bagoni jéja cabi:

—Huëijë'ën, mami, cabi.

⁵⁵ Caguëna, go'ya rani, te'e jëana huëco'ë. Huëigona, Jesusbi bago bainni, Aon aonjë'ën bagore, caguë guansebi. ⁵⁶ Ja'nca ba'iguëna, bago pë'caguë sanhuëbi ai ëñajëن reïnjëenna, Jesusbi Bago go'ya raise'ere yequëcuani quëama'ijë'ën, caguë cabi.

9

Jesús envía a los discípulos a anunciar el reino de Dios

¹ Ja'nrebi, Jesús yua baguëre yo'o concua si'a sara samucuare choini, huatire etoni saocuare, rau huachocuare, bacuare re'huabi. ² Ja'nca re'huani, bacuani yihuoguë cabi:

—Mësacua yua Riusu ba'i jobona ti'anni ba'ija'yete quëani achojaijë'ën. Rauna ju'incuare huachojë'ën. ³ Mësacua sani, bonse, aon, ja'anre sama'ijë'ën. Ro'ojën sai tubë, turubë, curi, yequë ëntë sara can, ja'anre gare saye ro'tama'ijë'ën. ⁴ Ja'nca sani, mësacuani bojojën ba'icua, bacua huë'ena cacani, ba huë'e jobobi saiye tëca, ba huë'ena bëani ba'ijë'ën. ⁵ Yequëcuabi bacua huë'ena cacaye ënsetoca, mësacuabi ba huë'e jobobi saijsen, ja'anru bainbi ëñajëenna, mësacua guëon ba'i ya'ore cue'nconi tonjë'ën. Bacua gu'aye yo'ose'ere masija'bë cajën, ja'nca yo'ojë'ën, cabi Jesús.

⁶ Cani tëjini, bacuare saoguëna, bacua saë'ë. Si'a huë'e joboñabi saijsen, Riusu bojo güese cocare quëani achojëen, si'a bain rau bacuare huachojëen baë'ë.

Incertidumbre de Herodes

⁷ Ja'nca yo'ojëenna, Galilea ejaguë Herodes hue'eguëbi yua Jesús yo'ose'e si'aye achani, ai

ro'taguë ëñabi. Bain hua'nabi Jesusre cajën, yequëcuabi, Juan Bautizaguë'bi junni go'ya raisi'quëma'iguë, cahuë. ⁸ Yequëcuabi, Riusu ira raosi'quë Elíasbi maina se'e gaje meni ba'ima'iguë, cahuë. Yequëcuabi, Mai ira bain ba'isi'cua Riusu coca casi'cua, ja'ancua'ru ba'ima'iguë. Maina gaje meni ba'ima'iguë, cahuë. ⁹ Cajënnna, Herodes'ga cabi:

—Juanni huani senjo güesehuë yë'ë. Baguë sin-jobëte tëyoye guansesi'quëta'an, ënqueë ¿gue bain-güëguë'ne? Bain hua'nabi baguë ta'yejeiye yo'ore cani achojënnna, yë'ëbi achaguë, ¿guere yo'oye'ne yë'ë? senni achaguë cabi.

Cani, baguë yua quë'rë se'e Jesusna ti'an ëaye yo'oguë, Baguëni ëñaja'ma caguëta'an, poremaji'i baguë.

Jesús da de comer a cinco mil hombres

¹⁰ Ja'nrebi, Jesusre yo'o concua saisi'cuabi raë'ë. Rani, bacua yo'ose'e beoru baguëni quëahuë. Quëajënnna, bacuani cabi:

—Re'oji, mami sanhuë. Raijë'en. Bain be-oruna bëani huajéjaiñu, caguë, bacuare Betsaida huë'e jobo cueñe ba'iruna huëoni sabi. ¹¹ Sani ti'anjënnna, bain hua'nabi bacua sairute masini, Jesusna be'tejën saë'ë. Sani ti'anjënnna, Jesusbi bacuani bojoguë ëñaguë, Riusu ba'i jobona ti'anni ba'iija'yete bacuani quëani achoni, bacua jubë ba'icua rau bacuare huachobi.

¹² Ja'nca yo'oguëna, ënsëguëbi ruajaiguëna, baguëre ta'yejeiye concua si'a sara samucuabi baguëni cueonni cahuë:

—Ëjaguë, bain hua'nare go'i güesejë'ën. Bacua aon, bacua cainru, ja'anre bain ba'iruanna sani cu'eni cainja'bë caguë, bacuare cani go'i güesejë'ën. Beo re'oto'ë ënjo'on, cahuë.

¹³ Cajënnna, Jesús yua bacuani sehuobi:

—Mësacua se'ga aon aonjë'ën bacuare, sehuobi. Sehuoguëna, bacua sehuojën quëahuë:

—Te'e ëntë sara jo'jo aonbëan, samu ziaya hua'i, ja'an se'gare bayë yëquëna. Bacua yua ai jai jubë bain ba'ijënnna, ¿yëquënabi bacuare cuiraye aon cojani raye yëguë më'ë? senni achahuë.

¹⁴ Bain jubëre cuencueto, cinco mil ëmëcua ba'iye'ru baë'ë. Ja'nca senni achajënnna, Jesús yua baguëre yo'o concuani cabi:

—Bain hua'nani jurëan bëa güesejë'ën, cincuenta ba'i jurëan'ru, cabi.

¹⁵ Caguëna, ja'nca yo'oni tëjijënnna, bainbi jurëan bëahuë. ¹⁶ Bëajënnna, Jesusbi ba cinco jo'jo aonbëan, samu ziaya hua'i hua'nare, ja'anre inni, guënamëna mëiñe ñagüë, Riusuni senni surupa cani, aonre jë'jeni, baguëre concuana insibi, Bainni cuirajë'ën caguë. ¹⁷ Ja'nrëbi, si'a hua'nabi yajiye tëca aën'ë. Anni tëjijënnna, Jesusre concuabi aon ainjën jëhuase'ere chiani, si'a sara samu jë'eña bu'iye ayahuë.

Pedro declara que Jesús es el Mesías

¹⁸ Ja'nrëbi, Jesús yua te'eguë ba'iguë, Riusuni ujaguëna, baguëre yo'o concuabi baguëna raë'ë. Raijënnna, bacuani senni achabi:

—Bainbi yë'ëre cajën, ¿gueguëguë'ne yë'ëre, cajën ro'taye'ne bacua? senni achabi.

¹⁹ Senni achaguëna, bacua sehuohuë:

—Yequécuabi cajën, Juan Bautizaguë'ë më'ë cayë. Yequécuabi, Elías ba'iguë'ë më'ë cayë. Yequécuabi, Mai ira bain ba'isi'cua Riusu raosi'cua, ja'ancua ba'iye'ru ba'iyë më'ë cayë. Junni tonni go'ya raisi'quë'ë më'ë cayë, sehuohuë bacua.

²⁰ Sehuojëenna, bacuani se'e senni achabi:

—Mësacua'ga yë'ëre cajën, ¿gueguëguë'ne yë'ëre, cajën ro'taye'ne mësacua? senni achaguë cabi Jesús.

Senni achaguëna, Pedro sehuobi:

—Riusu Raosi'quëreba'ë më'ë. Baguë Cristo'ë më'ë, sehuobi.

Jesús anuncia su muerte

²¹ Ja'nca sehuoguëna, Jesús yua bacuani yi-huoreba yihuoguë guanseguë, Yequécuani yë'ë ba'iyyete quëaye beoye ba'ijë'ën caguë, ²² yua yeque cocare bacuani quëabi:

—Yë'ë, Riusu Raosi'quëreba ba'iguë, ai ja'si huanoñe ba'ija'guë'ë yë'ë. Ira bain, pairi ejacula, ira ba'isi coca ye'yocua, bacuabi yë'ëre ai gu'a güejën, yë'ëni huani senjo güeseja'cua'ë. Huani senjo güesejëenna, samute umuguseña ba'iguëna, yë'ëbi go'ya raija'guë'ë, bacuani cabi Jesús.

²³ Cani ja'nrebi, si'a bainni cabi:

—Bainbi yë'ë naconi te'e zi'inni ba'iye yënicá, bacua ba'iyyete huanë yeni, jo'cani senjoñe bayë. Si'a umuguseña bacuabi crusu sa'cahuëna ju'iñe'ru ba'iye ro'tajën, bacua yëyete gare jo'cani, yë'ë yëye se'gare güeye beoye yo'ojëñ, te'e coñe bayë. ²⁴ Ro bacua ba'iye se'gare ro'tatoca, bacuabi ro huesëni si'ayë. Yë'ë ba'iye se'gare ro'tatoca, bacuabi huajëreba huajëjën ba'iyë. ²⁵ Bacuabi te'e jëana

carajeitoca, ¿queaca ro'tajën, si'a ën yija bayete coni baye ro'taye'ne? ²⁶ Yë'ëre gu'a güegüë senjoñe ro'tatoca, yë'ë coca ye'yose'ere gu'a güegüë senjoñe ro'tatoca, yë'ë'ga Riusu Raosi'quëreba ba'iguë, yë'ë Taita naconi, Riusu guënamë re'oto yo'o concua naconi, ba in rai umugusebi ënsëguë ma'ñoñe'ru quë'rë ta'yejeiye rani, bacuare'ga güegüë senjoja'guë'ë yë'ë. ²⁷ Ganreba yihuoguë, mësacuani quëani achoyë. Ënjo'on ba'icuare ëñato, yequëcuabi Riusu ba'i jobore ëñañe tëca, bacua junni huesëma'iñë, cabi Jesús.

La transfiguración de Jesús

²⁸ Ja'nrebi, te'e ëntë sara samute umuguseña ba'ini, Jesús yua Pedro, Santiago, Juan, bacuare choini, Riusu naconi coca ujañu caguë, bacuare ëmë cubë na'miñona mëabi. ²⁹ Mëani, baguë yua ujaguëna, baguë zia yua tin zia ëñoguëna, baguë cañare ëñato, ai pojeiyereba go'sijei cañare ëñobi. ³⁰ Ëñoguëna, ja'ansirëñ samucua ëmëcuabi gaje meni eta rani, Jesús naconi coca cajën baë'ë. Moisés, Elías, ja'ancua baë'ë. ³¹ Riusu ta'yejeiye go'sijeiyereba ba'ijëñ, bacuabi gaje meni, Jesús naconi coca cajën, baguë junni tonja'ñete cahuë. Riusu re'huase'e sëani, Jerusalén huë'e jobore ba'iguë junni tonja'ñete sa'ñeña cahuë. ³² Ja'nca cajënnna, Pedro sanhuëbi ai ëo caincuata'an, cainmajën, Jesús go'sijeiyete ëñajën, baguë naconi ba'icuare'ga ëñajën baë'ë. ³³ Ja'nca ëñajën, ja'an raisi'cuabi go'ijënnna, Pedro yua Jesusni cabi:

—Ëjaguë, maibi ënjo'on ba'ijënnna, ai re'oye ba'iji. Ja'nca sëani, samute huë'erëanre yo'oñu. Më'ëna te'e huë'erë yo'ocaiyë. Moisesna yequë huë'erë

yo'ocaiyë. Elíasna yequë huë'erë yo'ocaiyë, cabi Pedro.

Ro ro'taguë cabi Pedro. ³⁴ Yuta cani tējima'iguëna, oco picobi nëca meni, si'acuare na'oguëna, Jesusre concuabi ai quëquëhuë. ³⁵ Quëquëjënnä, picobë sa'nahuëbi bain coca achoni raobi:

—Enquë yua yë'ë Zin ai yësi'quëreba'bi. Yë'ë cuencueni raosi'quëre sëani, baguëbi coca caguëna, mësacua achajë'ën, cani achobi.

³⁶ Cani tējiguëna, bacuabi ëñato, Jesús yua te'e hua'guë bají'i. Ja'nca ba'iguëna, bacua yua gare caye beoye ëñahuë. Bacua ëñase'ere ro'tato, yequëcuani gare quëaye beoye baë'ë.

Jesús sana a un muchacho que tenía un espíritu impuro

³⁷ Ja'nrebi, yequë umuguse ñataguëna, bacua ba'i cubëbi gajehuë. Gajejënnä, ai jai jubë bainbi Jesusni tēhuojën raë'ë. ³⁸ Tēhuojën raijënnä, ba jubë ba'iguë te'eguëbi Jesusni güiguë cabi:

—Ejaguë, më'ëni senreba señë yë'ë. Yë'ë zin hua'guë gaña hua'guëre ëña raijë'ën. ³⁹ Gu'a huatibi baguëni hue'nhue yo'oguë, baguëte yijana taonni, yi'obobi chirí mëañe tēca yo'oguë, baguëte ai ja'si güeseye gare jo'cama'iguë ba'iji. ⁴⁰ Ja'nca ba'iguëna, yë'ëbi yua më'ëre yo'o concuana rani, baguë huati etoni saoyete bacuani senni achahuë. Senni achato'ga bacua poremaë'ë, cabi baguë.

⁴¹ Caguëna, Jesusbi bacuani cabi:

—Mësacua yua ro ro'tajën, recoyo gu'aye ro'tajën ba'iyë. ¿Quejei zoe ro ye'yemajën ba'iyëne mësacua? Ro guaja ye'yo coca mësacuani caguë

ba'iyë yë'ë, cani, ja'nrebi, ba bainguëni: Më'ë zin hua'guëre yë'ëna rajë'ën cabi.

42 Caguëna, zin hua'guëbi rai bi'raguëna, gu'a huatibi se'e baguëni hue'nhue yo'oni, baguëte yijana jëjoni taonbi. Taonguëna, Jesusbi ja'an huatini bëinguë cabi:

—Zin hua'guëre etani gare saijë'ën caguëna, ja'ansirën etani gare saji'i.

Ja'nca saiguëna, Jesús yua zin hua'guëre huachoni, baguë pë'caguëna sani, huajë hua'guëre baguëna ëñobi. **43** Ja'nca ëñoguëna, bain hua'nabi ai bojoreba bojojën, Riusu ta'yejeiyereba ba'iyete ai cani achojën baë'ë.

Jesús anuncia por segunda vez su muerte

Ja'nca ai bojoreba bojojën cajëenna, Jesusbi baguëre yo'o concuani coca quëabi:

44 —Mësacua yua yë'ë cocare achajë'ën. Gare huanë yeye beoye achajë'ën. Yë'ë, Riusu Raosi'quëreba ba'iguëna, yequëcuabi yë'ëre gu'a jucha baguëre'ru zeanni, yë'ëre gu'a bainna insini senjojën ba'ija'cua'lë, cabi.

45 Caguëna, baguë case'ere ro huesë ëaye achahuë. Riusu coca yuta masi ëama'iñere sëani, achani masiye ti'anmaë'ë bacua. Ja'nca huesë ëaye achacuabi Jesusni Te'e ruiñe quëajë'ën caye huaji yëhuë bacua.

¿Quién es el más importante?

46 Ja'nrebi, Jesusre yo'o concuabi sa'ñeña cajën, Mai jubë ba'icua ¿gueguëbi quë'rë ta'yejeiye ejaguë ba'iguë'ne? cajëenna, **47** Jesusbi bacuani ëñani, bacua cayete masibi. Masini ja'nrebi zin hua'guëre

choini rani, baguë ca'ncona nécobi. **48** Nëconi, bacuani yihuoguë cabi Jesús:

—Yë'ë ba'iyete ro'tajën, ënquë zin hua'guëni conjën ba'itoca, yë'ëre'ga güina'ru conjën ba'iyë. Yë'ëre conjën ba'itoca, Ja'quë Riusu yë'ëre raosi'quë, baguëre'ga güina'ru conjën ba'iyë. Mësacua jubë ba'icua, quë'rë yo'jereba ba'i hua'guë, ja'anguëbi mësacua jubë quë'rë ta'yejeiye ejaguë ba'ija'guë'bi, cabi Jesús.

El que no está contra nosotros, está a nuestro favor

49 Caguëna, Juanbi baguëni cabi:

—Ejaguë, yequë bainguëni tēhuohuë yëquëna. Më'ë ta'yejeiye ba'iyete caguë, gu'a huati hua'ire etoni saoguë bají'i. Ja'nca yo'oguëna, mai jubë ba'ima'iguëre sëani, baguëre ënsehuë yëquëna, cabi.

50 Caguëna, Jesús cabi:

—Baguëre ënsema'ijë'ën. Maini je'o bama'itoca, maini te'e yo'o conji, cabi Jesús.

Jesús reprende a Santiago y a Juan

51 Ja'nrébi, Jesús güënamë re'otona go'irëñti'anja'ñeta'an ba'iguëna, baguë yua, Yurera Jerusalén huë'e jobona te'e ruiñe saiza caguë, yo'o bi'rabi. **52** Ja'nca yo'oguë, baguë bainre ru'ru saobi. Saoguë, bacuani cabi:

—Yë'ë yure ñami cain huë'ere cu'eni, ja'an bain naconi re'hua coca cajé'ën caguë, bacuare ru'ru saobi.

Saoguëna, bacuabi yua Samaria huë'e jo'borëna sani, cainrute senni achajënnna, **53** Samaria bainbi ënsehuë. Jerusalenna te'e ruiñe saija'guëre sëani, bacua huë'e jobona choiye yëmaë'ë. **54** Yëmajënnna,

Santiago, Juan, bacuabi masini, Samaria bainre bëiñe ro'tajën, Jesusni cahuë:

—Éjaguë, yëquëna hua'nabi guënamë re'otona guansení, toare gachoni, ja'an Samaria bainni éoni si'añu. Riusu ira bainguë raosi'quë yo'ose'e'ru güina'ru yo'oñu cajënná, ¿më'ë queaca ro'taguë'ne? senni achajën cahuë bacua.

⁵⁵ Senni achajënná, Jesusbi bacuani ëñani, bëin coca sehuobi:

—Bañë. Ja'nca yo'oma'ijë'ën. Riusu Espíritubi mësacua naconi ba'iguë, ja'anre yo'oye gare güeji. Ja'nca sëani, mësacua ¿queaca ro'tajën bainre ñu'ñujei güeseye caye'ne? ⁵⁶ Yë'ë, Riusu Raosi'quëreba ba'iguëbi yua bainre ñu'ñujei güeseye gare ro'tama'iguë'ë. Bainre mame recoyo re'huaye, ja'an se'gare yo'oye ro'taguë ba'iguë'ë yë'ë cabi Jesús.

Cani ja'nrëbi, bacuabi conjën, yequë huë'e jobona saë'ë.

Los que querían seguir a Jesús

⁵⁷ Ja'nca sani, ma'aja'an saijen, yequë bainguëni têhuojënná, baguë yua Jesusni cabi:

—Éjaguë, si'a më'ë sairuanna te'e conguë saiza cabi.

⁵⁸ Caguëna, Jesús sehuobi:

—Yë'ë ën yijare ba'iye'ru ba'iye yënicá, raijë'ën. Airu hua'i hua'nabi yija gojeñana caincua'ë. Ca hua'i hua'nabi bacua ziaroanre tuijën caincua'ë. Ja'nca caincuata'an, yë'ë, Riusu Raosi'quëreba ba'iguë yua umeni cainru gare beo hua'guë'ë yë'ë, sehuoguë cabi.

⁵⁹ Cani ja'nrëbi, yequë bainguëni choiguë:

—Yë'ëre te'e conguë raijë'ën, cabi.

Caguëna, baguë sehuobi:

—Éjaguë, yë'ë taita ju'insi'quëni tanjaza ru'ru, sehuobi.

⁶⁰ Sehuoguëna, Jesús yua baguëni cabi:

—Yë'ëni recoyo bojoye güecua, recoyo ju'insi'cua'ru ba'icua, ja'ancua se'gabi bacua bain junni huesësi'cuare tanja'bë. Më'ëca Riusu bojo güese cocare quëani achoguë raijë'ën, cabi Jesús.

⁶¹ Caguëna, ja'nrebi yequëbi Jesusni cabi:

—Éjaguë, më'ëre te'e conguë saiza caguë, ru'ru yë'ë bainna sani gare sai cocare bacuani quëajani raiyë cabi.

⁶² Caguëna, Jesús sehuobi:

—Riusu yo'ore coñe porema'iñë më'ë. Yë'ë yo'ore conza cani, ja'nrebi yequë yo'ore yo'oye ro'tatoca, gu'aji, sehuobi Jesús.

10

Jesús envía a los setenta

¹ Ja'nrebi jë'te, Jesusbi yequë bain setentacuare cuencueni, baguë coca quëani achocuare re'huani, samucua ba'i jurëanre quë'ñeni, si'a huë'e jo'borëan baguë ñaguë saijai joboñana bacuare sao bi'rabi Jesús. Sao bi'raguë, bacuani yihuoguë ² cabi:

—Mësacua yua saijën, ën cocare ro'tajëن ba'ijë'ën. Ja'quë Riusubi ai aonre tëani baye'ru tëani baye ro'taguëta'an, aon tëaja'cua yua choa jubë se'ga ba'iyë. Ja'nca sëani, Riusuni ujajën, Ja'quë, më'ë cocareba quëani achojaicua quë'rë jai jubëre huëoni re'huani raojë'ën. Më'ë aon tëani

baja'cua ba'iye'ru më'ë bain ba'ija'cuare ñë'coni
re'huaja'bë cajën, Ja'quë Riusuni jo'caye beoye
ujajën ba'ijë'ën. ³ Mësacua yua yë'ë cocare quëani
achojën, èñere'ga ro'tajën ba'ijë'ën. Mësacua yua
jo'ya hua'na ba'iye'ru ba'icuareta'an, airu yai
jobona saoye'ru mësacuare saoyë yë'ë. ⁴ Mësacua
yua turubë, curi ayabë, guëon jui coro, ja'anre
gare sama'ijë'ën. Te'e ruiñe se'ga saijën, ma'ana
tëhuocuare gare saludamajën, te'e ruiñera saijë'ën.
⁵ Sani, ja'nërëbi bain huë'ena ti'anni, bainre
saludajën, “Ën huë'e ba'icua yua bojobjen ba'ijë'ën”
cajë'ën. ⁶ Cajënnna, mësacuani bojobjen sehuotoca,
bacuani bojobjen ba'ijë'ën. Bojobjen sehuoma'itoca,
bacuani bojomaiñe cani, ja'nërëbi jo'cani se'e
saijë'ën. ⁷ Bojobjen sehuocua huë'ena ti'anni, ja'an
huë'ena bëani ba'ijë'ën. Bacuabi cuirajënnna, bacua
aon, bacua gono, Riusu insise'ere sëani, coni
ainjën, bacuani bojobjë'ën. Ja'an huë'e jobore
ba'ijëen, ja'an huë'e se'gare ba'ijë'ën. Yequë
huë'eñana cainjën saima'ijë'ën. ⁸ Ja'nca sëani,
mësacuabi bain ba'iruna ti'anni, mësacuana bojobjen
ba'icuana cacani ba'ijëen, bacua aonre ainjën,
⁹ bacua rau ju'incuare huachojën, bacuani
quëani achojë'ën: Riusu bainrebare re'huani
baja'yete cato, yua te'e jéana ti'anja'ñeta'an ba'iji,
quëani achojën ba'ijë'ën. ¹⁰ Ja'nërëbi, yequë huë'e
jobona ti'anni, mësacuani bojomai'toca, bacua
huë'e joboreba ba'iruna sani, si'acuani bëin coca
cajë'ën: ¹¹ Mësacuabi yequënanai bojomai'cuare
sëani, mësacua huë'e jobo ya'o së'ase'ere yëquëna
guëoñabi cue'nconi tonni gare jo'cayë ënjo'on.
Ja'nca yo'ojënnna, mësacua yua ën cocare ro'tajë'ën:

Riusu bainrebare re'huani baja'yete cato, yua te'e jéana ti'anja'ñeta'an ba'iji. Ja'anre cajén, bacua bënni senjoja'ñete bacuani masi güesejé'en. ¹² Ja'an umuguse, Riusu cuencuesi umuguse ti'anguëna, Sodoma bainni bënni senjose'e'ru quë'rë ta'yejeiye bënni senjosí'cua ba'ija'cua'ë bacua, cabi Jesús.

Los pueblos desobedientes

¹³ Cani ja'nrëbi, yequë huë'e joboña bainni bënni senjoja'ñete quëa bi'rabi Jesús:

—Corazin huë'e jobo bain, Betsaida huë'e jobo bain, mësacua yua ai yo'ojén ba'ija'cua'ë. Riusu ta'yejeiye yo'ose'e, mësacuani ëñose'e, ja'anre Tiro bain, Sidón bain, ja'ancuani ëñoguë ba'itoca, bacua yua ai zoe ba'irën bacua gu'a juchare gare jo'cani senjore'ahuë. Bacua yua ai sa'ntiye ai oijén, costal cañare sayani, yë'tëbi inni, bacua sinjobëna yu'yujén ba'ire'ahuë. ¹⁴ Ja'nca sëani, Riusu cuencuesi umuguse ti'anguëna, Riusubi mësacuani ëñani, Tiro, Sidón, ja'an huë'e jobo bainni bënni senjoja'ñe'ru mësacuani quë'rë ta'yejeiye ai bënni senjoguë ba'ija'guë'bi. ¹⁵ Mësacua Capernaum bainre'ga ai bënni senjoja'ñete quëayë yë'ë. Mësacuabi ro'tajén, Riusu ba'i re'otona ti'anja'cua'ë mai, cajén ba'icuareta'an, ja'an jai toa se'gana ti'anja'cua'ë mësacua, cani jo'cabi Jesús.

¹⁶ Ja'nrëbi baguëre concuani se'e caguë quëabi Jesús:

—Si'a hua'na mësacua cocare te'e ruiñe achacuabi yë'ë cocare'ga te'e ruiñe achayë. Si'a hua'na, mësacuare gu'a güeni senjocuabi yë'ëre'ga gu'a güeni senjoñë. Si'a hua'na, yë'ëre gu'a

güeni senjocua'ga Ja'quë Riusu yë'ëre cuencueni raosi'quëre'ga gu'a güeni senjoñë, cabi.

Regreso de los setenta

¹⁷ Ja'nca cani tonni, baguë bain setentacuare saobi. Saoguëna bacuabi sani, baguë case'ere yo'oni, ai bojo hua'na rani, Jesusni quéahuë:

—Éjaguë, yëquënabi më'ë ta'yejeiye ba'iyete cani achojën, si'a yo'ore ta'yejeiye yo'oye porehuë. Gu'a huati hua'i'ga yëquëna cocare achajën, yëquëna case'ere achani yo'ohuë, cajën bojohuë.

¹⁸ Cajën bojojënnä, Jesusbi quëabi:

—Ja'nca raë'ë. Zupai huati'ga guënamë re'otore ba'iguë, mëjo jue'neñe'ru te'e jëana tonni huesëguëna, éñahuë yë'ë. ¹⁹ Ja'nca sëani, mësacua achajë'en. Yë'ëbi mësacuare sao bi'raguë, ai ta'yejeiye ba'icuare mësacuare re'huahuë. Aña hua'na, buni hua'na, ja'an hua'nana za'nguto, gare ja'si yo'oma'iñë bacua. Zupai huatibi ta'yejeiye je'o baguëna, mësacuabi, baguëni quë'rë ta'yejeiyereba yo'oni, baguëre saoni senjoñë poreyë. Ja'nca porejënnä, gare ja'si yo'oye beoye ba'iji mësacuare. ²⁰ Ja'nca porecua ba'ijën, zupaire concuabi mësacuare achani yo'ojënnä, ja'anre ro'tajën bojomajën ba'ijë'en. Mësacua mami yua Riusu uti pëbëna toyani jo'case'e ba'iguëna, ja'an se'gare ro'tajën, ja'an se'gare bojojën ba'ijë'en, cabi Jesùs.

Jesús se alegra

²¹ Ja'nca cani, Riusu Espíritu naconi bojo recoyo re'huani, ai bojoreba bojoguë, Riusuni ujaguë cabi:

—Taita Riusu, më'ëbi guënamë re'oto, yija re'oto, si'aye re'huani baguëna, më'ëni ai bojoreba bojoguë cayë yë'ë. Ro bain cocare ta'yejeiye ye'yeni masicuabi më'ë masi güeseyete masiye yëcuareta'an, bacuani masi güesemaë'ë më'ë. Zin hua'na ro'taye'ru ro'tacua, bacua se'gani më'ë ba'iyete masi güesehuë më'ë. Aito, Taita. Më'ë yëse'e sëani, ja'nca bacuani masi güesehuë më'ë, ujaguë cabi Jesús.

22 Ja'nca ujani, baguëre concuare quëabi:

—Yë'ë Taita Riusubi si'aye yë'ëna insini jo'cabi. Yë'ë Taita se'gabi yë'ëre, baguë Zinre masiji. Yequëcuabi yë'ëre gare huesëyë. Yë'ë se'gabi yë'ë Taita Riusuni masiyë. Yequëcuabi baguëte gare huesëyë. Yë'ë, baguë Zin sëani, yë'ë yëye'ru yo'oguë, yequëcuani yë'ë Taita ba'iyete masi güeseye poreyë. Ja'nca masi güeseguëna, bacua se'gabi baguëni masiyë, cabi Jesús.

23 Ja'nrebi baguëre yo'o concuare ëñani, bacua se'gani ñaca quëabi Jesús:

—Mësacua yua yë'ëni ëñajën, yë'ë yo'o yo'oyete ëñajën, bojoreba bojojën ba'ijë'ën. **24** Riusu ira bain raosi'cua, bain ta'yejeiye ejacua, bacua yua yë'ë, Riusu Raoja'guëreba ba'iguëte ëñani masiye yëcuata'an, yë'ëre ëñamaë'ë. Yë'ë cocare achaye yëcuata'an, yë'ëre achamaë'ë. Mësacuaca yë'ëre ëñani, yë'ëre achani, yë'ëni masicua sëani, ai bojoreba bojojën ba'ijë'ën, cabi Jesús.

Parábola del buen samaritano

25 Caguëna, ja'nrebi ira coca toyani jo'case'ere ye'yoguëbi ti'anni, Jesusni huacha sehuo güeseza caguë, baguëni coqueguë senni achabi:

—Ëjaguë, Riusu naconi carajekiye beoye si'arën ba'iye yëyë yë'ë. Ja'an ba'ija'yete baza caguë, ¿gue yo'o yo'oye baye'ne yë'ë? senni achabi.

26 Senni achaguëna, Jesús sehuobi:

—Riusu ira coca toyani jo'case'ere ñaguë, ¿guere ye'yeguë'ne më'ë? ¿Gue coca cani jo'case'e ba'iguë'ne? senni achaguë sehuobi.

27 Sehuoguëna, ba hua'guëbi cabi:

—Ja'an cocare ñiñato, ñiaca caji: “Më'ë Ëjaguë Riusuni si'a recoyo bojoguë, baguëni ai yëreba yëguë ba'ijë'ën. Më'ë ba'iye, më'ë ro'taye, ja'an naconi si'a jëja ta'yejekiye baguëni yëreba yëjë'n ba'ijë'ën. Më'ë ba'iyete te'e ro'taguë ba'iye'ru më'ë te'e bain hua'nani re'oye ro'taguë, bacuare yëreba yëguë ba'ijë'ën.” Ja'anre caji Riusu ira coca toyani jo'case'e, caguë sehuobi baguë.

28 Sehuoguëna, Jesús cabi:

—Te'e ruiñera sehuohuë më'ë. Ja'an cani jo'case'e'ru yo'otoca, Riusu naconi carajekiye beoye ba'ija'guë'ë më'ë, cabi Jesús.

29 Caguëna, ira coca ye'yoguëbi ja'ansi'quë ro'taguë, Bain hua'nabi yë'ë cocare achani, yë'ë masiye ro'tayete masija'bë caguë, Jesusni se'e senni achabi:

—Më'ëbi te'e bainre caguëna, ¿jarocua'ne? senni achabi baguë.

30 Senni achaguëna, Jesusbi ye'yo cocare quëaguë, baguëni sehuobi:

—Yequë bainguëbi Jericó huë'e jobona saza caguë, Jerusalenbi saiguëna, ja'nrebi bonse jiancuabi baguëni tëhuo rani, baguëni zeanni, baguë bonse, baguë caña, si'ayete tëteni, baguëni ai ja'si yo'oni, baguëni huani ya'tu güeseni, baguëte

ju'in hua'guëre jo'cani senjoni saë'ë. ³¹ Senjoni satena, ja'nrébi pairi hua'guëbi ja'ansi ma'abi saiguë, ju'in hua'guëna ti'anni ñaguë, ca'nco quëhuijani saji'i. ³² Saquëna, ja'nrébi Riusu huë'e yo'o conguë Levita bainguë'ga ti'anni ñaguë, baguë'ga ro ca'nco quëhuijani saji'i. ³³ Saquëna, ja'nrébi Samaria bainguë tin jobo bainguëbi ti'anni ñaguë, baguëca Chao hua'guë caguë, ju'in hua'guëni ai oire baguë, baguëre coñe se'ga ro'tabi. ³⁴ Ja'nca ro'taguë, Baguë ja'si nesiruanre re'huaza caguë, hui'yabe, jo'cha, ja'anbi ja'ñeni, canbi re'oye huenbi. Huenni, baguë burro hua'guëna tëoni, bain cain huë'ena sani, baguëre cuira bi'rabi. ³⁵ Cuirani ñatani, ja'nrébi samu curi so'corëanre inni, ba huë'e ñaguëna insini cabi: “Enquëre re'oye ñaguë cuirajë'en. Quë'rë se'e ro'iyé banica, yë'ëbi se'e rani, më'ë ro'ise'ere go'yayë” cabi baguë, caguë quëabi Jesús. ³⁶ Quëani, Jesús yua baguëni senni achabi:

—Më'ë yua ñaguëre ro'tani quëajë'en. Ya'tu güesesí'quëbi ma'are uinguëna, ñjaroguëbi baguëni ñaguë, baguë te'e bainre yo'oye'ru yo'oguë'ne? ¿Queaca ro'taguë'ne më'ë? senni achabi Jesús.

³⁷ Senni achaguëna, ira coca ye'yoguëbi sehuobi:

—Baguëni ai oire baguë consi'quë, ja'anguë baj'i'i. sehuobi.

Sehuoguëna, Jesús cabi:

—Ja'anguë baj'i'i. Ja'nca ba'iguëna, më'ë'ga güina'ru sani, bainre güina'ru oire baguë conguë ba'ijë'en, cabi.

Jesús en la casa de Marta y María

³⁸ Ja'nrébi, Jesusbi se'e sani, baguëre concua naconi yequë huë'e jobona ti'anguëna, Marta hue'egobi baguëte choigona, bago huë'ena cacani èñabi. ³⁹ Cacani èñaguëna, yeco, María hue'ego, Marta yo'jego ba'igobi Jesús cocare achani ye'yeza cago, baguë guëon na'mi ca'ncona bëani achago baco'ë. ⁴⁰ Achago ba'igona, Martabi bago yo'o ma'caréanre zoe yo'oni ya'jani, Jesusna bonëni cago:

—Éjaguë, yë'ë yo'jegobi ro cue'yoni, huë'e yo'o ma'caréanre comma'igona, yë'ë se'gabi yo'oye porema'iñë. Ja'nca sëani, ¿yë'ëre coñe bagoni guanseye ro'tama'iguë më'ë? cago.

⁴¹ Cagona, Jesús sehuobi:

—Marta, Marta, ai sa'nti hua'go cayë më'ë. ⁴² Yë'ë cocarebare achani ye'yetoca, re'oye ba'iji. Maríaca yë'ë cocare ja'nca te'e ruiñe achani ye'yegona, bagore gare ènsema'iguë ba'iyë yë'ë. Ja'an cocare bojogona, yequëcuabi bagoni gare sa'nti güeseye beoye ba'ija'cua'ë, caguë sehuobi Jesús.

11

Jesús y la oración

¹ Ja'nrébi, yequë umuguseña ba'iguëna, Jesusbi sani, Riusuni ujaguë, coca senni tëjiguëna, baguëre yo'o con hua'guëbi baguëni senni achabi:

—Éjaguë, yëquënani ujaye ye'yojë'ën. Juanbi baguëre yo'o concuani ujaye ye'yoguëna, yëquënare'ga güina'ru ujaye ye'yojë'ën senni achabi.

² Senni achaguëna, Jesús cabi:

—Mësacuabi Taita Riusuni ujanica ñaca ba'kiye cajë'ën:

Yéquëna Taita, quënamë re'otore ba'iguëna, si'a bainbi më'ë ta'yejeiyereba ba'iyete te'e ruiñe ro'tajëñ ba'ija'bë.

Më'ë bainreba jobore re'huaguë, yéquënaré te'e jéana ëño raijë'ën.

Më'ë guënamë re'oto ba'icuabi më'ë yëye'ru yo'ojetna, ën yija bain'ga më'ë yëye'ru güina'ru yo'ojetna ba'ija'bë.

³ Yéquëna aon aiñe, yure umuguse aiñe se'gare insijë'ën.

⁴ Yéquëna gu'aye yo'ojetna ba'ise'ere huanë yeni ro'tama'ijë'ën.

Yequëcuabi yéquënani gu'aye yo'ojetna, bacua gu'aye yo'ose'ere huanë yeye cani se'e ro'tamaë'ë yéquëna.

Ja'nca ro'tamajëtna, më'ë'ga yéquënani güina'ru yéquëna gu'aye yo'ose'ere ro'tama'iguë ba'ijë'ën.

Yéquënani gu'aye yo'oye ro'ta güesema'ijë'ën.

Ja'anre yéquënaré etojei güesejë'ën, cabi.

⁵ Cani, bacuani se'e yeque cocare ye'yo bi'rabi Jesús:

—Yequë bainguë yo'ose'ere ro'tajë'ën. Ñami jobo ba'iguëna, baguë gajeguëbi ëñaguë raiguëna, aon beoguëna, baguëte cuirayete. Ja'nca beoguëbi yequë baguë gajeguë huë'ena sani, baguëni senni achaguëña: “Besa, samute jo'jo aonbëanre prestajë'ën. ⁶ So'o bainguëbi yë'ë huë'ena ti'anguëna, baguëni aon cuiraye beoyë yë'ë” caguë quëaguëña. ⁷ Caguë quëaguëna, baguë

gajeguë huë'e sa'nuahuë ba'iguëbi sehuoguëñä: "Porema'iñë. Anto sa'røre ta'pini tējihuë yë'ë. Zin hua'na naconi yua cain umesi'cua sëani, huëni insiye porema'iñë yë'ë" sehuoguëñä.

⁸ Ja'nca sehuoguëña, hue'se nëcaguëbi jo'caye beoye se'e senni achaguëña, baguë gajeguëbi, Yë'ëre se'e hui'ya senma'ija'guë caguë, baguë yua huëni, baguë yëse'e insiguëñä. ⁹ Ja'nca insisi'quë sëani, mësacuare güina'ru quëayë yë'ë. Mësacua yëyete senreba sentoca, Riusubi insija'guëbi. Jo'caye beoye ujajënnä, Riusubi ai masiye sehuoja'guëbi. Riusuni recoyo te'e zi'inni baza catoca, Riusubi baguë ba'iyete mësacuani masireba masi güeseja'guëbi. ¹⁰ Ën yija bain senreba señe'ru Riusuni senni achajën ba'ijë'ën. Ën yija bainbi si'a jëja sentoca, bacua bainbi insiyë. Si'a jëja cu'etoca, bacuabi tinjañë. Si'a jëja je'njuni achotoca, bacua bainbi anconi caca güeseyë.

¹¹ Mësacua'ga ën cocare achani ye'yejë'ën. Mësacua zin hua'nabi ziaya hua'ire sentoca, ¿añare insiye mësacua? Bañë. ¿Jo'jo aonbëte sentoca, gatabëte insiye mësacua? Bañë. ¹² ¿Cura ziare sentoca, bunire insiye mësacua? Bañë. ¹³ Mësacua yua gu'aye yo'oye ye'yesi'cua ba'ijëñ, mësacua zin hua'nani re'oye insini cuiraye masijënnä, mai Taita Riusu guënamë re'otore ba'iguëbi quë'rë ta'yejeiye maini conni cui rareba cui raye masiji. Maibi baguë Espíritu rao yete sentoca, gare ënseye beoye maina raoji Riusu, cabi Jesùs.

Acusan a Jesús de recibir su poder del demonio

¹⁴ Ja'nrebi jë'te, Jesusbi yi'o ma'tëbë bainguëni tēhuoni, baguë gu'a huatire etoni saoguë baji'i.

Etoni tējiguëna, ja'an bainguëbi coca ca bi'rabi. Coca caguëna, bain hua'nabi ai bojoreba bojojën éñahuë. **15** Éñajënn, yequëcua'ga ai jayajën cahuë:

—Huati hua'i ejaguë Beelzebú hue'eguë, ja'anguëbi conguëna, Jesusbi huati hua'ire etobi'te, jayajën cahuë.

16 Cajënn, yequëcua'ga Jesusni huacha sehuo güeseñu cajën, baguëni ñaca senni achahuë:

—Ta'yejeiyereba yo'ore yo'ojë'ën. Éñaza, senni achajën cahuë.

17 Ja'nca gu'aye cajënn, Jesusbi bacua ro'tayete masiguë, bacuani sehuobi:

—Te'e yija bainbi si'a jurëanre re'huani sa'ñeña guerra huatoca, si'a jubé gare ñu'ñujeiñë. Te'e huë'e bainbi sa'ñeña je'o batoca, si'acua gare ñu'ñujeiñë. **18** Ja'nca sëani, zupai jobobi güina'ru sa'ñeña huatoca, güina'ru jëja beoguë carajeiji. Mësacuabi jaya coca cajënn, ja'nca sehuoyë yë'ë. Yureca Beelzebubi ¿queaca yë'ëre conguë'ne? **19** Mësacua bain'ga huati hua'ire etoni saojënn, ñjaro ejaguëbi ta'yejeiye conguë'ne? Bañë. Mësacuabi yë'ëre jayajën cajën, mësacua ro huacha cayete si'acuani masi güeseyë. **20** Riusu se'gabi yë'ëre conguëna, huati hua'ire etoni saoyë yë'ë. Ja'nca conguëna, baguë bainrebare re'huani baja'yete ro'tajë'ën. Te'e jëana ti'anja'ñeta'an ba'iji.

21 Én cocare'ga ro'tani, Riusu ta'yejeiye ba'iyete masijë'ën. Yequë bainguë ai jëja baguëbi baguë hua guëna naconi baguë huë'ere re'oye éñaguëna, yequëcuaabi tëani saye porema'iñë. **22** Yequë'ga baguë'ru quë'rë jëja baguëbi baguë huë'ena ti'anni, baguëni quë'rë ta'yejeiye huani saoni senjotoca,

baguë huë'ena cacani, baguë hua guëna, baguë bonse beoru tëteni sani, baguë bainna huo'hueni insiji.

23 Yureca, yë'ëre re'oye ëñama'icua ba'itoca, yë'ëni gu'aye ro'taye se'ga ba'iyë. Yë'ëre yo'o comma'icua ba'itoca, yë'ë re'huase'ere ro ñu'ñu güesejani senjoñë.

El espíritu impuro que regresa

24 Ën cocare'ga ro'tani, bain gu'ajeiyete ye'yejë'ën. Gu'a huatibi bainguëte etani saiguë, beo re'otona ganiguë, ¿jarona bëani huajéyë'ne yë'ë? caguë, cu'eni jëhuani, se'e ro'tani, Yë'ë etasi huë'ena goza cabi. **25** Ja'nca cani, baruna go'ini ëñato, yua re'oye re'huasi huë'e, yua re'oye yuase'e bají'i, bainguë recoyo. **26** Ja'nca ba'iguëna, baguë yua se'e sani, baguë gu'a gajecua te'e éntë sara samucuare tëhuoni choji'i. Baguë'ru quë'rë ta'yejeiye gu'aye ba'icuani choini, rani, si'a jubëbi ba etasi huë'ena cacani bëahuë, bainguë recoyona. Ja'nca bëani ba'ijënnä, ja'an bainguë yua quë'rë ta'yejeiye ai gu'ajeiguë bají'i. Ru'rureba ba'ise'e'ru quë'rë ta'yejeiye gu'aguë bají'i, ye'yoguë cabi Jesús.

La felicidad verdadera

27 Ye'yoguë caguëna, romi hua'go bain jubë naconi ba'igobi baguëni coca güigo cago:

—¡Më'ë pë'cagobi më'ëni të'ya rani, më'ëni chuchasi'co sëani, ai bojoreba bojogo ba'ija'go! güigo cago.

28 Güigo cagona, Jesús seuobi:

—Riusu cocare achani te'e ruiñe yo'ocua'ga bago bojoye'ru quë'rë ta'yejeiye ai bojoreba bojojën ba'ija'cua'ë, caguë sehuobi.

La gente mala pide una señal milagrosa

²⁹ Ja'nca sehuoni, bain hua'nabi quë'rë jai jubë ñë'cajënnä, bacuani coca quëa bi'rabi:

—Yureña bainbi ai gu'aye ro'tajën, yë'ëni senni achajën, Ta'yejeiyereba yo'ore yo'oje'ën. Ëñaza, senni achajën cajënnä, Riusu ira raosi'quë Jonás hue'eguë, baguë ba'ise'e se'gare yureña bainni masi güeseyë yë'ë. ³⁰ Jonás yua Nínive huë'e jobo bainna raosi'quë ba'ise'e'ru yë'ë'ga, Riusu Raosi'quëreba ba'iguë, yureña bainna raosi'quë'ë yë'ë. ³¹ Yecore'ga, ira baingo ba'isi'co, sëribë ca'nco bain ta'yejeiye ejago ba'isi'core ro'tani, Riusu bënni senjoja'ñete masijë'ën. Bain ta'yejeiye ejaguë Salomonbi ai masiguë yihuoguëna, bagobi Salomón masiguë yihuo cocare achani masijaza cago, ai so'o sani baguëna ti'anni achagoña. Ja'nca achani masisi'core sëani, mësacua yua bago yo'ogo ba'ise'ere ro'tani, yë'ë cocareba yureña quëani achose'ere quë'rë te'e ruiñe achani ye'yejën ba'ijë'ën. Achaye güetoca, yë'ë yua Salomon'ru quë'rë ta'yejeiyereba masiguë sëani, Riusubi mësacuani quë'rë ta'yejeiye bënni senjoguë ba'ija'guë'bi. ³² Riusu cuencuesi umuguse ti'anguëna, Nínive huë'e jobo bainre'ga ëñaja'cua'ë mësacua. Bacua yua Jonás coca quëani achose'ere achani, bacua gu'a juchare jo'cani senjoreña. Yureña'ga yë'ëbi ti'an rani, Riusu cocarebare quëani achoguëna, mësacua yua achaye güetoca, ai ta'yejeiyereba bënni senjosi'cua ba'ija'cua'ë

mësacua, yë'ë yua Jonas'ru quë'rë ta'yejeiye ba'iguë sëani.

La lámpara del cuerpo

³³ Mësacua yua te'e ruiñe yo'ocua ba'iye yénica, ñen cocare achani ye'yejë'en. Bainbi majahuëte zëonni, ro'rohuëbi meñe jaoni ta'pima'icua ba'iyë. Majahuëte gare yahueye beoye ba'iyë. Bain ti'ancuabi, re'oye éñaja'bë cajëن, majahuëte zëonni émëna reoyë. ³⁴ Mësacua ñaco yua mësacua recoyo majahuë'ru ba'iji. Mësacua ñacobi éñajëن, te'e ruiñe yo'oye ro'tatoca, si'a recoyo miañereba miaji. Gu'aye yo'oye ro'tatoca, si'a recoyo yua zijkei recoyo'ru ruinji. ³⁵ Ja'nca sëani, mësacua éñare bajëن, te'e ruiñe ro'tajëن ba'ijë'en. Ja'nca ro'tama'itoca, gu'a éase'e se'gare ro'tatoca, zijkeiye se'ga ba'iji mësacua recoyore. ³⁶ Si'a recoyoreba te'e ruiñe ro'tajëن ba'itoca, gare zijkeiye beoye ba'itoca, mësacua yua gare jo'caye beoye te'e ruiñereba masini re'oye yo'oye se'ga ba'iyë. Majahuë re'oye miañe'ru te'e ruiñe éñani, te'e ruiñe masini yo'oye porecua'ru ruiñë mësacua, yihuoguë cabi Jesús.

Jesús acusa a los fariseos y a los maestros de la ley

³⁷ Cani tējiguëna, fariseo bainguëbi baguëni choiguë, Yë'ë huë'na sani, yë'ëre aon aiñe conjë'en caguë choiguëna, Jesusbi te'e conguë saji'i. ³⁸ Sani ti'anni, fariseo bain yo'oye'ru yo'oma'iguë, baguë éntë sarañare bacua zoaye'ru zoamaquëna, baguëre choisi'québi gu'aye ro'taguë éñabi. ³⁹ Ja'nca éñaguëna, Éjaguë Jesusbi baguëni cabi:

—Mësacua fariseo bainbi guëna ro'rohuëanre zoajën, guërëbë ca'nco se'gare zoacua ba'iyë. Sa'nahuë ca'ncore zoaye ro'tama'icua ba'iyë. Güina'ru, mësacua recoyo gu'a recoyoreba se'ga ba'iyë. Ro gu'aye ro'tajën, bain bayete ro tëteni bajën, ⁴⁰ mësacua ¿queaca ro'tajën, ro huesë ëaye yo'ojën ba'iyë'ne? Mësacuabi ëmëje'en ca'nco se'gare ëñajën, Yë'ë ga'nihuë Riusu re'huani jo'case'ere sëani, re'oye zoani re'huaza cajën, mësacua ¿queaca ro'tajën, mësacua recoyo re'oye re'huani, Riusu yëyete yo'oma'iñe'ne? ⁴¹ Mësacua yua bonse beo hua'nana insijën, Riusu yëye'ru bacuana ro insiñu cajën, ro yo'omajën ba'ijë'ën. Mësacua recoyo oire bajën, Bacuana te'e ruiñe conñu cajën, Riusu yëyete yo'ojën, bacuani te'e ruiñe conjën ba'ijë'ën.

⁴² Mësacua fariseo bain gu'aye yo'ojënnna, Riusubi mësacuani ai bënni senjoja'guëbi. Mësacua yua Riusu coca cani jo'case'ere te'e ruiñe yo'oñu cajën, mësacua ma'ña sëñete inni, décima parte ba'iyete cuencueni, Riusu cani jo'case'e'ru cuencueni, baguëna insiyë mësacua. Ja'nca insicuata'an, Riusu yëye'ru te'e ruiñe yo'omajën, Riusuni gare yëye beoye ba'icua'ë mësacua. Ja'anre quë'rë ta'yejeiye ro'tajën, mësacua cuencueni insiye'ru yo'ojën, quë'rë ta'yejeiye yo'ojën, Riusuni si'a recoyo yëjën ba'ijë'ën.

⁴³ Mësacua fariseo bain gu'aye yo'ojënnna, Riusubi mësacuani ai bënni senjoja'guë'bi. Mësacua yua bain ñë'ca huë'ena sani, ëja bain ñu'i seihuë se'gana bëaye yëyë. Mësacua yua huë'e joborebana sani, bain saludayete ëjojën, Ëja bainre saludaye'ru

yë'ëre saludaja'bë cajën, ëjoyë mësacua.

44 Mësacua ira coca cani jo'case'ere ye'yocua, mësacua fariseo bain, si'acuabi re'o bain ba'iye'ru ro coquejën ëñojënna, Riusu bënni senjoñe se'ga ba'ija'guë'bi mësacuare. Bain tansiruan se'ga'ru ba'iyë mësacua. Ro ëmëje'en ca'nco se'gare re'oye ëñocuata'an, ai ënto sëñe se'ga ba'iyë, sa'nahuë ca'ncore. Bain hua'nabi ëmëje'en ca'nco se'gare ëñajën, Bain tansiruan ai re'oye ëñoji cajën, mësacua gu'a recoñoa ba'iyete ro huesë ëaye ëñañë, bëinguë cabi Jesús.

45 Caguëna, ira coca cani jo'case'ere te'e ruiñe masiguëbi Jesusni cabi:

—Ëjaguë, më'ëbi ja'an cocare caguë, yë'ë, yë'ëre conjën ba'icuare'ga caguë, yëquënare gu'aye achoye cayë më'ë, cabi.

46 Caguëna, Jesús sehuobi:

—Aito. Mësacua, ira coca cani jo'case'ere te'e ruiñe masicuare'ga ai bënni senjoja'guë'bi Riusu. Mësacua yua bain hua'nani ai guaja yo'o güesecuata'an, mësacuabi güina'ru yo'oye beoye ba'ijën, bacuani gare commajën ba'icua'ë.

47 Mësacuabi ai gu'aye ro'tajën ba'ijënnna, Riusubi mësacuani ai bënni senjoñe ba'ija'guë'bi. Riusu ira bain cuencueni raosi'cua tansiruanre re'oye re'huajën, re'oruan ëñoja'guë cajën, bojobjen yo'ojënnna, Riusubi bëinji. Mësacua ira bain ba'isi'cuabi Riusu bain raosi'cuani huani senjosí'cuare sëani, mësacua yua bacua ro'tajën ba'ise'e'ru güina'ru gu'aye ro'tajën ba'iyë. **48** Mësacua yua ja'an bain tansiruanre re'oye re'huajën, mësacua ira bain ba'isi'cua huani senjose'ere re'oye ro'tajën, bacua ro'tajën

ba'ise'e'ru te'e ro'tacua'ru ëñõñë mësacua. Bacuabi Riusu bainni huani senjos'i'cua ba'ijënnä, mësacua yua Riusu bain tansiruanre re'oye re'huajëñ, güina'ru gu'aye yo'ocua'ru ëñõñë mësacua.

49 Riusubi mësacua yo'ojën ba'ija'yete te'e ruiñë masiguë sëani, ñaca cani jo'cabi: “Yë'ëbi yë'ë coca cani achocua, yë'ë ta'yejeiye yo'ore concua, ja'ancuare re'huani, bainna saoguëna, bain hua'nabi ro cue'yoni, bacuani ro je'o bajëñ, yequëcuare ja'si yo'ojën, yequëcuare huani senjoja'cua'ë” cani jo'cabi Riusu. **50** Ja'nca cani jo'casí'qué sëani, baguë bain cuencueni raosi'cuare ro'taguë, baguë ën yija re'huani jo'casirënbì raosi'cua huani senjos'i'cua ba'ijënnä, yureña bain gu'aye yo'ose'e ba'iji caguë, mësacuani sehuoye senja'guë'bi Riusu. **51** Baguë ira bainguë raosi'qué Abel hue'eguë, baguë huani senjose'ere ro'taguë, si'a jë'te raosi'cua huani senjose'ere ro'taguë, baguë bainguë Zacarías ba'isirëñ téca raosi'cua, si'acuare huani senjojënnä, mësacuani sehuoye senja'guë'bi Riusu. Zacarías hue'eguë ba'isi'quére cato, baguë yua misabë ca'ncorëte nëcaguëna, mësacua ira bain ba'isi'cuabi baguëni huani senjohuë. Ja'nca sëani, mësacuani ganreba caguë quéayë yë'ë. Riusu bain raosi'cua huani senjos'i'cua si'acuare ro'taguë, yureña bainni sehuoye senji Riusu.

52 Mësacua, ira coca te'e ruiñë masicua, ai bënni senjos'i'cua ba'ija'cua'ë. Riusubi baguë masiye ye'yose'ere bainna jo'caguëna, mësacua se'gabi ro yahue re'huani, bainni gare ye'yomaë'ë. Ye'yomajëñ, bain hua'nabi ye'yeye yëcuareta'an, gare ënsehuë mësacua. Ja'nca sëani, Riusubi

mësacuani ai bënni senjoja'guë'bi, caguë quëabi Jesùs.

⁵³ Ja'nca caguë quëaguëna, ira coca te'e ruiñe masicua, fariseo bain, bacuabi ai bëinreba bëinjën, baguëni ai hui'ya senni achajën baë'ë. ⁵⁴ Baguëni huacha sehuo güeseñu cajën, baguëni coque éaye ro'tajën, baguëni hui'ya senjën, baguë sehuoyete ai achajën baë'ë.

12

Jesús enseña contra la hipocresía

¹ Ja'nca ba'icuata'an, quë'rë jai jubëan bainbi Jesùs cocare achañu cajën, sa'ñeña jë'jejën quëonjën, baguëna ti'anhuë. Ja'nca ti'anjënnna, Jesusbi baguëre yo'o concuani ru'ru yihuoguë cabi:

—Mësacua yua ëñare bajën, fariseo bain aon huo'coye, bacua yo'ojën ba'iyé ja'anre ëñani, gare yo'oye beoye ba'ijë'ën. Bacua yua èmëje'en ca'nco se'gare re'huajën, Re'o bain ba'iyë yéquëna cajën, ro coquejën, ro gu'aye yo'ojën ba'iyë. ² Bacuabi ro yahue gu'aye yo'ojënnna, Riusubi si'aye ëñani masiji. Si'a bain yahue gu'aye yo'ojënnna, Riusubi si'ayereba masini, si'ayete si'a bainni masi güeseja'guë'bi. ³ Ja'nca sëani, mësacua yahue case'e, zíjei re'oto cani jo'case'e ba'iguëna, Riusubi si'a bainni te'e ruiñera masi güeseja'guëbi. Si'a bainbi te'e ruiñe achajën ba'ija'cua'ë. Mësacua huë'ena yahue quëajën ba'ise'e ba'itoca, si'a huë'e jobona quëani achose'e ba'ija'guë'bi.

A quién se debe tener miedo

⁴ Mësacua yua yë'ë gaje hua'na ba'ijënnna, mësacuani yihuoguë quëayë yë'ë. Yequëcuabi mësacuani huani senjo ëaye yo'otoca, bacuani gue huaji yëye beoye ba'ijë'ën. Bain ga'nihuë se'gare huani senjoñë porecuabi mësacua recoyo carajei güeseye gare porema'iñë. ⁵ Riusu bënni senjoja'ñe se'gare huaji yëjën ro'tajëن ba'ijë'ën. Gu'a jucha yo'otoca, mësacuabi junni huesëjënnna, Riusu yua ja'an toana mësacuare senjoni saoye poreji. Ja'nca sëani, Gu'aye yo'oma'iñë cajëن, Riusuni bëin güesemajëن ba'ijë'ën.

⁶ Ën cocare ro'tani, Riusu ta'yejeiye conreba coñete masijë'ën. Bi'an hua'na te'e ëntë sara ba'i hua'nare coni misabëna ëoye yëtoca, samu curi so'corëan se'gare ro'iyé bayë mai. Ta'yejeiye ro'ima'iñë ba'iguëna, Riusu'ga bi'an ba'iyete gare huanë yema'iji. ⁷ Bi'an hua'na ba'iyete ai ro'taguë, mësacua ba'iyere'ga quë'rë ta'yejeiye ai ro'taguë ba'iji Riusu. Mësacua sinjobë rañare'ga cuen-cueni, ga rañañë ba'iyé masiji Riusu. Ja'nca sëani, mësacua yua gare huaji yëye beoye Riusu conreba coñete masijë'ën.

Los que reconocen a Jesucristo delante de los hombres

⁸ Ën cocare'ga mësacuani yihuoguë quëayë yë'ë. Bain hua'nabi achajënnna, mësacua yua yë'ë ba'iyete quëani achojëن ba'ijë'ën. Yë'ë yua Cristo bainguë'ë. Riusu Raosi'quëreba bainguë'ë yë'ë, quëani achojëن ba'itoca, yë'ë'ga mësacua ba'iyete ëñaguë, Riusu guënamë re'oto yo'o con hua'nabi achajënnna, Yë'ë bainreba yo'o concua ai re'o hua'na'ë, cani achoja'guë'ë yë'ë. ⁹ Yequëcua

yë'ë ba'iyete ro'tajën, bain hua'nabi achajënnna, Cristo bain ba'iyete cani achoye yëma'iñë yë'ë, catoca, yë'ë'ga, Riusu Raosi'quëreba ba'iguë, Riusu guënamë re'oto yo'o con hua'nabi achajënnna, bacua ba'iyete güeni senjoñe caja'guë'ë yë'ë.

¹⁰ Yë'ë ba'iyete gu'aye catoca, ja'nrëbi ja'an gu'aye case'ere huanë ye ye senreba sentoca, Riusubi huanë yeni ro'tama'iguë ba'ija'guë'bi. Riusu Espíritu ba'iyete gu'aye catoca, ja'an gu'aye case'ere huanë ye ye senreba sento'ga, Riusubi gare huanë ye ye beoye ba'ija'guë'bi.

¹¹ Yequëcuabi mësacuare preso zeanni, huë'e jobo ejacua, bain ta'yeyejiye ejacua, bacua ba'iruanna nëconi gu'aye cajënnna, mësacua sehuo coca caja'yete ru'ru ro'tamajën ba'ijë'ën. ¹² Mësacua sehuorën ti'anguëna, Riusu Espíritubi masi güeseguëna, ja'an cocare ëja bainni sehuojë'ën, cabi Jesús.

El peligro de las riquezas

¹³ Caguëna, yequë, bain jubë naconi ba'iguëbi Jesusni cabi:

—Ejaguë, yë'ë ja'yëbi yëquëna taita bonse jo'case'ere yë'ëna huo'hueni insiye yëma'iguëna, baguëni huo'hueye guansejë'ën, cabi.

¹⁴ Caguëna, Jesús sehuobi:

—Bañë. Mësacua bonse huo'hueye cama'iguë'ë yë'ë, cabi.

¹⁵ Ja'nca cani, sì'a hua'nani ñaca yihuoguë cabi:

—Mësacua eñare bajën, bonse ba eayete ro'tamajën ba'ijë'ën. Bonse se'gare batoca, quë'rë re'oye ba'iyete gare porema'iñë mësacua, cabi.

¹⁶ Ja'nca cani, ye'yo cocare ñaca quëabi:

—Ai ta'yejeiye bonse ejaguë baquëña. Baguë aon tanse'ere ñaguë, ai aon tēa güeseguëña. ¹⁷ Ja'nca tēa güeseguë, ja'ansi'quë ro'taguëña: “¿Queaca yo'oye'ne yë'ë? Ai aon tēase'e ba'iguëna, ¿jarona ayani baye'ne yë'ë? Aon aya huë'eñana ayaye ti'anma'iñle sëani, ¹⁸ yë'ë rëño huë'eñare ñañoni taonni, senjoni, quë'rë jai huë'eñare yo'oza, ro'taguë ba'iyë yë'ë. Ja'nca yo'oni tējini, yë'ë aonre ayani bani, ¹⁹ ja'nrëbi yë'ë se'ga bojoguë caja'guë'ë: Yë'ëre ai re'oye ba'iji. Surupa. Gare se'e aon carajeiye beoye ba'ija'guë'ë yë'ë. Gare se'e gono uncuye carajeiye beoye ba'ija'guë'ë yë'ë. Ja'anna ta'yejeiye bojoguë, re'o recoyo huanõne se'ga ba'ija'guë'ë yë'ë” ro'taguëña baguë. ²⁰ Ja'nca ro'taguë ba'iguëna Riusubi baguëni caguëña: “Ro huesë ëaye ba'i hua'guë'ë më'ë. Yure ñami junni huesëja'guëta'an ba'iyë më'ë. Junni huesëguëna, më'ë re'o bonse ¿jarocuabi bëani baja'cua'ne?” caguëña Riusu. ²¹ Mësacua yua ja'an ye'yo cocare achajën, ñaca ro'tajën ba'ijë'ën. A'ta bonsere bëyoní ta'yejeiye bonse ejacua'ru ruñu cajën yo'otoca, carajeiye se'ga ba'ija'cua'ë. Riusuni yo'o conmajën, Riusu insija'yete gare coye beoye ba'ija'cua'ë, yihuoguë cabi Jesús.

Dios cuida a sus hijos

²² Ja'nca cani tonni, ja'nrëbi jë'te, baguëre yo'o con hua'nani yihuoguë quëabi:

—Mësacua aon ainja'ñe, mësacua caña ju'ija'ye, ja'anre ta'yejeiye ro'tamajën ba'ijë'ën. ²³ Riusubi mësacuare ro aon aincuare re'huamaji'i. Riusubi mësacua ga'nihuëanre re'huaguë, ro caña ju'ije se'gare caguë jo'camaji'i. ²⁴ Mësacua yua bi'an

hua'na ba'iyete ëñani ye'yejë'ën. Ba hua'nabi gare aon tanma'icuata'an ba'iyë. Aon tëani re'huama'icuata'an ba'iyë. Bain hua'na re'huani baye'ru ba'ima'icuareta'an, Riusubi bacua aon ainjën ba'iyete insiji. Ja'nca insiguë, mësacua ba'iyete quë'rë ta'yejeiye ro'taguë, mësacuani quë'rë re'oye conreba conni insiye masiji Riusu. ²⁵ Mësacuabi ro'tajëن, Quë'rë jëja yo'oni quë'rë zoa hua'guë'ru runza ro'tajëن ba'icuata'an, gare porema'iñë mësacua. ²⁶ Ja'anre yo'oye poremajëن, mësacua ¿queaca ro'tajëن mësacua baja'yete ta'yejeiye cu'eye'ne?

²⁷ Jo'ya coro irayete ëñani ye'yejë'ën. Jo'ya coro se'gabi re'o canre tëonni ta'nëñe porema'iguëna, Riusu se'gabi jo'ya corore re'oye ëñóñë re'huaye masiji. Bain ta'yejeiye ñaguë Salomón hue'eguë ba'isi'quëbi ai re'o caña me'najei cañare ju'ini ai re'oye ñoguëreta'an, Riusu jo'ya coroña yua quë'rë ta'yejeiyereba ai re'oye ñoji. ²⁸ Jo'ya coroña yua rëño ñësebë se'ga ba'iguë, ja'nrëbi te'e jëana junni huesëguëna, Riusubi ja'an coroñare ai re'oye re'huani jo'caji. Ja'nca re'oye re'huani jo'caye masiguëbi mësacuare'ga quë'rë ta'yejeiyereba ai re'oye conreba coñe masiji. ²⁹ Ja'nca masiguë sëani, mësacua yua ¿Queaca aon coni aiñë'ne? ¿Queaca gonore coni uncuye'ne? ja'anre ta'yejeiye ro'tamajëن ba'ijë'ën. ³⁰ Ro ën yija bainbi ja'an se'gare ai ro'tajëن ba'icuata'an, mësacua Taita Riusu insiyete si'a recoyoreba ro'tajëن ba'ijë'ën, mësacua carayete ai masiguë sëani. ³¹ Riusu ba'i jobore ru'ru ro'tajëن, Riusu yo'o coñe se'gare ro'tajënnä, Riusubi si'a ën yija carayete mësacuana insija'guë'bi.

Riqueza en el cielo

32 Mësacua yua yë'ë bainreba ai yësi'cua sëani, gare huaji yëye beoye ba'ijë'ën. Mai Taita Riusubi mësacuani ai bojoguë, baguë ba'i jobo ba'ija'yete mësacuana ai insireba insija'guë'bi. **33** Ja'nca sëani, mësacua bonsere bendieni, bonse beo hua'nana ro insijë'ën. Ja'nca yo'onica, mësacua yua gare cara-jeiye beoye quë'rë ta'yejeiye coni baja'cua'ë. Riusu naconi guënamë re'otore ba'ijëen, baguë insija'yete gare caraye beoye coni baja'cua sëani, ja'an se'gare ro'tajëen ba'ijë'ën. Ja'anre bajënnä, gare huesëni si'aye beoye ba'ija'guë'bi. Gare pu'ncaye beoye ba'ija'guë'bi. Gare jian güeseye beoye ba'ija'guë'bi. **34** Riusu insija'yete coni baja'cua sëani, recoyo bo-joreba bojojëen ba'ijë'ën. Ro ën yija bonse se'gare ba ëaye ro'tatoca, rëño ñësebë se'ga bojojëen, Riusu insija'yete gare coye beoye ba'ija'cua'ë mësacua.

Hay que estar preparados

35 Riusu cuencuesi umuguse yua te'e jëana ti'anja'ñeta'an ba'iguë sëani, mësacua te'e jëana sani ba'ija'yete re'oye ëñajëen ëjojëen ba'ijë'ën. Guëon ju'i corore sa'yeni, Majahuëre zëonni saiñu cajëen ba'ije'ru ëñajëen ëjojëen ba'ijë'ën. **36** Ëja bainguë yo'o concua ëñajëen ëjojëen ba'ije'ru ba'ijë'ën. Bacua ëjaguëbi hueja fiestana saisi'quë ba'iguëna, Baguë yua joë ba'irëen ti'anma'ija'guë cajëen, baguë anto sa'røre ancoja'yete ëjojëen bateña. **37** Ja'nca ëjojëen ba'icuana ti'anni, bacuani ai bojoguë, bacuani ai re'oye conreba conguëña. Ja'an ëjaguëbi bacuani bëa güeseni, bacuani re'o aon cuiraguëña. **38** Quë'rë ñami jobo ba'ije'ru ti'anni, baguëre yo'o concua ëjojëen ba'icuare ëñani, bacuani ai ta'yejeiye

ai insireba insiguë bojoguëña. ³⁹ Mësacua yua
ën cocare'ga achani te'e ruiñe ro'taye ye'yejë'ën.
Huë'e ejaguëbi bonse jianguë rairën masinica,
baguë ti'anja'ñete ñaguë ejoguë, baguë huë'ere jian
güesema'ire'abi. ⁴⁰ Mësacua'ga yë'ë in rai umugusere
ëñajën ejojën ba'ijë'ën. Yë'ë ti'anja'ñete ta'yejeiye
ro'tama'ijëenna, yë'ë, Riusu Raosi'quëreba ba'iguëbi
te'e jëana ti'anja'guëta'an ba'iyë yë'ë, cabi Jesùs.

El criado fiely el criado infiel

⁴¹ Caguëna, ja'nrebi Pedrobi baguëni senni
achabi:

—Ejaguë, ën cocare ye'yoguë caguë, ¿yëquëna
hua'na se'gani yihuoguë, o si'a bainni yihuoguë
caguë më'ë? senni achabi.

⁴² Senni achaguëna, Jesùs sehuobi:

—Ëja bainguëre yo'o concua yo'ose'ere ro'tani
masijë'ën. Baguëre yo'o conguë te'eguëbi te'e
ruiñe recoyo ro'taguëna, baguë ejaguëbi so'o
sai bi'raguë, baguë huë'ere baguëna jo'caguë
guanseguëña: “Yë'ëre yo'o con hua'nare bacua
yo'o yo'oye guanseguë ba'ijë'ën. Bacuare aon
cuiraye guanseguë ba'ijë'ën” cani tonni saquéña.

⁴³ Sani, ja'nrebi zoe ba'irën se'e rani ñato,
baguëre yo'o con hua'guëbi baguë huë'e ba'iyete
ai re'oye cuiraguë baquéña. Ja'nca ba'iguëna,
baguëni ai bojoguë, baguëni ai re'oye conguë
ëñaguëña. ⁴⁴ Baguë huë'e, baguë yija, baguë
bonse, si'ayete baguëna jo'cani, baguë bain
ejaguëre baguëre re'huani, baguëni ai bojoreba
bojoguë baquéña. ⁴⁵ Yequë yo'o con hua'guë'ga
baquéña. Baguë ejaguëbi so'o saisi'quë ba'iguëna,
yo'o con hua'guëbi ro'taguë, Yë'ë ejaguëbi zoe

raima'iji caguë, baguë gaje yo'o concuani ai je'o baguë, baguë ejaguë aonre a'ta ainguë, baguë jo'chare uncuni güebeguë, ⁴⁶ Yë'ë ejaguëbi raima'iji caguëna, baguë ejaguëbi te'e jéana ti'an rani, baguë gu'aye yo'ose'ere éñani, baguëni zeanni, baguëni ai ta'yejeiye bënni senjoni, achaye güecua ba'iruna senjoni saoguëña.

⁴⁷ Ja'nca ba'ise'e sëani, mësacua ro'tani masijë'ën. Ejaguëre yo'o conguëbi baguë ejaguë guansese'ere achani, baguë yo'o yo'oye masiguë, ja'nrébi baguë guansese'ere yo'oma'itoca, ejaguëbi baguëni ai ta'yejeiye bënni senjoja'guë'bi. ⁴⁸ Yequë yo'o conguëbi baguë ejaguë guansese'ere huesëguë, ja'nrébi baguë yo'o guansese'ere re'oye yo'oma'itoca, ejaguëbi baguëni ta'yejeiye bëinma'ija'guë'bi. Güina'ru, mësacuani ai ta'yejeiye insini, ai ta'yejeiye masi güesetoca, mësacua yua quë'rë ta'yejeiye te'e ruiñe yo'o coñe bayë.

Jesús es causa de división

⁴⁹ Yë'ëbi én yijana raiguë, bainni ai yo'o güeseguë raë'ë, jai toa zéonse'e ba'iye'ru. Yuta toa zéoñe'ru yo'oma'iguë, te'e jéana zéonni, jai toa re'huaye'ru yo'oye ro'taguë'ë yë'ë. ⁵⁰ Taita Riusubi ja'an toabi yë'ëni bautizaye ro'taguëna, ja'an bautizaja'ye tëca ai recoyo ja'siyereba ja'siguë ba'ija'guë'ë yë'ë. ⁵¹ Mësacua yua yë'ë ba'iyete ro'tajën, ¿Bainni bojo güeseguë raisi'quë'bi ro'tajën ba'ima'iñe mësacua? Gare banhuë. Bainni sa'ñeña hua güeseguë raisi'quë'ë yë'ë. Sa'ñeña bëin güeseguë raisi'quë'ë yë'ë. ⁵² Yureñabi te'e huë'e bain ba'icua, te'e éntë sara ba'icua ba'ijën, si'a jubëbi sa'ñeña je'o bajën, sa'ñeña huaye se'ga ba'ija'cua'ë. ⁵³ Pë'caguëbi

baguë mamaquëni je'o baguëna, mamaquëbi baguë pë'caguëni je'o baja'guë'bi. Pë'cago'ga bago mamaconi je'o bagona, mamacobi bago pë'cagoni je'o baja'go'go. Romi huacua banica, sa'ñeña ai je'o bajën ba'ija'cua'ë. Ja'nca sa'ñeña hua güeseguë raisi'quë'ë yë'ë, cabi Jesús.

Las señales de los tiempos

⁵⁴ Ja'nca cani tonni, ja'nrebi, si'a bainni quëani achoguë cabi:

—Mësacua yua ënsëguë ruajai ca'ncona ëñani, oco pico ba'itoca, Oco ca'niji cayë mësacua. Ja'nca cajënnna, mësacua case'e'ru oco raji. ⁵⁵ Ja'nrebi, sëribë ca'ncobi tutu ratoca, mësacuabi, Ja'su umuguse ba'ija'guë'bi cayë. Cajënnna, mësacua case'e'ru ja'su umuguse ruinji. ⁵⁶ Mësacua yua oco raja'ye, ja'su umuguse ruinja'ñe. ja'anre ai masiye quëacuata'an, ¿mësacua queaca ro'tajën, Riusu yureña yo'oja'yete ro huesë ëaye ba'iyé'ne? Mësacua yua re'o bain ëñocuata'an, ro coquejën ba'iyé mësacua.

Procura ponerte en paz con tu enemigo

⁵⁷ ¿Mësacua queaca ro'tajën, te'e ruiñe yo'oyete cani yo'oma'iñe'ne? ⁵⁸ Yequëbi më'ëni preso zeanni ëja bain guanse huë'ena sa bi'ratoca, ru'ru më'ë porese'e'ru baguë naconi ro'i cocare cani tonjë'ën. Ejaguë ba'iruna yë'ëre rërëni sama'iguë caguë, ja'nca baguëni cani tonjë'ën. Ja'anruna satoca, ejaguëbi më'ëre ëñani, soldado hua'nana insiguëna, ya'o huë'ena guaoni baja'cua'ë. ⁵⁹ Më'ëre ja'nca guaoni batoca, më'ë curi beoru ro'iye tëca, ya'o huë'ebi gare etaye porema'ija'guë'ë më'ë, cabi Jesús.

13

Importancia de la conversión

¹ Caguëna, bain jubë ba'icuabi Jesusni coca quëahuë:

—Éjaguë, Galilea bainbi Jerusalén huë'e jobona ti'anni, Riusuni bojoñu cajën, bacua jo'ya hua'nare huani, misabëna tëoni éo bi'rahuë. Éo bi'rajënnä, bain ejaguë Pilatobi bacuare zeanni, bacuani huani senjoni, bacua zie yua bacua jo'ya hua'na zie naconi ja'meni jo'cabi quëahuë bacua.

² Quëajënnä, Jesús sehuobi:

—Ja'nca huani senjosí'cua ba'ijënnä, ¿Mësacua queaca ro'taye'ne? Mësacua yequërë ro'tajën, Ja'an Galilea bain yua bacua yija ba'icua'ru quë'rë gu'aye yo'ojën ba'isi'cua ba'imate, ro'tama'iñë mësacua? ³ Bañë. Te'e ruiñe ro'tama'iñë mësacua. Mësacua'ga mësacua gu'a jucha yo'ojën ba'ise'ere gare jo'cani senjoma'itoca, mësacua'ga güina'ru carajeija'cuata'an ba'iyë. ⁴ Yequëcua ëmë huë'e quëonsi'cuare'ga ro'tajë'en. Ëmë huë'e Siloere ba'iguë, ñañani taonni, ja'an dieciocho bain hua'nana quëonguëna, huajë junni huesëhuë. Ja'nca quëonni huesësi'cua ba'ijënnä, mësacua ¿queaca ro'taye'ne? Si'a Jerusalén bain ba'ije'ru quë'rë gu'aye yo'ojën ba'isi'cua ba'imate, ro'tama'iñë mësacua? ⁵ Gare banhuë. Mësacua'ga mësacua gu'a jucha yo'ojën ba'ise'ere gare jo'cani senjoma'itoca, mësacua'ga güina'ru carajeija'cuata'an ba'iyë, cabi.

La parábola de la higuera sin fruto

⁶ Ja'nca cani, ja'nrebi ye'yo cocare caguë, bainni quëani achobi:

—En cocare achani, mësacua gu'a jucha jo'cani senjoñete te'e ruiñe ro'tajé'en. Yequë ejaguëbi higo sunquiñete baguë ziona tanni, samute tëcahuëan ejoni ñänto, higo uncuere gare quëinma'iñe baquëña. ⁷ Ja'nca quëinma'iguëna, ejaguëbi baguë zio cuiraguëni cabi: "Ja'an sunquiñë gu'a sunquiñë'ë. Higo uncuere tëani uncueja'ma caguë, ro cu'eni jëhuahuë yë'ë. Cueni taonni senjojë'en, ro irani ba'iñëre sëani" cabi baguë. ⁸ Caguëna, zio cuiraguëbi sehuobi: "Banji. Cueni senjoma'iñu. Se'e yequë tëcahuë ejona'a, ejaguë. Bañë yijare re'oye mo'gani, re'o yijare pë'npëni uanni, re'oye re'huazaniñë yë'ë. ⁹ Ja'nca re'huani ejoguëna, ja'nrëbi yequë tëcahuë uncuere quëinma'itoca, cueni senjoñu" cabi baguë.

Jesús sana en día de reposo a una mujer jorobada

¹⁰ Ja'nrëbi, yequë umuguse yo'o yo'oma'i umuguse ba'iguëna, Jesús yua bain ñë'ca huë'ena cacani, bainre coca ye'yoguëna, ¹¹ romi hua'gobi me gurubë garani ju'ingo baco'ë. Dieciocho tëcahuëan gu'a huati cacasi'cobi te'e ruiñe nëcaye porema'i hua'go baco'ë. ¹² Ja'nca ba'igona, Jesusbi ñäntani, bagoni choini, ja'nrëbi bagoni quëabi:

—Yë'ë baingo, më'ë rau beo hua'go ba'ijé'en. Huati beogo, huajé hua'go ba'ijé'en, caguë quëabi.

¹³ Ja'nca quëani, baguë éntë sarañabi bagona pa'rogüëna, ja'ansirën te'e ruiñe nëcani, Riusuni ai bojoreba bojogo ca bi'rago. ¹⁴ Ja'nca huajéni bojogona, ñë'ca huë'e ejaguëbi baguë yo'o yo'oma'i umuguse huachose'ere ñäntani, ai bëinreba bëinguë, bainni cabi:

—Te'e ëntë sara te'e umuguseña yo'o yo'o umuguseña ba'iguëna, ja'an umuguseña se'gare rani huacho güesejë'ën. Yo'o yo'oma'i umuguse ba'itoca, huacho güeseye beoye ba'ijë'ën, bëinguë cabi.

15 Caguëna, Jesusbi sehuobi:

—Mësacua judío ëja bainbi Riusu cocare te'e ruiñe yo'oñu cajën ro coqueyë. Mësacua jo'ya hua'na, toro, burro, ja'an hua'na ba'iyete ëñajë'ën. ¿Yo'o yo'oma'i umuguse ba'iguëna, mësacua yua bacuare jo'chini, oco uncuruna sani, ocore uncu güesema'iñë? Aito. **16** Ja'nca yo'ojën ba'icua sëani, ¿mësacua guere yo'ojën, bago huachoyete ënseye caye'ne? Ira taita Abraham baingorebare sëani, dieciocho tëcahuëan zupai huati cacani ba'iguëna, bagore yo'o yo'oma'i umugusebi huachoye ënsema'ijë'ën, cabi Jesús.

17 Ja'nca caguëna, Jesusni se'e je'o ëñamajëن, ro gati ëaye yo'o bi'rahuë. Bain hua'naca Jesús ta'yejeiye yo'o conse'ere ëñani, ai bojoreba bojojëن baë'ë.

La parábola de la semilla de mostaza

18 Ja'nrebi, Jesús yua ye'yo cocare cabi:

—Mësacua yua Riusu bainreba ba'i jubë re'huani baja'ye, ja'anre ye'yejë'ën caguë, ¿queaca mësacuani quëaye'ne yë'ë? **19** Mostazara'carë ba'iyete ro'tani ye'yejë'ën. Ai zinra'carë ba'iguëna, yijana tantoca, ai jai sunquiñë runni, jai cabëan quënquëna, ca hua'i hua'nabi ja'añëna ti'anni, bacua ziaroanre suayë.

La parábola de la levadura

20 Mësacua yua ñen cocare'ga achani, Riusu bain re'huani baja'yete ye'yejë'ën. **21** Romi hua'gobi bago jo'jo aonbëanre yo'ogo, aon huo'coyete inni, harinabë naconi ja'mego. Ja'nca ja'megona, si'a harinabëbi ta'yejeiye huo'coni, ai jaibë'ru ruinji, cabi Jesùs.

La puerta angosta

22 Cani tonni, ja'nrébi se'e sani, Jerusalén huë'e jobona ti'añe tëca si'a bain huë'e jo'borëanna bonëni, bainre ye'yoguë baji'i. **23** Ye'yoguë ba'iguëna, yequëbi baguëni coca senni achabi:

—Éjaguë, ¿më'ë bain ba'ija'cua, Riusu bënni senjoñe jëaja'cua, rëño jubë se'ga ba'ija'cua'ne? caguë senni achabi.

24 Senni achaguëna, Jesùs sehuobi:

—Mësacua yua Riusu ba'i jobona ti'añe ro'tanica, ja'an rëño sa'ro se'gabi cacani ba'ijë'ën. Ai jai jubë bainbi ja'an sa'robi cacaye güejën, Riusu ba'i jobona ti'añe gare porema'ija'cua'ë.

25 Riusu cuencuesirën ti'anguëna, Riusubi ja'an sa'rore gare ta'piguëna, ai bain hua'nabi hue'se ca'ncore nëcajën, ja'an sa'rona je'njuni achojën caja'cua'ë: “Éjaguë, yëquëna hua'nare ancojë'ën. Cacaye yëyë yëquëna” cajëenna, baguëbi senni achaja'guë'bi: “Mësacua ¿jaro bain'ne?” senni achaguëna, **26** bacua sehuoja'cua'ë: “Më'ë bain'ë yëquëna. Më'ëbi yëquëna huë'e jobona ye'yo raiguëna, më'ë naconi te'e aon ainjën, gono uncujën baë'ë yëquëna” sehuoja'cua'ë bacua. **27** Ja'nca sehuojëenna, yë'ëbi bacuani quëaja'guë'ë: “Bañë. Mësacua yua yë'ë bain beojën, ro tin hua'na ba'icua'ë. Yë'ëni gu'aye yo'ojën ba'isi'cua sëani,

gare saijë'ën” quëaja'guë'ë yë'ë. ²⁸ Quëaguëna, ba hua'nabi ai oijën, recoyo ai ta'yejeiye sa'ntijën, ai yo'ojën, bacua zemeñoan cuncujën nëcaja'cua'ë. Ja'nca nëcajën, Riusu bainreba jubëte ëñajën, mësacua ira bain ba'isi'cuare ëñajënnä, Abraham, Isaac, Jacob, si'a Riusu bain zoe re'huani raosi'cua ba'ijënnä, mësacua yua ro hue'se ca'ncona jo'cani senjosi'cua ba'ija'cua'ë. ²⁹ Ja'nrëbi mësacuabi se'e ëñato, judío bain jubë ba'ima'icua'ga si'a ca'ncoñabi ti'an rani, Riusu ba'i jobona cacani ba'ija'cua'ë. Cacani, Riusu naconi te'e bëani, baguë guënamë re'oto aonre ainjën bojoja'cua'ë. Ja'nca ba'ijënnä, hue'se ca'ncore nëcacuabi ai oireba oijën ëñaja'cua'ë. ³⁰ Ja'nca ëñaja'cua ba'ijënnä, ën yija ba'icua quë'rë ta'yejeiye beoye ba'icua ba'ijënnä, Riusubi bacuare ëñani, baguë bainre quë'rë ta'yejeiye ejacuare re'huani baja'guë'bi. Yequëcua ën yijare ba'icua'ga quë'rë ta'yejeiye ba'icua ba'ijënnä, Riusubi bacuare ëñani, quë'rë ta'yejeiye beoye ba'i hua'nare bacuare re'huani jo'caja'guë'bi, caguë quëabi Jesús.

Jesús llora por Jerusalén

³¹ Quëaguëna, ja'ansi umuguse fariseo bainbi ti'an rani, Jesusni quëahuë:

—Achajë'ën. Herodesbi më'ëni huani senjojaza caguëna, besa gatini saijë'ën, quëahuë.

³² Quëajënnä, Jesús sehuobi:

—Bañë. Mësacua yua ja'an ro ca huatina go'ini quëajaijë'ën: “Yë'ëbi yure umuguse, miato, ja'an umuguseñabi huati hua'ire etoni saoguë, bain hua'nare huachoguë ba'ija'guë'ë yë'ë. Ja'nrëbi que miato yë'ë yo'ore yo'oni tëjija'guë'ë yë'ë” ja'an

cocare baguëni quëajaijë'ën. ³³ Ja'nca quëajaijë'ën caguë, ja'an samute umuguseña yë'ë yo'ore yo'oguë, Jerusalenna ti'anja'guë'ë yë'ë. Ja'nca ti'anni, Riusu bain raosi'cua yua Jerusalén huë'e jobo se'gare ba'ijëñ, huani senjosí'cua ba'ijënnna, yë'ë'ga ja'an huë'e jobona sani, güina'ru junni tonja'guë'ë yë'ë.

³⁴ Ja'an ba'iya'yete ro'taguë, Jerusalén huë'e jobo bain gu'aye yo'oyete ro'taguë, ai oireba oiyë yë'ë. Riusubi baguë bainre re'huani baguë coca quëani achocuare re'huani raoguëna, Jerusalén bainbi ro cue'yoni, bacuani huani senjoñu cajën, bacua gatabëanre inni, bacuani huani senjojën ba'icua'ë. Ja'nca yo'ojënnna, bacuani ai zoe choini jéhuahuë yë'ë. Cura hua'gobi bago zin hua'nare choini, bago ganhua cabëan yijacuana jéoni guëoye'ru, yë'ë'ga ja'an bainni güina'ru cuirani baza caguë choiguëna, bacuabi ro cue'yoni yë'ë're gu'a güejën senjohuë. ³⁵ Ja'nca senjojënnna, bacuani ai bëinguë cani jo'cayë yë'ë. "Mësacua jubë si'acuare jo'cani senjoguëna, yë'ë bain ba'iye gare porema'ija'cua'ë. Yë'ë cuencuesi umuguse ti'añe tëca mësacua gare se'e yë'ëni ëñama'ija'cua'ë. Ja'an umuguse ti'anguëna, mësacuabi yë'ë're se'e ëñajën, yë'ë ta'yejeiye ba'iyete te'e ruiñe masijën, yë'ë're caja'cua'ë: Riusu Raosi'quëreba ba'iguëbi ti'an raiguëna, baguëni bojoreba bojorjën cani achoja'ma, yë'ë're cajën ëñaja'cua'ë" caguë quëabi Jesús.

14

Jesús sana a un enfermo de hidropesía

1 Quëani ja'nrébi, yequë umuguse yo'o yo'oma'i umuguse ba'iguëna, fariseo ëja bainguëbi baguëni aon choiguëna, baguë huë'ena sani ëñato, fariseo bain hua'nabi baguë yo'oja'yete ro yahue ëñañu cajën baë'ë. **2** Yequë'ga baji'i. Rauna ju'inguë, ñentë sara ai ri'risi'quë baji'i. **3** Ja'nca ba'iguëna, Jesusbi ja'an fariseo bain, ira coca cani jo'case'ere te'e ruiñe masicua, ja'an si'acuani senni achabi:

—Mësacua ¿queaca ro'taye'ne? ¿Mai ira coca cani jo'case'e'ru yo'otoca, yo'o yo'oma'i umugusebi bainre huachoye poreye mai? senni achabi Jesús.

4 Senni achaguëna, ba hua'na yua ro sehuoye beoye achahuë. Ja'nca sehuomajënnna, Jesús yua ju'in hua'guëna bonëni, baguëte huachoni saobi.

5 Saoni ja'nrébi, fariseo bainni cabi:

—Mësacuabi yë'ë yure yo'ose'ere bëinjën ëñajën, ro gu'aye ro'tayë! Mësacua jo'ya hua'na, burro, toro, ja'an hua'na ba'iyete ro'tani, yë'ë re'oye yo'ose'ere masiye ro'tajën ba'ijë'ën. Mësacua jo'ya hua'guëbi yo'o yo'oma'i umugusebi gojena gurujani to'intoca, mësacua yua ja'ansirën baguëte conjën rutayë, cabi Jesús.

6 Caguëna, ba hua'nabi achani, ro sehuoye poremajën, baguëni ro ëñajën nëcahuë.

Los invitados a la fiesta de bodas

7 Ja'nrébi ja'an bain hua'nabi ti'anni, aon ainruna bëa bi'rajën, ëja bain ñu'i seihuëan se'gare ëñani bëahuë. Ja'nca ëñani bëajënnna, Jesusbi bacuani yihuoguë quëabi:

8 —Mësacua yua huejaja'cua aon ainruna choisi'cua banica, quë're jëja bain ñu'i seihuëanre cu'ema'ijë'ën. Ja'anruna bëatoca, yequërë

më'ë'ru quë'rë ta'yejeiye ëjaguëbi ti'anguëna,
 9 huejaja'guëbi më'ëna ti'anni, më'ëni coca
 cama'iguë: “En ñu'i seihuë, ën ëjaguë ñu'i seihuë'ë”
 caguë ënssetoca, më'ë yua ro huaji yaye ba'iguëbi
 quë'rë yo'je ñu'i seihuëna bëaye bayë më'ë.
 10 Ja'anre ro'tajë'ën. Huejaja'cua aon aiñe
 choisi'quë ba'itoca, quë'rë ta'yejeiye beo hua'na
 ñu'i seihuëna bëajë'ën. Ja'nca bëasi'quëreta'an,
 yequërë huejaja'guëbi rani, më'ëni cama'iguë:
 “Raijë'ën, ja'yë. Quë'rë ta'yejeiye ëja bainguë ñu'i
 seihuëna bëajë'ën.” Ja'anre catoca, yequëcua
 baruna choisi'cuabi më'ëni ai re'oye ëñañë.
 11 Më'ëbi yua quë'rë ta'yejeiye ëja bainguë
 runza caguë yo'otoca, ta'yejeiye beo hua'guëre
 re'huasi'quë ba'ija'guë'ë më'ë. Më'ëbi yua
 ta'yejeiye beo hua'guë runza caguë yo'otoca, ai
 ta'yejeiye ëjaguëre re'huasi'quë ba'ija'guë'ë më'ë,
 cabi Jesús.

12 Cani ja'nrëbi, ja'an aon choisi'quëna bonëni
 cabi:

—Më'ëbi aon re'huani bainre choi bi'raguë,
 më'ë bain hua'na, më'ë gaje hua'na, yequëcua
 bonse ejacua, ja'ancuare choima'ijë'ën. Choiguëna,
 bacua'ga aon re'huani, më'ë're'ga güina'ru aon
 choija'cua'ë. Ja'nca më'ë're' choijë'n, më'ë aon
 re'huani choise'ere güina'ru go'yaja'cua'ë. 13 Ja'nca
 sëani, më'ëbi aon re'huani bainre choi bi'raguë,
 bonse beocua, guëon garasi'cua, ca'jacua, ñaco
 ëñama'icua, ja'ancuare aon choijë'ën. 14 Ja'nca
 choitoca, Riusubi më'ëna ta'yejeiye ai insireba
 insija'guë'bi. Bacuabi më'ëni sa'ñejë'n choiyé
 porema'icua sëani, Riusu bainreba go'ya rai umu-
 guse ti'anguëna, më'ëbi bacua naconi Riusu ba'i

jobona sani ba'iguëna, Riusubi baguë ba'iyete më'ëna ta'yejeiye ai insireba insija'guë'bi, cabi Jesùs.

La parábola de la gran cena

15 Caguëna, yequëbi mesa ca'ncore ñu'iguëbi Jesusni cabi: Riusu bainreba baguë naconi te'e zi'inni aon ainjën ba'icua, ja'ancuabi ai bojoreba bojojën ba'i'ja'cua'ë, cabi.

16 Caguëna, Jesusbi baguëni cabi:

—Yë'ëbi ye'yo cocare caguëna, achajë'ën. Yequë ejá bainguë baquéña. Ai re'o aonre re'huani, ai jai jubë bainni choquéña. **17** Choni ja'nrebi, aonre re'huani tëjini, baguëre yo'o con hua'guëni guansegüeña: “Yë'ë bain choisi'cuana sani quéajaijë'ën. Yua'ë. Mësacua raijë'ën. Aonre re'huani tëjihuë quéajaijë'ën” caguë guansení saoguëña. **18** Saoguëna, yo'o con hua'guëbi sani quéaguëna, si'a hua'na te'ena, te'ena, “Aon ainguë saiye porema'iñë yë'ë. Yequë umuguse conja'guë'ë yë'ë” ca bi'rareña. Yequëbi “Mame zio yijare yure cohuë yë'ë. Ja'an yijana sani ëñañe bayë. Aon aiñe conguë saiye porema'iñë yë'ë” caguëña. **19** Yequë'ga “Toro hua'na si'a saracuare yure cohuë yë'ë. Bacua rërëye poreyete masiye bayë yë'ë. Ja'an yo'oja'guë sëani, conguë saiye porema'iñë yë'ë” sehuoguëña. **20** Yequë'ga “Yureta'an romi hua'goni huejani bayë yë'ë. Më'ë ejaguëre aon aiñe coñe porema'iñë” sehuoguëña. **21** Ja'nca sehuojënnna, yo'o con hua'guëbi go'ini, baguë ejaguëni quéaguëña. Quéaguëna, ejaguëbi ai bëinreba bëinguë, baguëre yo'o con hua'guëni caguëña: “Ja'nca raiye güesi'cua sëani, si'a huë'e

jobona sani, bonse beo hua'na, guëon garasi hua'na, ca'ja hua'na, ñaco ëñama'i hua'na, ja'an hua'nani choijani rajé'ën” guanseguë caguëña. **22** Caguëna, yo'o con hua'guëbi choijani rani, baguë ëjaguëni quëaguëña: “Bainre choni rahuë, ëjaguë. Bacuare rani bëa güeseguëna, yequëcua raitoca, bëani aon aiñe ti'anji” quëaguëña. **23** Quëaguëna, ëjaguëbi caguëña: “Ja'nca ba'itoca, huë'e jobo ca'ncoña ma'añaja'an saiguë, si'a hua'na so'o ba'icuani choijani rajé'ën. Yë'ë aon ain huë'e bu'ije tëca ja'an bainni bëa güesejë'ën.

24 Yë'ë bain ru'ru choisi'cuabi cue'yoni saisi'cua sëani, yë'ë aonre conni aiñe gare porema'ija'cua'ë" bëinguë caguëña, cabi Jesús.

Lo que cuesta seguir a Cristo

25 Yureca quë'rë jai jubëan bainbi Jesusni conñu cajën, baguëni be'tejaijënnna, Jesusbi bacuana bonëni quëabi:

26 —Mësacua yua yë'ëre yo'o concua ba'ije yënicá, mësacua yo'ojën ba'ije si'aye gare jo'cajé'ën. Pë'caguë, pë'cago, rënjo hua'go, zin hua'na, ma'yë hua'na, yo'je hua'na, mësacua bain si'acuare ta'yejeiye ëñamajën, yë'ëre con raijé'ën. Mësacua yëse'e'ga gare se'e yo'oye ro'tamajën, yë'ë yëye se'gare yo'ojën ba'ijé'ën. Ja'nca yo'oma'itoca, yë'ëre yo'o con hua'na ba'ije gare porema'ïñë mësacua. **27** Yë'ë ai yo'oguë ba'ije'ru güina'ru ai yo'oye yëmanica, yë'ëni con raima'ijé'ën. **28** Jai huë'ere yo'oja'guëni ro'tani ye'yejé'ën. Jai huë'ere yo'ozá caguëbi ru'ru ¿Guebi ro'ija'guë'ne yë'ë? caguë, ja'an ro'ija'yete si'aye cuencueni masini, ja'nrébi huë'ere yo'o bi'raguëña. **29** Ja'an

ro'ija'yete cuencuemaní'ga huë'ere ro ro'taguë yo'o bi'rani, ja'nrebi se'nquehuë se'gare yo'oni, curi carajeiguëna, baguë bainbi ti'anni, ja'an huë'e tējima'ise'ere ëñani, baguëre ai jayajën caja'cuayeña: ³⁰ "Ja'anguëbi jai huë'ere yo'ozá casí'quëta'an, yo'oni tējiye ti'anmaji'i" jayajën caja'cuayeña. ³¹ Bain ta'yejeiye ejaguë guerra huaja'yete ro'taguëna, mësacua achani ye'yejë'en. Yequë ejaguëbi je'o baguë, veinte mil soldado hua'na naconi ti'an rai bi'raguëna, baguë jéja bayete cuencueni ro'taguëña baguë. Baguë soldado hua'na naconi, diez mil ba'icua naconi quë'rë ta'yejeiye guerra huani, je'o baguëni saoni senjoñe porema'itoca, ³² je'o baguëbi yuta so'o ba'iguëna, baguëni coca saoguë, Huaye beoye ba'ina'a. ¿Guere më'ena insiye'ne yë'ë? senni achaguë saoja'guëguëña baguë. ³³ Mësacua yua ja'anre ro'tajën, mësacua yo'o conja'ñete re'oye ro'tajë'en. Yë'ëni yo'o coñe yëtoca, ru'ru mësacua baye si'ayete gare jo'cani, yë'ë yëyete yo'ojeti ba'ijë'en. Ja'nca yo'oye yëma'itoca, yë'ëni yo'o coñe gare porema'iñë.

Cuando la sal deja de estar salada

³⁴ Mësacua yua yë'ë bain ba'ije yënicá, mësacua onhua ba'ije'ru ëñani ye'yejë'en. Re'o onhua ba'iguëna, ai re'o huanoji maire. Re'o huanoñe carajeitoca, re'o onhua ba'ije gare se'e re'huaye porema'iñë mai. ³⁵ Gu'a onhua ba'itoca, yija tanse'ena pë'npëni, ja'anruna tanni, re'oye iroye porema'iñë. Abono pëbë naconi ja'metoca, gu'aji. Ja'an gu'a onhuare senjoñe se'ga ba'iji. Mësacua yua ganjo banica, achani ye'yejë'en, cabi Jesús.

15

La parábola del pastor que encuentra su oveja

¹ Caguëna, ja'nrebi impuesto curi cocua, gu'a bain, ja'an si'acuabi Jesusna ti'anni, Baguë coca caguëna achani masiñu cajënna, ² fariseo bain, ira coca cani jo'case'ere masicuabi Jesusre ai bëinjën cahuë:

—Gu'a bainbi raijënnna, baguë yua ro bacuani bojoguë, bacua naconi te'e aon ain'te, bëinjën cahuë.

³ Ja'nca cajënna, Jesusbi ye'yo cocare bacuani quëëabi:

⁴ —Mësacua yua oveja jo'ya hua'na cuiraguë yo'ose'ere achani ye'yejë'en. Cien oveja hua'nare baguëna, te'eguëbi quëñëni sani huesëtoca, ¿guere yo'oja'guë'ne baguë? Mësacua yua masiyë. Baguë jubë ba'icua, noventa y nueve ba'icuare bacua aon ain yijana jo'cani, huesësi'quëni oiguë, baguëni cu'ejaquëña. ⁵ Cu'ejani, tinjani ëñani, ai ëama'iñereba bojoguëña. Ja'nca bojoguëbi baguë oveja hua'guëre zeanni, baguë tanta cubëna tëoni, hue'oni, ⁶ baguë huë'ena ti'anni, baguë gaje bainre choini quëaguëña: “Yë'ë naconi te'e bojojën ba'ijë'en. Yë'ë oveja hua'guëbi sani huesësi'quëreta'an ba'iguëna, baguëre tinjani rahuë yë'ë” caguëña. ⁷ Ja'nca bojoguë caguëna, Riusu guënamë re'oto ba'icuabi gu'a jucha yo'osi'quë mame recoyo re'huase'ere ëñani, güina'ru ai bojojën ba'iyë. Te'e gu'aye yo'osi'quë se'gabi mame recoyo re'huaguëna, bacuabi ja'an hua'guëre ëñani, noventa y nueve re'o bainni bojoye'ru baguëni quë're ta'yejeiye ai bojoreba bojojën ba'iyë. Ja'an re'o bain cacuabi “Gu'a jucha

yo'oma'isi'quë'ë yë'ë. ¿Queaca yo'oguë, mame recoyo re'huaye'ne yë'ë?" ja'an cacua ba'ijënnä, bacuare ta'yejeiye bojoma'iñë Riusu guënamë re'oto ba'icua.

La parábola de la mujer que encuentra su moneda

⁸ Romi hua'go curi so'corë huesosi'core'ga achani ye'yejë'ën. Ba hua'gobi si'a sara so'corëanre bani, te'e so'corëte huesogoña. ¿Ja'nca huesoni, guere yo'ogo'ne? Mësacua yua masiyë. Majahuëte zëonni, bago huë'ere yuago, ba so'corë tinjañe tëca si'a ca'ncoña ëñago cu'ego yuagoña. ⁹ Ja'nca yuani tinjani, ai bojo hua'gobi si'a bago gaje bainre choini quëagoña: "Yë'ë naconi te'e bojobjen ba'ijë'ën. Yë'ë curi so'corë huesesi'quëreta'an ba'iguëna, tinjani bayë yë'ë" cago bojogoña. ¹⁰ Ja'nca bojogo cagona, Riusu guënamë re'oto yo'o con hua'na'ga gu'a jucha yo'osi'quë mame recoyo re'huase'ere ëñani, güina'ru ai bojobjen ba'iyë. Te'e gu'aye yo'osi'quë se'gabi mame recoyo re'huaguëna, bacuabi ai ta'yejeiye bojoreba bojobjen ba'iyë, caguë quëabi Jesús.

La parábola del padre que perdona a su hijo

¹¹ Ja'an ye'yo cocare cani, ñen cocare'ga ye'yoguë cabi Jesús:

—Yequë bainguëbi samu mamacuare baguëña. ¹² Ja'nca baguëna, ba yo'jeguëbi caguëña: "Taita, yë'ëre insija'yete si'aye cuencueni te'e jëana yë'ëna insijë'ën" caguëña. Caguëna, pë'caguëbi si'aye cuencueni, baguë samu mamacua si'acuana huo'hueni insiguëña. ¹³ Insiguëna, yequë umuguseña ba'iguëna, ba yo'jeguëbi baguë baye

si'ayete re'huani, ja'nrebi so'o yijana saquëña. Sani ba'iguëbi baguë curi carajekiye tëca ro a'ta gu'aye yo'oguë baquéña. ¹⁴ Ja'nca curi si'aguëna, ja'an yija aon caraje bi'raguëna, ba hua'guë yua aon gu'ana ju'in bi'raguëña. ¹⁵ Ju'in bi'raguëbi ja'an yija ejaguëna sani, baguëni yo'o yo'oye senquéña. Senguëna, baguë cuchi hua'nare cuiraye saoguëña. ¹⁶ Saoguëna, cuiraguë ba'iguëbi cuchi aon, aon hui'ya ga'ni, ja'anre ainja'ma caguëreta'an, ja'anru bainbi baguëna gare insimateña. ¹⁷ Insimatená, ba hua'guë ja'ansi'quë ro'taguëña: "Ai yo'oyë yë'ë hua'guë. Yë'ë taita yo'o con hua'nabi ai aonre anni jëhuajënnä, yë'ë hua'guë ro aon gu'ana ju'iñë. ¹⁸ Ja'nca ju'inguë, yë'ë taitana go'ini, baguëni caja'guë'ë yë'ë: Taita, Riusure, më'ëre ai gu'aye yo'ohuë yë'ë. ¹⁹ Më'ë zin beoguë'ru huë'ena ti'anhuë yë'ë. Ro më'ë yo'o con hua'guëre re'huani yë'ëni bajë'ën, taitani caja'guë'ë yë'ë" ro'taguë ñuquëña. ²⁰ Ja'nca ro'tani, baguë yua huëni, pë'caguë huë'ena go'i bi'raguëña.

Go'i bi'rani, yuta so'orë raiguëna, pë'caguëbi baguëni ëñaguëña. Ëñani, baguëni recoyo ai oire baguë, yua baguëna huë'huëni tëhuojaquëña. Tëhuojani, baguëre su'ncareba su'ncani muchaguë bojoguëña. ²¹ Ja'nca bojoguëna, mamaquëbi caguëña: "Taita, Riusure, më'ëre, ai gu'aye yo'ohuë yë'ë. Më'ë zin beoguë'ru huë'ena ti'anhuë yë'ë" caguëña. ²² Caguëna, pë'caguëbi baguëre yo'o con hua'nare choini, bacuani guansegüë caguëña: "Besa, re'o canre inni, baguëni sa'yejë'ën. Sutijeí ga'huare inni, baguë mëoñona jëojë'ën. Guëon ju'i corore inni, baguëni sa'yejë'ën. ²³ Ja'nrebi ja'an

toro bonsëguë jujusi'quëre zeanni huaijë'ën. Ai re'o aonre re'huani te'e ainjën bojoñuni. ²⁴ Yë'ë mamaquë junni senjose'e'ru ba'iguëbi go'ya raji'i. Sani huesësi'quëbi maina ti'an raji'i" caguë bojoguëña. Ja'nrebi si'a hua'nabi aonre re'huani, saññeña bojo bi'rareña.

²⁵ Ja'nca bojojënnä, yequë mamaquë ma'yë ba'iguëbi ziona saisi'quëbi huë'ena goquëña. Go'ini, huë'ena ti'anni achato, bain hua'nabi música huaijën, pairajën bojoreña. ²⁶ Ja'nca yo'ojënnä, ba hua'guë yua yo'o con hua'guëre choini, “¿Guere bojoye'ne raijeiye?” senni achaguëña. ²⁷ Senni achaguëña, “Më'ë yo'jeguëbi ti'anguëna, ejaguëbi toro bonsëguëre huani ainguë bojo güeseguëña, huajëguë ti'anse'ere bojoguë sëani” sehuoguëña. ²⁸ Sehuoguëña, ba ma'yëbi bëinreba bënquéña. Huë'e cacaye güeguëña. Güeguëña, pë'caguëbi etani, baguëni “Cacani bojoguë rani te'e conjë'ën” caguë, baguëni senreba senquéña. ²⁹ Senguëna, sehuoguëña baguë: “Bañë. Ai zoe ba'irën më'ë naconi ai jëja yo'o yo'oguë ba'iguë, më'ë yo'ore guanseguëña, gare go'kiye sehuoma'iguë baë'ë yë'ë. Ja'nca ba'iguë, yë'ë gaje hua'na naconi ñë'cani te'e bojoza caguëret'a'an, ro chivo bonsëguë se'gare yë'ëna gue insiye beoye baë'ë më'ë. ³⁰ Ja'an hua'guë'ga, më'ë mamaquë caguë, më'ë baye beoru ro coni sani, ro a'ta yo'oni, gu'a romi hua'nana ro insini senjosi'quë'bi. Ja'nca yo'oni se'e raquëna, më'ë yua ja'an toro bonsëguë jujusi'quëre ro huaicaë'ë baguëre” bëinguë caguëña. ³¹ Caguëna, pë'caguëbi sehuoguëña: “Mami, yë'ë naconi si'arëñ ba'iyë më'ë. Yë'ë bayere'ga më'ë'ga te'e bayë. ³² Ja'nca

masiguëta'an, yureña re'o aonre re'huani sa'ñeña te'e bojoñu cajën, tin yo'oye porema'iñë mai. Më'ë yo'jeguë junni senjose'e'ru ba'iguëbi go'ya raji'i. Huesësi'quë ba'iguëbi yua huajë hua'guë maina ti'an raji'i" caguë sehuoguëña. Ja'an ye'yo cocare fariseo bainni quëabi Jesús.

16

La parábola del mayordomo que abusó de la confianza

¹ Ja'nreëbi, Jesús yua baguëre yo'o con hua'nani ye'yo cocare yihuoguë cabi:

—Yequë ejaguë ta'yejeiye bonse ejaguë baquëña. Ja'nca ba'iguëbi yequëre baguë bonse re'huaguëte cuencueni baguëña. Baguëna, baguë bainbi baguëna ti'an rani quëareña: "Më'ë bonse re'huaguëbi më'ë curi carajeiye tëca ro insini senjoji" quëareña. ² Quëarena, ba hua'guëre choini, baguëni bëinguë senni achaguëña: "Më'ë ¿guere yo'oguë, yë'ë bonsere te'e ruiñe re'huama'iguë'ne? Yureca yë'ë bonse re'huase'e, më'ë yo'ose'e beoru cuencueni toyani, yë'ëna rani ëñojë'ën. Yë'ë bonsere quë'rë se'e re'huaye porema'iñë më'ë. Më'ëre gare etoza caguë yo'oyë yë'ë" caguëña. ³ Ja'nca caguëna, ba hua'guëbi ja'ansi'quë ro'taguëña: "Yë'ë ejaguëbi yë'ëre gare etotoca, ¿yë'ë guere yo'oye'ne? Yijana no'añe, ja'an yo'o yo'oye jëja beoyë yë'ë. Yequëcuani curi señe huaji yaye'ë yë'ëre. ⁴ Yua yë'ë yo'ojayete ro'tahuë. Yë'ë ejaguëni ro'ija'cuare yë'ë gaje hua'nare re'huaza cayë yë'ë. Ja'nca re'huani, ejaguëbi yë'ëre etoguëna, yë'ë yua bacua huë'ena ti'anguëna, yë'ëre bëa

güeseja'cua'ë” ro'taguëña baguë. ⁵ Ja'nca ro'tani, ja'nrebi baguë ejaguëni ro'ija'cuare te'enate, te'enate choi bi'raguëña. Choni, ru'ru ba'iguëbi ti'anguëna, “¿Yë'ë ejaguëni quejeiye ro'iye baguë'ne më'ë?” senyi achaguëña. ⁶ Senni achaguëna, sehuoguëña: “Olivo hui'yabe cien ro'rohuëanre ro'iye bayë yë'ë” sehuoguëña. Sehuoguëna, “Më'ë ro'iye cuencuesi ja'ohuare inni, besa cincuenta ro'rohuëan ro'iye toyajë'ën” caguëña. ⁷ Cani tonni, ja'nrebi yequëbi ti'anguëna, “Yë'ë ejaguëni ¿quejeiye ro'iye baguë'ne më'ë?” senyi achaguëña. Senni achaguëna, “Trigo aon cien ro'rohuëan ro'iye bayë yë'ë” sehuoguëña. Sehuoguëna, “Më'ë ro'iye cuencuesi ja'ohuare inni, ochenta ro'rohuëan ro'iye toyajë'ën” caguëña. Bacua ro'ija'yete gachoguëña. ⁸ Gachoguëna, ja'nrebi baguë ejaguëbi ja'an cuencuesi ja'orëanre ëñani ro'tani, ja'ansi'quë caguëña: “Ai masiye coquebi yë'ëre” caguëña. Aito. Ën yijare ba'iyie ye'yesi'cuabi yua Riusu bainreba ba'iyie'ru quë'rë ta'yejeiye masiye ro'tani yo'ocua'ë.

⁹ Ja'nca masiye yo'ocua ba'ijëenna, bacua ba'iyete ro'tajëen, mësacua'ga ën yija bonsere bajëen, ën yija gaje bainre re'huañu cajëen, ja'an bonsere bacuana huo'huejëen ro insijëen ba'ijë'ën. Ja'nca ro insijëen ba'icuabi ën yija bonse carajeiyete ëñani, Riusu guënamë re'totona ti'anni ëñato, ai bain gajecuabi mësacuani bojojëen ba'ija'cua'ë.

¹⁰ Mësacua'ga rëño bonse ma'carëan se'ga bajëen te'e ruiñe yo'ojëen banica, ai bonsere bani'ga, güina'ru te'e ruiñe yo'ojë'cua'ë. Rëño bonse ma'carëan bajëen, coquejëen yo'ojëen banica, ai

bonse bani'ga güina'ru coquejën yo'oja'cua'ë.
11 Mësacua'ga ën yija bonsere bajën, te'e ruiñe yo'oma'itoca, Riusubi baguë guënamë baye ¿queaca mësacuana jo'caja'guëguë'ne? **12** Yequëcua bonsere re'huacaijën, te'e ruiñe yo'oma'itoca, Riusubi baguë guënamë bayete mësacuana gare jo'caye beoye ba'ija'guë'bi.

13 Yo'o con hua'guëbi samu ejacuani bani, bacuani te'e coñe gare porema'iji. Ja'nca contoca, yequëni je'o baguë, yequëni ai yëreba yëji. Yequëni te'e ruiñe yo'o conguë, yequëni yo'o coñe güeji. Güina'ru, Riusuni yëreba yëjën coñe yënica, mësacua bonsere te'e yëye gare porema'iñë, cabi Jesús.

14 Caguëna, fariseo bainbi Jesús quëase'e si'aye achani, bonsere baye ai yëcua sëani, baguëni ai jayajën cahuë. **15** Jayajën cajënnna, Jesús sehuobi:

—Mësacua yua ëmëje'en ca'nco se'gare re'o bain ba'ije ro coquejën ëñojënnna, bain hua'nabi mësacuare re'oye ëñajën bojoyë. Riusu'ga mësacuare re'oye ëñama'iji. Mësacua gu'a recoyore ëñani, mësacua gu'aye yo'ojën ba'iyete masiji. Bain hua'nabi yequëcua ta'yejeiye ba'ije'ru ba'iyete re'oye ëñani bojojënnna, Riusu'ga tin ro'taguë, ja'an bojoma'iji. Gu'aye se'ga ba'iji caji Riusu.

La ley y el reino de Dios

16 Ru'ru, Moisesbi Riusu ira coca cani jo'case'ere bainna toyani jo'caguëna, ja'nrëbi jë'te, Riusu ira bain raosi'cuabi coca toyani jo'cajënnna, bain hua'nabi si'aye achani ye'yesi'cua baë'ë. Juan Batizaguë ba'irën tëca achani ye'yesi'cua ba'ijënnna, ja'nrëbi Riusubi baguë bojo güese coca, mame recoyo re'huani baguëna zi'inni bojojën ba'i coca

ja'an cocare cani acho bi'raguëna, si'a bainbi Riusuna ti'anni recoyo zi'inni ba'iñu cajën, baguë cocare si'a recoyo achani yo'o bi'rahuë. ¹⁷ Ja'nca ba'icuata'an, Riusu ira coca cani jo'case'ere gare carajei güeseye beoye jo'cabi Riusu. Guënamë re'oto, yija re'oto, ja'anbi ru'ru carajeija'guë'bi.

Jesús enseña sobre el divorcio

¹⁸ Bainguëbi baguë rënjo hua'gore jo'cani senjoni, ja'nrëbi yeconi huejani batoca, ro gu'aye yo'oye se'ga rëinji baguëre. Romigo jo'cani senjosi'coni huejani batoca, güina'ru ro gu'aye yo'oye se'ga rëinji.

El rico y Lázaro

¹⁹ Mësacua yua ñen cocare achani, Riusu yo'oguë ba'iya'yete masijë'ën. Yequë bonse ejaguë baquéña. Si'a umuguseña ai re'o caña me'najei cañare sa'yeguë, ai re'o aon se'gare caraye beoye ainguë bojoguë baquéña. ²⁰ Yequë'ga Lázaro hue'eguëbi bonse beo hua'guë si'a ga'nihuë ca'mi bu'isi'quë ba'iguë, yequëcuabi cuanni rajëenna, bonse ejaguë caca sa'ro ca'ncona bëani ejoguë baquéña. ²¹ Éja bainguë aon zi'nga mesabi to'inguëna, porenicia ja'anre coni anza caguë ro'taguë ñu'iguëna, yai hua'na'ga rani, baguë ca'mire ne'nején bateña. ²² Ja'nca ba'iguëbi ai yo'oguë, yequë umuguse junni huesëguëna, Riusu guënamë re'oto yo'o con hua'nabi gaje meni, baguëte cuanni, Riusu guënamë re'otona mëani, Riusu aon choisiruna bëa güesereña, Taita Abraham ca'ncona. Ja'nrëbi bonse ejaguë'ga junni huesëguëna, baguë bainbi baguëte tanreña. ²³ Tanrena, ba hua'guë yua ja'an gu'aruna ti'anni, ai ja'sireba uguë baguëña. Ja'nca

ba'iguëbi mëiñe ëñato, Taita Abraham baquëña. Lázaro'ga baguë ca'ncore ñuquëña. ²⁴ Ja'nca ñu'ijën ba'ijënnä, bonse ejaguëbi güiguë caguëña: "Taita Abraham, yë'ë hua'guëre oire bajë'ën. Ën toare ai ja'sireba uguëna, Lázarote yë'ëna raojë'ën. Baguë mëoñobi yua ocona tanni, yë'ë zemeñona ti'ntini sësaye se'ga yo'oja'guë" güiguë caguëña. ²⁵ Caguëña, Abrahambi sehuoguëña: "Më'ë yija ba'iguë ba'ise'ere ro'tajë'ën, mami. Më'ëbi ai re'oye ba'isi'quëbi me'najeiñe se'ga ba'iguëna, Lázarobi ai yo'oguë ba'isi hua'guëbi baji'i. Yureca, Riusubi baguëni oire bani conni bojo güeseguëna, më'ëreca uye se'ga ba'iji. ²⁶ Mai sa'ñeña ëñañe ai rëi yorobë ba'iguëna, më'ë ba'iruna saiye beoji ënjo'onbi. Güina'ru, më'ë ba'irubi etani ënjo'ona raiye gare porema'ïñë" sehuoguëña Abraham. ²⁷ Sehuoguëña, bonse ejaguë ba'isi'quëbi caguëña: "Ja'nca porema'itoca, ën cocare më'ëni senreba señë yë'ë. Lázarote cuencueni, yë'ë bain huë'ena saojë'ën. ²⁸ Yë'ë yo'je hua'na te'e ëntë sara hua'na ba'ijënnä, bacuana sani, bacua gu'a juchare jo'cani senjojë'ën caguë quëaja'guë. Yë'ë ai yo'oguë ba'i re'otona raima'ija'bë caguë, bacuani coca yihuoguëte saojë'ën, taita" caguë senquëña. ²⁹ Senguëña, Abraham sehuoguëña: "Saoye porema'ïñë. Më'ë bainbi Riusu coca, Moisés toyani jo'case'e, Riusu ira raosi'cua toyani jo'case'e, ja'an cocare bacua sëani, ja'an cocare ëñajën ye'yeja'bë. Ye'yetoca, bacua gu'a juchare jo'cani senjomä'ïñë yequërë" caguë sehuoguëña Abraham. ³⁰ Sehuoguëña, baguë caguëña: "Bañë. Ira coca case'ere achama'iñë, taita. Ju'insi'quëbi

etani sani, bacuani quëatoca, bacuabi achani mame recoyo re'huaja'cua'ë" caguëña.³¹ Caguëna, Abraham sehuoguëña: "Bañë. Moisés coca toyani jo'case'e, Riusu ira raosi'cua toyani jo'case'e, ja'anre ro achajën, te'e ruiñe yo'oye güetoca, ju'insi'quë etani sani quëaye'ga güina'ru ro achajën te'e ruiñe yo'oye güeja'cua'ë bacua" sehuoguë, baguëni coca cani tonguëña Abraham, quëabi Jesús.

17

El peligro de caer en pecado

¹ Ja'nca cani, ja'nrëbi baguëre yo'o con hua'nani yihuoguë cabi:

—Bain hua'nabi yequëcuani gu'a jucha yo'o güesejën, gare carajeiyе beoye gu'aye yo'ojën ba'icua'ë. Ja'nca ba'icuabi bënni senjoja'ñë se'ga ba'iji bacuare. ² Ëncua zin hua'nani iracuabi te'eguë se'gani gu'aye yo'oye ye'yoto, bacuare quë'rë ta'yejeiyе bënni senjose'e ba'ija'guë'bi. Jai to'obëbi bacua ñaje tècana gueonni, jai ziayana senjoni rëoto'ga, bacuare bënni senjoñë ti'anma'ija'guë'bi. ³ Ja'nca sëani, mësacua'ga ëñare bajëن, gare gu'aye yo'oye beoye ba'ijë'ën.

Yureca më'ë yo'je hua'guëbi më'ëni gu'aye yo'otoca, baguëni bojora'rë bëin coca yihuoguë cajë'ën. Ja'nca caguëna, baguëbi mame recoyo re'huani, baguë gu'a jucha yo'ose'ere jo'cani, më'ë huanë yeni ro'tama'iñete sentoca, baguë gu'a juchare huanë yeni baguëni te'e bojoguë ba'ijë'ën. ⁴ Ja'ansi umuguse te'e ñëntë sara samu ba'kiye më'ëni gu'aye yo'oni, ja'nrëbi më'ëni senni

achaguë, Gu'aye yo'ohuë yë'ë. Se'e ro'tama'ijë'ën quëani sentoca, baguë gu'a jucha yo'ose'ere caraye beoye huanë yeyete sehuoni re'huani, baguëni bojoguë ba'ijë'ën, yihuoguë cabi Jesús.

El poder de la fe

⁵ Caguëna, ja'nërëbi baguëre ta'yejeiye yo'o concuabi baguëna ti'an rani, baguëni senni achahuë:

—Yëquënani quë'rë ta'yejeiye recoyo ro'taye conjë'ën, sen'ë.

⁶ Senjëenna, sehuobi:

—Recoyo ta'yejeiye ro'taye yëtoca, mostazara'carëte ro'tani masijë'ën. Ai zinra'carëte sëani, ta'yejeiye irani, jai sunquiñë ruinji. Mësacua'ga güina'ru ta'yejeiye recoyo ro'tajëن ba'itoca, ai ta'yejeiye yo'oye porëyë mësacua. Ën sunquiñë sicómoroñëna coca cani guanseye poreyë: “Ja'ansi sunquiñë si'a seihuë têtëni, huëni, jai ziayana sani tonni ruijë'ën” ja'an cocare cani guansetoca, bañë se'gabi achani ja'anse'e yo'oji.

El deber del que sirve

⁷ Mësacua yua yo'o con hua'na yo'oye bayete ro'tani masijë'ën. Ëja bainguëre yo'o con hua'guëbi baguë yo'ore yo'oguë, zio yijare re'huani, oveja jo'yare cuirani, ja'an yo'ore yo'oni na'ijani, ja'nërëbi huë'ena go'ini ba'iguëna, ba ejaguë coca baguëre caguë'ne? “Besa rani, më'ë aonre ainjë'ën” caguë? ⁸ Banji. “Besa, yë'ë aonre re'huani, yë'ëre aonjë'ën. Yë'ë aonre ainguë, yë'ë gonore uncuguë ba'iguëna, më'ë yua yë'ë yëyete injani rani insijë'ën. Yë'ë aon anni têjiguëna, ja'nërëbi yo'je, më'ëbi aiñe poreyë”

ja'anre guanseguë caji éja bainguë. ⁹ Éja bainguëbi guanseguëna, yo'o con hua'guëbi si'aye te'e ruiñe yo'oni tējiguëna, ejaguëbi ¿guere caguë'ne? "Surupa. Ai re'oye yo'ohuë më'ë" gare caye beoye ba'iji bain ejaguë. ¹⁰ Ja'nca ba'iguëna, mësacua'ga Riusu yo'ore yo'o conjën, si'aye yo'oni tējini, ñaca cajën ba'ijé'ën: "Yéquëna hua'nare yua Riusu yo'o con hua'na se'ga ba'ijén, gare ta'yejeiye beoye ba'icua'ë" cajën ba'ijé'ën, cabi Jesús.

Jesús sana a diez leprosos

¹¹ Ja'nrëbi Jesusbi se'e sai bi'raguë, Samaria, Galilea, ja'an yijañabi saj'i'i. ¹² Sani, yequë huë'e jo'borëna ti'anni éñato, ira ca'mi rauna ju'incua si'a saracuabi baguëna tēhuo raë'ë. Tēhuo rani, so'orëbi éñajën, ¹³ baguëni si'a jéja güijén cahuë:

—Éjaguë Jesús, yéquënani oireba oiguë conjë'ën güijén cahuë.

¹⁴ Ja'nca cajënnna, Jesusbi sehuobi:

—Mësacua yua pairi hua'na quë'rona sani, pairini éñojë'ën, caguë sehuobi Jesús.

Sehuoguëna, bacuabi sai bi'rajén, ma'aja'an saijën, éñatoca, yua ja'si ténosi'cua baë'ë. ¹⁵ Ténosi'cua ba'ijënnna, bacua jubë te'eguëbi Jesusna bonëni raiguë, Riusuni ta'yejeiyereba bojoguë güiguë quëaguë baj'i'i. ¹⁶ Ja'nca quëaguë ba'iguë, Jesús ba'iruna ti'anni, baguë guëon na'mi ca'ncona gugurini, meñe rëanni Jesusni bojoguë, Surupa caguë baj'i'i. Ja'an ba'iguëbi Samaria yija bainguë baj'i'i. ¹⁷ Ja'nca bojoguë caguëna, Jesús yua bain jubëni cabi:

—Ira ca'mi rauna ju'incua si'a saracua ba'icuani huachohuë yë'ë. ¿Yequëcua nuevecua guere

yo'ojén surupa cajén rimate'ne? **18** Ën hua'guë se'ga, tin yija bainguë ba'iguëbi Riusuni surupa caguë, Riusuni bojoguë rají'i. Yequécua'ga raimaë'ë cabi Jesús.

19 Cani, ja'nrebi huachosi'quëni cabi:

—Yua huëni saije'ën. Më'ëbi yë'ëni si'a recoyo ro'tasi'quë sëani, huajé raisi'quë'ë më'ë, cabi Jesús.

Cómo llegará el reino de Dios

20 Caguëna, fariseo bainbi baguëna ti'anni, baguëni senni achahuë:

—Riusu bainreba mame re'huani baja'ye ¿quejeito ti'anguë'ne? senni achahuë.

Senni achajënnä, Jesús sehuobi:

—Ja'anrën ti'anguëna, bain hua'nabi ëñañë porema'ija'cua'ë. **21** Ja'anrën ti'anguëna, bain hua'nabi Riusu ba'iyete recoyo huanöñe ba'ija'cua'ë. Ja'nca sëani, yequécuabi ro ro'tajén, “Ënjo'ona ti'anni ba'iji Riusu” cajén, o “Ja'anruna ti'anni ba'iji Riusu” cajén, ja'an cocare caja'cuabi ro huacha caja'cua'ë sehuobi Jesús.

22 Ja'nca sehuoni ja'nrebi, baguëre yo'o concuani yihuoguë quëabi:

—Mësacua yua yë'ë, Riusu Raosi'quëreba ba'iguë, yë'ë gaje rairënre ëñajén ëjojén, ja'an umuguse raija'yete ai cu'e ëaye ba'ija'cuareta'an, yë'ë ti'an raiye yuta caraguë ba'ija'guë'bi mësacuare.

23 Ja'nca ba'iguëna, yequécuabi rani, mësacuani coquején caja'cua'ë: “Riusu Raosi'quëbi ti'anbi. Ënjo'on ba'iji” catoca, o “Ja'anruna sani ëñañu” catoca, mësacua yua gare achamajén, bacua cayete yo'omajén ba'ijé'ën. **24** Yë'ë yua Riusu Raosi'quëreba ba'iguëbi ti'an rai bi'ruguë, te'e jéana

gaje raiguëna, si'a bainbi ëñañe poreja'cua'ë. Méjo jue'nени si'a guënamë re'oto miañete ro'tani, yë'ë ti'an raija'yete masijë'ën. ²⁵ Ja'nca ti'an raija'guë'ga yureca ta'yejeiye ai yo'oguë ba'ija'guë'ë yë'ë. Yureña bainbi yë'ëre gu'a güejën senjojënnä, ai yo'oguë ba'ija'guë'ë yë'ë. ²⁶ Yureca, yë'ë ti'an rai umuguse yua Noé ba'isi umuguseña'ru güina'ru ba'ija'guë'bi. ²⁷ Bain hua'nabi bacua aonre ainjën, bacua gonore uncujën, romi huejajën, ro bacua yëse'e yo'ojënnä, ja'nrébi Noé yoguna cacajën ba'i umuguse te'e jëana ti'anbi. Cacani ba'iguëna, ja'nrébi ziaya co'je raguëna, ja'an bain hua'na si'a hua'nabi rucani carajaë'ë. ²⁸ Yë'ë ti'an rai umuguse ba'ija'yete masiye yënicä, Lot ba'isi umuguseñare'ga ro'tajë'ën. Ja'anrën bain'ga bacua aonre ainjën, bacua gonore uncujën, bonsere coni bajën, bonsere bendiejën, bacua zioñare tanjën, bacua huë'eñare yo'ojën, ro bacua yëse'e yo'ojën baë'ë. ²⁹ Yo'ojën ba'ijënnä, Lotbi Sodoma huë'e jobobi gare saiguëna, ja'ansi umuguse Riusu toabi bacuana joë ba'irënbì tonni ñobi. Toa zi'nga, toa gata, ju'ju sëñe ba'iguë guënamë re'otobi ai ja'suye tonni, si'a bainre joë ba'irënbì gare carajei güesebi Riusu. ³⁰ Ja'nca ba'iguëna, yë'ë'ga bainna ti'an rai bi'raguë, güina'ru joë ba'irënbì ti'anja'guë'ë yë'ë.

³¹ Ja'nca ti'an raiguëna, huë'e hue'se ca'ncore ñu'ijëñ ba'icua'ga bacua bonsere cacani inma'ija'bë. Ziore ba'icua'ga güina'ru huë'ena go'ima'ija'bë. ³² Lot rënjo yo'ogo ba'ise'ere ro'tani, bago yo'ose'ere yo'oma'ijë'ën. ³³ Mësacua se'gabi re'oye baza cajën ro'tajën ba'icua'ga ro huesëni carajeija'cua'ë. Mësacua ba'iyete

ro'tamajën, Riusuni coñe se'gare yo'oza cajën ro'tajën ba'icuabi gare carajeiye beoye ba'ija'cua'ë mësacua.

³⁴ Yë'ë ti'an rai umugusere cato, ja'ansi ñami samucuabi te'e camana cainjën ba'ijënnna, te'eguëte in rani saja'guë'ë yë'ë. Yequëre jo'caja'guë'ë. ³⁵ Romi hua'na samucuabi te'erute ba'ijënn hueare toajënnna, te'egore in rani saja'guë'ë. Yecore jo'caja'guë'ë. ³⁶ Ëmëcua samucuabi ziore ba'ijënn te'e yo'ore yo'ojënnna, te'eguëre in rani saja'guë'ë. Yequëre jo'caja'guë'ë yë'ë, quëabi Jesús.

³⁷ Quëaguëna, bacuabi achani, baguëni senni achahuë:

—¿Ja'an ba'ija'yete cato jarona ti'anja'guë'ne më'ë, Ëjaguë? senni achahuë.

Senni achajënnna, sehuobi:

—Huayo hua'na ñë'ca raiye'ru ba'ija'guë'bi. Ga'nihuëbi pu'ncaguë uinguëna, ba hua'nabi ñë'ca raiyë. Güina'ru, gu'a jucha jo'caye beoye yo'ojënn ba'icua ba'ijënnna, Riusubi yua te'e jéana bënni senjoguë raija'guë'bi, sehuobi Jesús.

18

La parábola de la viuda y el juez

¹ Sehuoni ja'nrébi bacuani ye'yo cocare quëabi:

—Mësacua yua Taita Riusuni ujajën, gare jo'caye beoye baguëni senreba senni achajën ba'ijë'ën. Ja'anre te'e ruiñe yo'ojënn ba'ijë'ën caguë, en cocare quëani achoguëna, achani yo'ojënn ba'ijë'ën. ² Yequë huë'e jobo ejaguë baquëña. Ja'nca ba'iguëbi Riusuni re'oye ëñama'iguë baquëña. Bain hua'nare'ga re'oye ëñama'iguë baquëña. ³ Hua'je

hua'go'ga ja'an jobore ba'igobi, yequëbi bagoni ai je'o baguëna, ja'an ejaguëna sani, baguë coñete senreba senni achago bacoña.⁴ Jo'caye beoye si'a umuguseña senni achago ba'igona, ejaguëbi coñe güeguë ba'isi'quëbi bago señete ya'jani, ja'ansi'quë ro'taguëña: "Yë'ë yua Riusuni re'oye ro'tama'iguë, bainre'ga re'oye ëñama'iguëta'an,⁵ ja'an hua'je hua'gobi yë'ëni ai raijera senni achago raigona, ai ya'jahuë yë'ë. Bago yua se'e hui'ya senni achago raima'ija'go caguë, bago sense'e'ru conja'guë'ë yë'ë" cani conguëña.

⁶ Gu'a ejaguëbi ja'nca bagoni conguëna, mësacua'ga Riusu coñete ro'tajën ba'ijë'ën. ⁷ Mësacua yua Riusu bainreba cuencuesi'cua ba'ijëen, baguëni na'ijani ñatajani senreba senni achajën ba'ijëenna, mësacuani gare ejoye beoye conreba conguë ba'ija'guë'bi. ⁸ Aito. Mësacuani te'e jëana conja'guë'bi Riusu. Ja'nca conguë ba'ija'guëta'an, yë'ë, Riusu Raosi'quëreba ba'iguëbi se'e raiguëna, ijarcuabi Riusuni si'a recoyo ro'tajën, baguëni jo'caye beoye coca senni achajën ba'ija'cua'ne? ¿Yequerë yë'ëni recoyo ro'tajën ujacuabi carajeima'ija'cua'ne? cabi.

La parábola del fariseo y el cobrador de impuestos

⁹ Caguëna, ja'nrëbi yequëcua re'o bain ba'iye cacuabi ti'anhuë. Ti'ancuabi yequëcua ba'iyete gu'aye cacua baë'ë. Ja'nca ba'icuabi ti'anjëenna, Jesusbi ye'yo cocare bacuani cani achobi:

¹⁰ —Samu bain hua'na ëmëcuabi Riusu huë'ena cacani, Riusuni ujareña. Te'eguë yua fariseo ba'iguëna, yequë yua impuesto curi ro'iye coguë

baquëña. **11** Ja'an fariseo hua'guëbi cacani nëcaguë, ñaca ujaguëña: “Ah, Taita Riusu, më'ëni ai boguë, më'ëni surupa cayë yë'ë. Yequëcua gu'a bain, bonse jiancua, ro coquecua, romicua ëmëcua sa'ñeña ro a'ta yo'o ëaye ba'icua, bacua yo'o jën ba'iyeru yo'oma'iguë'ë yë'ë. Ènqué'ga impuesto curi ro'iyeru co hua'guë, baguë gu'aye yo'oguë ba'iyeru gare gu'aye yo'oma'iguë'ë yë'ë, re'o bain-guë sëani. **12** Yë'ë re'oye yo'oguë ba'iyete cato, ga semana ba'iyeru samu umuguseña aon aiñe jo'caguë, si'a yë'ë curi coni base'ere èñani, décima parte ñë'serë ba'iyete cuencueni më'ëna ro insiguë yo'oye yë'ë” ujaguë caguëña fariseo hua'guë.

13 Caguëña, impuesto curi ro'iyeru coguëbi ca'nco se'gare ba'iguë, Riusu ta'yejeiyereba ba'iyete te'e ruiñereba ro'taguë, yi ja se'gare èñaguë, baguë coribana ai sa'ntiguë huaiguë, Riusuni ujaguë caguëña: “Ja'qué Riusu, yë'ë hua'guë ro gu'a hua'guë se'ga ba'iguëret'a'an, yë'ëni oire baguë conjë'ën” ujaguë caguëña. **14** Ja'nca ujajën cajënnna, mësacuani yihuoguë quëayë yë'ë. Ba samucua si'a jubëbi huë'na go'ijënnna, Riusubi ja'an impuesto curi ro'iyeru coguë se'gani re'oye èñaguë bojo güesebi. Fariseo hua'guëca banbi. Si'a bain re'o bain ba'iyeru ta'yejeiyeru cacua ba'ijënnna, Riusubi bacuare èñani, ta'yejeiyeru beo hua'nare bacuare re'huani jo'caji. Si'a bain Ro ta'yejeiyeru beo hua'guë'ë yë'ë cajën ba'ijënnna, Riusubi bacuare èñani, baguë ta'yejeiyeru re'o bainre bacuare re'huani bají, quëabi Jesú.

Jesús bendice a los niños

15 Ja'nrëbi bain hua'nabi bacua zin hua'nare Jesusna sani, Bacuani re'oye pa'roja'guë cajën, ti'an bi'rajënnna, Jesusre yo'o con hua'nabi bainni bëin coca cajën, bacuani ënsehuë. **16** Ënsejënnna, Jesusbi bain hua'na raiye choiguë, baguëre yo'o con hua'nani cabi:

—Zin hua'nabi yë'ëna raijënnna, ënseye beoye ba'ijë'ën. Riusu ba'i jobo ba'ija'yete ëñato, ëncua zin hua'na ba'ije'ru si'a jubë ba'ija'cua'ë. **17** Ja'nca sëani, mësacua re'oye ro'tajën yë'ë bainreba ba'ija'yete masijë'ën. Riusu bainreba ba'ije yëcuabi zin hua'na ro'tajën ti'anja'ñe'ru güina'ru te'e ruiñe ro'tajën ti'anma'itoca, Riusu ba'i jobona ti'añe gare porema'ija'cua'ë, cabi Jesús.

Un hombre rico habla con Jesús

18 Ja'nrëbi judío ëja bainguëbi ti'anni, Jesusni senni achabi:

—Ëjaguë, më'ëbi re'o bainguë sëani, yë'ë senni achayete quëajë'ën. Yë'ë'ga Riusu bainguë runni baguë naconi carajekiye beoye ba'ijaza caguë, ¿gue yo'ore yo'oye baye'ne yë'ë? senni achabi.

19 Senni achaguëna, Jesús sehuobi:

—¿Më'ë queaca ro'taguë, yë'ëre re'o bainguë ba'ije caguë'ne? Riusu se'gabi re'oguë ba'iguë'bi. Yequëcua bañë. **20** Ja'nca sëani, Riusu coca guansení jo'case'ere ro'taguë, ja'anre te'e ruiñe yo'oguë ba'ijë'ën: “Romini yahue bani a'ta yo'oma'iñe, bainni huani senjoma'iñe, bonsere jianma'iñe, bain ba'iyete ro coquejën cama'iñe, pë'caguë sanhuëni te'e ruiñe ëñañe” ja'anre te'e ruiñe yo'oguë ba'ijë'ën më'ë'ga, cabi Jesús.

21 Caguëna, ba hua'guë sehuobi:

—Ja'anre yë'ë zinrënnna caraye beoye yo'oguë ba'iyë yë'ë sehuobi.

²² Sehuoguëna, Jesusbi achani, baguëni cabi:

—Ja'nca yo'oguëta'an, yeque yo'o yo'oye se'ga caraji më'ëre. Më'ë bonse beoru insini, curi coni, bonse beo hua'nana ro insijë'en. Ro insiguëna, Riusubi baguë guënamë re'oto bayete më'ëna ai insireba insija'guë'bi. Më'ë ën yija bonsere ja'nca gare insini jo'cani, ja'nrébi yë'ëni te'e conguë raijë'en, cabi Jesús.

²³ Caguëna, baguëbi achani, ai bonse baguë sëani, ro sa'nti hua'guë runji'i. ²⁴ Ja'nca ruinguëna, Jesusbi cabi:

—Yua ai bonse bacuabi Riusu ba'i jobona ti'anni ba'i ëaye yo'ojën, ai guaja yo'ojën ba'iyë. ²⁵ Camello hua'nabi guëna miu gojena cacani etajei ëaye yo'oto, ai guaja yo'oyë. Bonse bacua'ga Riusu ba'i jobona ti'anni ba'i ëaye yo'oto, quë'rë ta'yejeiye guaja yo'oyë bacua, cabi.

²⁶ Caguëna, ja'anre achacuabi baguëni cajëni senni achahuë:

—Ja'nca ba'itoca, ñjarocuabi Riusu ba'i jobona ti'añe poreye'ne? cajëni senni achahuë.

²⁷ Senni achajënnna, Jesús sehuobi:

—Bain hua'nabi ro yo'ojën, ta'yejeiye yo'oye porema'icuata'an, Riusubi si'aye ai ta'yejeiyereba yo'oye poreji, sehuobi.

²⁸ Caguë sehuoguëna, ja'nrébi Pedrobi cabi:

—Ëjaguë, yëquënabi si'aye gare jo'cani, më'ëni yo'o conjëni, recoyo te'e zi'inhue cabi.

²⁹ Caguëna, Jesús sehuobi:

—Mësacuani ganreba caguë quëayë yë'ë. Bain hua'nabi Riusu yo'o case'e se'gare yo'oza cajëni,

bacua baye si'aye gare jo'cajën, bacua huë'e, pë'caguë sanhuë, ma'yë sanhuë, yo'je hua'na, rënjo hua'go, zin hua'na, ja'an si'ayete gare cu'e ëaye beoye jo'catoca, ³⁰ Riusubi quë'rë ta'yejeiye ai insireba insija'guë'bi. Ën yija baye, guënamë re'oto baja'ye, ja'anre quë'rë ta'yejeiye ai insireba insiguë, bacuani baguë naconi gare carajeiye beoye ba'i güeseja'guë'bi Riusu, cabi Jesús.

Jesús anuncia por tercera vez su muerte

³¹ Ja'nca cani, ja'nrëbi baguëre yo'o concuare ca'ncona sani, bacuani quëabi:

—Yureca mai hua'nabi Jerusalén huë'e jobona saiyü. Ja'nca sani, ti'anni ba'ijënnä, ja'an bain hua'nabi yë'ëni ai yo'o güeseja'cua'ë. Riusu ira bain raosi'cua toyani jo'case'e si'aye cani jo'case'e'ru güina'ru yo'ojën, yë'ëre Riusu Raosi'quëreba ba'iguëre ai yo'o güeseja'cua'ë. ³² Yë'ëre zeanni, judío bain jubë ba'ima'icuana insini senjojënnä, bacuabi yë'ëni jayajën, yë'ëre ai gu'aye yo'ojën, yë'ëre go tutujën yo'oja'cua'ë. ³³ Ja'nca yo'oni, ja'nrëbi ga'ni za'zabobi inni, yë'ëre si'nsemi tëjini, ja'nrëbi yë'ëre huani senjoja'cua'ë. Huani senjojënnä, samute umuguseña ba'ini, ja'nrëbi go'ya raija'guë'ë yë'ë, cabi.

³⁴ Caguëna, ba hua'nabi ro huesë ëaye achahuë. Tin acho coca caguëre sëani, gare masiye porema'iñë mai, sa'ñeña cahuë.

Jesús sana a un ciego en Jericó

³⁵ Ja'nca cajën, Jericó huë'e jobona ti'an bi'rajënnä, ñaco ñama'iguëbi bacua ma'a yëruhuare ba'iguë, bain hua'nani curi so'coréanre senni achaguë ñuji'i. ³⁶ Ja'nca ñu'iguëbi achaguë, ai jai

jubë bain saijënnna, bacuani ¿Mësacua guere ëñajën saiye'ne? senni achaguëna, ³⁷ Jesùs Nazarenobi raiji sehuojënnna, ³⁸ ba hua'guë yua, ai jëja güiguë cabi:

—Yë'ë bainguë Jesùs, David yo'je raisi'quë, yë'ë hua'guëre oireba oiguë conjë'ën ai jëja güiguë cabi.

³⁹ Ja'nca güiguëna, Jesùs ru'ru saicuabi baguëni bëinjën, Güiye beoye ba'ijë'ën cahuë. Cacuata'an, ba hua'guë yua quë'rë ta'yejeiye güiguë cabi:

—David bainguë yo'je raisi'quë, yë'ë hua'guëre oireba oiguë conjë'ën, güiguë cabi.

⁴⁰ Ja'nca güiguë caguëna, Jesusbi nëcajani, Ja'an hua'guëre yë'ëna rajë'ën caguëna, baguëre cuanni rahuë. Rajënnna, Jesusbi baguëni senni achabi:

⁴¹ —¿Guere yë'ëre senni achaguë'ne më'ë? senni achabi.

Senni achaguëna, sehuobi:

—Ëjaguë, yë'ëre ñaco ëña ëaji, sehuobi.

⁴² Sehuoguëna, Jesùs cabi:

—Më'ë ñaco ëñaguë ba'ijë'ën. Yë'ëni si'a recoyo ro'taguë sëani, huajë raë'ë më'ë, cabi.

⁴³ Caguëna, ja'ansirën ñaco sëtani ëñabi. Riusuni ai bojoguë, surupa caguë, Jesusni te'e conguë saj'i'i. Ja'nca bojoguëna, bain hua'na'ga baguë ñaco sëtase'ere ëñani, Riusuni ai ta'yejeiye bojohuë.

19

Jesùs y Zaqueo

¹ Ja'nrebi, Jesusbi se'e sani, Jericó huë'e jobona ti'anni, yequë ca'ncobi etani sai bi'raguëna, ² ai bonse ëja bainguë Zaqueo hue'eguëbi baj'i'i. Impuesto curi ro'kiye cocua, bacua ëjaguë baj'i'i.

³ Ja'nca ba'iguëbi Jesusni eñani masiza caguë, bë'je hua'guë sëani, bain ñë'casi jubë ba'ijënnna, ti'anni eñañe gare poremaquë bajl'i. ⁴ Ja'nca eñañe porema'iguëbi quë'rë ru'ru huë'huëni, sicómoro sunquiñë Jesús rai ma'a yëruhua ba'iguëna, tinja mëni ejobi. ⁵ Éjoguë tuiguëna, Jesusbi ti'anni, ñaco mëñe, Zaqueoni eñani cabi:

—Zaqueo, besa gajeni, yë'ë naconi raijë'ën. Yure umuguse më'ë huë'ena bëaye bayë yë'ë, caguë choji'i.

⁶ Caguë choiguëna, Zaquéobi querë gajeni, Jesusni ai bojoguë, baguë huë'ena sabi. ⁷ Ja'nca saguëna, bain hua'nabi ai bëinjën eñajën, sa'ñeña cahuë:

—Ro gu'a bainguë huë'ena cacani bëaza caguë yo'oji baguë, cahuë.

⁸ Ja'nrébi, Zaquéobi baguë huë'ere ba'iguë, Jesusni te'e ruiñë ro'taguë cabi:

—Éjaguë, yë'ë bonse, jobo ba'iyé quëñoni, bonse beo hua'nana ro insija'guë'ë yë'ë. Yequecuare'ga, yë'ë coqueguë têtesi'cua ba'icuare'ga, gajese'ga ba'iyé bacua curire quë'rë se'e ba'iyé go'yaja'guë'ë yë'ë, cabi.

⁹ Caguëna, Jesusbi quëabi:

—Enquë yua Taita Abraham bainguërebare sëani, Riusubi baguë recoyo ro'tayete eñani, baguë bain-guëre re'huani babi yure umuguse. ¹⁰ Yë'ë yua Riusu Raosi'quëreba ba'iguëbi bain hua'na so'ona sani huesësi'cuani cu'ezza caguë, bacuare tëani baye ro'taguë raisi'quë'ë yë'ë, cabi.

La parábola del dinero

¹¹ Ja'nrëbi, Jesusbi se'e sani, Jerusalén huë'e jobo tēca sani ti'an bi'raguëna, baguë naconi saicua, Zaqueoni coca case'ere achasi'cuabi ro'tajën, "Riusu ba'i jobo yua te'e jéana ñaja'ñeta'an ba'iji maire" ro'tajën ba'ijëんな, Jesusbi bacuani ye'yo cocare ¹² quëa bi'rabi:

—Yequë bainguë, ta'yejeiye ëja bain jubë ba'iguëbi baquéña. Ja'nca ba'iguëbi ja'ansi'quë ro'taguë, "Quë'rë ta'yejeiye ëja bain huë'e jobona sani, ñenj'on bain ta'yejeiye ñaguë runni, ja'nrëbi rani bainni guanse bi'raja'guë'ë yë'ë" caguëña. ¹³ Ja'nca cani, sai bi'raguë, baguëre yo'o concua si'a saracuare choiguëña, rateña. Ratena, ga bainguëna curi so'cohua ai ro'i so'cohua insini, bacuani yihuoguë caguëña: "Mësacua curi so'cohua sani, bonsere coni bendiejën, Curi so'cohua quë'rë jaijeija'guë cajën, yë'ë se'e raiye tēca quë'rë beyojën ba'ijë'ën" cani tonni, ja'nrëbi bacuare jo'cani saquéña. ¹⁴ Saquëña, baguë yija bain ai jai jubëbi baguëni gu'a güejën, bacua bain hua'na rëño jurëte cuencueni, ñaguë saijai jobona saojën, ta'yejeiye ëja bainni quëa güesereña: "Ja'an saiguëni gu'a güecua sëani, yëquëna ta'yejeiye ñaguëte baguëre re'huama'ijë'ën" cajën saoreña. ¹⁵ Ja'nca cajën saocuareta'an, bacua ta'yejeiye ñaguëre re'huasi'quë ba'iguëna, baguë yijana goquëña. Go'ini, ti'anni, ja'nrëbi baguëre yo'o concuare, baguë curi so'coñare insisi'cuare choiguë, bacua curi jaijeise'ere achani masiza caguë choquëña bacuare. ¹⁶ Choiguëña, ru'ru ba'iguëbi ti'anni quëaguëña: "Ñaguë, më'ë curi so'cohua naconi bonse cojani bendieni, si'a

sara so'coñare se'e coni bahuë yë'ë" quëaguëña.
 17 Quëaguëna, ejaguëbi sehuoguëña: "Ai re'oye yo'oguë, curi jaijei güesehuë më'ë. Yë'ë choa so'cohua se'ga naconi ai jaijei güesesesi'quëre sëani, si'a sara huë'e joboñare më'ëna jo'caja'guë'ë yë'ë. Jo'caguëna, ja'an bainni ëñaguë guanseguë ba'ijë'ën" cani, baguëre saoguëña. 18 Saoguëna, samu ba'iguëbi ti'anni quëaguëña: "Ëjaguë, më'ë curi so'cohua naconi bonse cojani bendieni, te'e ëntë sara so'coñare se'e jaijeini coni bahuë yë'ë" quëaguëña. 19 Quëaguëna, ejaguëbi sehuoguëña: "Re'oji. Ja'nca jaijei güesesesi'quëre sëani, te'e ëntë sara huë'e joboñare më'ëna jo'caja'guë'ë yë'ë. Ja'an bainni ëñaguë guanseguë ba'ijë'ën" caguë, baguëre saoguëña. 20 Saoguëna, ja'nrëbi yequë yo'o con hua'guëbi ti'an rani quëaguëña: "Ëjaguë, më'ë curi so'cohua insise'e, ja'ansi so'cohuhare coni bajë'ën. Can të'térëna reani gueonni re'huani bacaë'ë yë'ë. Ja'ansi so'cohuhare më'ëna go'yayë yë'ë. 21 Më'ë yua ai huaji yaguë ejaguëre sëani, më'ë curi insise'ere jaijei güeseye ai huaji yëguë baë'ë yë'ë. Më'ëbi ai jëja guanseguë sëani, yequëcua yo'o yo'ose'ere tëani bayë më'ë. Yequëcua tanse'ere'ga tëani bayë më'ë" caguëña.
 22 Caguëna, ejaguëbi ai bëinguë sehuoguëña: "Ai gu'aye yo'oguë, yë'ëre re'oye conmaë'ë më'ë. Më'ë coca case'e se'gare achani, më'ëre bënni senjoñe bayë yë'ë. Më'ë yua yë'ë ba'iyete ja'nca masiguë, Ai jëja guanseguë yequëcua yo'o yo'ose'ere tëani bayë yë'ë caguë, 23 më'ë ¿queaca yo'oguë, yë'ë curi insise'ere curi re'hua huë'ena jo'camaquë'ne? Jo'catoca, yë'ëbi raiguëña,

ja'an curi quë'rë jaijeiguëna, coni bare'ahuë yë'ë" bëinguë caguëña. ²⁴ Cani, ja'nrebi baguë bain ja'anrute nëcacuani guanseguëñña: "Baguë curi so'cohuate tëani, si'a sara so'coña baguëna insijë'ën" caguë guanseguëñña. ²⁵ Guanseguëna, ba hua'nabi sehuojën senni achareñña: "Éjaguë, më'ë ¿queaca ro'taguë, si'a sara so'coña baguëna quë'rë ta'yejeiye insiye ro'taguë'ne?" senreñña. ²⁶ Senjënnna, sehuoguëñña: "Mësacuani ganreba quëayë yë'ë. Ai jaijeiye re'huani baguëna quë'rë se'e ai insise'e ba'ija'guë'bi. Choa ma'carë se'gare baguëna, baguë baye si'ayete tëase'e ba'ija'guë'bi. ²⁷ Yureca yë'ëni gu'a güesi'cuare te'e jëana zeanjani rajë'ën. Bacuabi yë'ëre gu'a güejën, bacua ta'yejeiye ejaguë ba'ima'ija'guë casi'cuare yë'ë ba'iruna rani, bacuani huani senjojë'ën" caguë guanseguëñña, quëabi Jesús.

Jesús entra en Jerusalén

²⁸ Ja'nca quëani, Jerusalén ma'aja'an se'e sani ti'an bi'rabi. ²⁹ Ti'an bi'raguëbi baru so'o ca'ncoñare ñato, Betfagé, Betania, ja'an huë'e jo'borëan baj'i. Olivo cubë casirute ba'iguëna, baguëre yo'o concua samucuare choini, ³⁰ bacuani quëabi:

—Mësacua yua ja'an huë'e jo'borëna saijë'ën. Sani ti'anni, burro hua'guë bonsëguë yoni rëonsi'quëni ñaja'cua'ë. Yuta bain tuama'iguë, ja'anguëni ñani jo'chini rajë'ën. ³¹ Ja'nca jo'chi bi'rajënnna, yequëcuabi "¿Mësacua guere yo'ojën, baguëte jo'chini saye'ne?" Ja'nca senni achatoca, "Mai Éjaguëbi baguëte yëji" cajën sehuojë'ën, cabi Jesús.

32 Caguëna, bacuabi sani ëñato, Jesús quëase'e'ru güina'ru baji'i. **33** Ja'nca ba'iguëna, burro hua'guëre jo'chijënnä, ba burro bacuabi senni achahuë:

—¿Mësacua guere yo'ojën, burro hua'guëre jo'chiye'ne? senni achahuë.

34 Senni achajënnä:

—Mai Ëjaguëbi baguëte yëji, sehuohuë.

35 Ja'nca sehuoni, burro hua'guëre sani, Jesusna ti'anni insihuë. Insini, bacua guayoni se canre burro guérëbëna tëoni, ja'nrébi Jesusni tua güesehuë. **36** Tua güesení, Jesús yua Jerusalén ti'añe cueñe saiguëna, bacua guayoni se cañare baguë ru'ru sai ma'ana jaoni uan bi'rahuë. **37** Uan bi'rajënnä, ja'nrébi Jerusalenna ti'anni, Olivo cubë jaba ba'irute ba'iguëna, baguëre yo'o con hua'na te'e ai jai jubë ba'icua baguëre concuabi Taita Riusuni ai bojoreba bojojën, Cristo ta'yejeiye yo'oguë ba'ise'ere quëajën, **38** si'a jëja güini achohuë:

—Riusubi bojoguë raoguëna, mai ta'yejeiyereba ëjaguëbi maina ti'an rají'i. Ja'nca sëani, güenamë re'oto ba'icua si'acua ai bojoreba bojojën bañuni. Mai ta'yejeiyereba ëjaguë Riusuni ai éama'iñereba bojojën cañuni, güireba güijën cahuë bacua.

39 Cajënnä, fariseo hua'na, bain jubë naconi saicuabi Jesusni bëinjën cahuë:

—Ëjaguë, më'ëre concuani bëinguë cani, bacua cayete ñensejë'ën cahuë.

40 Cajënnä, sehuobi:

—Bañë. Ba hua'nabi caye beoye ba'itoca, ñen gatabëan ja'anse'ebi huëni güina'ru te'e güire'abi, sehuobi.

41 Cani, Jerusalén huë'e jobona ti'an bi'rani, si'a jobore ro'tani oji'i. **42** Oiguë, ja'an huë'e jobo bainre ro'taguë cabi:

—Yure umuguse yë'ë yua mësacuani ta'yejeiye bojo güesegüë raisi'quëreta'an, mësacua achaye güehuë. Riusubi yë'ëre raoguëna, mësacua ñiacobi éñani masiye gare porema'icua baë'ë. **43** Ja'nca porema'icuare sëani, ai yo'ojën ba'ija'cua'ë mësacua. Mësacuare je'o bacuabi ti'an rani si'a huë'e jobo të'ijeiyen nëcajën, etaye yëcuare énsejën, mësacuare si'a ca'ncoñabi ai ta'yejeiye huajën ba'ija'cua'ë. **44** Ja'nca ba'icuabi mësacuani gare carajei güesejën, mësacua huë'e jobo tu'ahuëte gare ñañoni taonni, si'ayerebare gare ñu'ñujei güesejën, mësacuani ai ta'yejeiye huaja'cua'ë. Mësacua yua Riusu éñaguë raisi umugusere gare ro'tamajën huesëcuare sëani, je'o bacuabi ja'nca carajei güeseja'cua'ë, cani tonbi Jesús.

Jesús purifica el templo

45 Cani tonni, ja'nrëbi Riusu uja huë'ena cacani, bonse bendiecuare gare etoni saobi. **46** Saoguë, bacuani cabi:

—Mësacua yua Riusu coca toyani jo'case'e én cocare ro'tajë'ën: “Yë'ë huë'e yua bain uja huë'e'ë” toyani jo'case'eta'an, mësacuabi ti'anni, ro gu'a huë'e, jian hua'na gati huë'ere ro re'huani jo'cahuë mësacua, caguë, bacuare etoni saobi.

47 Ja'nrëbi, Jesús yua si'a umuguseña Riusu uja huë'ena cacani, bainni ye'yoguë baj'i. Ye'yoguë ba'iguëna, pairi ejacua, ira coca ye'yocua, bain ejacua, bacuabi Jesusni ai je'o bajën, sa'ñeña senni achajën, “¿Queaca baguëni huani senjoñe'ne mai?”

cajën ba'icuata'an, ⁴⁸ bain hua'nabi baguë cocare ai re'oye achajën ba'ijënnna, baguëni huani senjoñe poremaë'ë.

20

La autoridad de Jesús

¹ Ja'nrëbi, yequë umuguse ba'iguëna, Jesús yua Riusu huë'ere ba'iguë, bainbi achajënnna, bacuani ye'yoguë, Riusu bainreba mame recoyo re'huani baja'yete quëani achoguëna, pairi ejacua, ira coca ye'yocua, ira bain ejacua, bacuabi ti'anni, ² baguëni senni achahuë:

—¿Më'ë queaca ro'taguë, ënjo'ona rani, ejaguë yo'oye'ru yo'oguë'ne? ¿Jaro ejaguëbi më'ere ta'yejeiye caye guansení raoguë'ne? senni achahuë.

³ Senni achajënnna, sehuobi:

—Ru'ru, mësacuani senni achaza. Quëajë'ën yë'ëre. ⁴ ¿Jaro ejaguëbi Juanre bain bautizaguëre re'huani raoguë'ne? ¿Riusu re'huani raosi'quë, o bain re'huani raosi'quë baquë baguë? senni achabi.

⁵ Senni achaguëna, bacua jubë se'ga sa'ñeña senni achajën, coca cajën baë'ë:

—¿Queaca sehuoye'ne mai? “Riusu raosi'quë baj'i” catoca, baguë yua “¿Mësacua queaca ro'tajën, Juan cani jo'case'ere recoyo ro'tamate'ne?” cama'iguë. ⁶ “Bain raosi'quë baj'i” catoca, si'a bain jubëbi huëni, maini gatabi senjojën huaiyë, bacua yua Riusu raosi'quë ba'iyé ro'tacua sëani, sa'ñeña cahuë.

⁷ Ja'nca cani, ja'nrëbi Jesusna bonëni sehuohuë:

—Juan re'huani raosi'quëre huesëyë yëquëna, se-huohuë.

⁸ Sehuojënnna, Jesús cabi:

—Mësacua ja'nca sehuocuare sëani, yë'ëre re'huani raosi'quëre mësacuani gare quëama'iñë yë'ë cabi.

La parábola de los labradores malvados

⁹ Cani ja'nrebi se'e yeque ye'yo cocare ja'an bainni quëabi:

—Zio ejaguë baquëña. Bisi ëye ziore tanni, ja'nrebi yequëcua zio cuiracuana jo'cani, yequë so'o yijana sani zoe baquëña. ¹⁰ Sani ba'iguëbi, bisi ëye tëarën ti'anguëna, baguëre yo'o conguëte choini, zio cuiracuana saoguëña, ëye tëase'ere coni raja'guëte. Saoguëna, ti'anguëna, zio cuiracuabi ba yo'o conguë raosi'quëre zeanni ro ja'si yo'oni ëye beo hua'guëre go'yareña. ¹¹ Go'yarena, baguë ejaguëna ti'anguëna, zio ejaguëbi se'e yequë yo'o con hua'guëre saoguëña. Saoguëna, baguëre'ga güina'ru, gu'aye yo'oni, ro ja'si yo'oni, ëye beo hua'guëre'ga go'yareña. ¹² Go'yarena, se'e yequë yo'o con hua'guëre saoguëna, bacua'ga güina'ru ja'si yo'oni, baguëte ro senjoni go'yareña.

¹³ Ja'nca yo'orena, ejaguëbi ro'tani, ja'ansi'quë caguëña: “¿Queaca yo'oye'ne yë'ë? Yë'ë zin hua'guë ai yësi'quëre bacuana saotoca, yequërë baguëni te'e ruiñe ëñani re'oye yo'oma'iñë bacua” ro'taguëña baguë. ¹⁴ Ja'nca ro'tani, baguë zin hua'guëre saoguëña. Saoguëna, zio cuiracuabi baguëni ëñani, sa'ñeña careña: “Ëñajë'ën. Zio ejaguë bayete coni baja'guë'bi rai'te. Ja'nca sëani, baguëni huani senjoñu. Junni huesësi'quë ba'iguëna, mai

hua'nabi zio ejacua ruinja'cua'ë" cahuë. ¹⁵ Ja'nca cani, baguëni zeanni bani, zio ca'ncona sani, huani senjoreña, cabi.

Ja'nca cani, bain achacuani senni achabi Jesús:

—¿Mësacua queaca ro'taye'ne? ¿Zio ejaguë queaca yo'oja'guëguë'ne? ¹⁶ Ba hua'guë yua te'e jéana sani, zio cuiracuani huani senjoni, ja'nrebi yequëcuare baguë zio cuiracuare re'huani jo'caja'guë'bi, quëabi Jesús.

Quëaguëna, bain hua'nabi achani cahuë:

—Ai Riusume. Ja'nca yo'oma'ija'guë cahuë.

¹⁷ Cajënnä, Jesús yua bacuani ëñani cabi:

—Mësacua ja'nca cajën, Riusu coca toyani jo'case'e ën ca'nco toyani jo'case'ere ëñani ye'yejë'ën:

Judío bain ejacua Riusu bainre ye'yojëñ ba'icuabi
Riusu cuencueni raoja'guëre gu'a güejëñ
senjoja'cuata'an, Riusubi baguë bain quë'rë
ta'yejeiye ejaguëre re'huaja'guë'bi, toyani
jo'case'e ba'iji.

¹⁸ Ja'nca sëani, Riusu Raosi'quëreba ba'iguëbi ti'an raiguëna, yë'ère gu'a güeye beoye eñajë'ën. Yë'ère gu'a güeni senjotoca, carajeiye se'ga ba'iji mësacuare. Ja'nrebi, yë'ëbi se'e ti'an raiguë, yë'ë güeni senjosilcuare gare bënni senjo güeseja'guë'ë yë'ë, quëabi.

El asunto de los impuestos

¹⁹ Quëaguëna, pairi ejacua, ira coca masiye ye'yocua, bacuabi achani, sa'ñeña cahuë:

—Maire gu'aye caguëre te'e jéana zeanni bañu cajën ba'icuata'an, bain jubëni huaji yëjëñ, Jesusre zeanmaë'ë. ²⁰ Ja'nca yo'omajëñ, Baguëre zeañë

ti'anguëna, ñajën ejojën ba'ina'a cajën, bacua gu'a gajecuare choini, bacuani cahuë:

—Mësacua yua baguëni te'e ruiñe coca senni achaye'ru cajën, baguëni huacha sehuo güesejë'ën bacuani cani saohuë. Huacha sehuotoca, baguëni zeanni, bain ta'yejeiye ejaguëna insiye ro'tahuë.
21 Ja'nca ro'tajën, bacua gu'a gajecuare saojënnna, Jesusna ti'anni ñaca senni achahuë:

—Ejaguë, më'ëbi te'e ruiñe masiye ye'yoguëna, achani bojoyë yëquëna. Më'ë yua bain hua'na ro ëmëje'en yo'oni ñoñete ro'tama'iguë, yua Riusu te'e ruiñe yo'oye yëyete ye'yoguë ba'iyë më'ë. **22** Ja'nca ba'iguë, yua yëquënabi coca senni achajënnna, te'e ruiñe sehuojë'ën. ¿Romano bain ta'yejeiye ejaguëni impuesto curi ro'iye baye yëquëna? ¿Baguëni ro'iye, o ro'ima'iñe yëquëna? senni achahuë.

23 Senni achajënnna, Jesús yua bacua coquejën senni achase'ere masini, bacuani sehuobi:

—Mësacua ¿queaca ro'tajën, ro coquejën yë'ëre senni achaye'ne? **24** Curi so'corëte inni, yë'ëni ñojë'ën cabi.

Caguëna, so'corëte inni rani ñohuë. Ñojënnna, Jesusbi senni achabi:

—En so'co bainguë, baguë mami toyase'e ¿gue bainguëbi së'iguë'ne? senni achabi.

Senni achaguëna:

—Bain ta'yejeiye ejaguë'bi së'iji, sehuohuë.

25 Sehuojënnna, Jesús cabi:

—Ja'nca ba'iguëna, bain ejaguë re'huani jo'case'ere bain ejaguëna insijë'ën. Ejaguë Riusu

re'huani jo'cose'ere Riusuna insijë'en, caguë sehuobi.

²⁶ Ja'nca sehuoguëna, bain hua'nabi achajënnna, baguëni huacha sehuo güeseye poremaë'ë. Ja'nca porema'icuabi baguë coca sehuose'ere ai ta'yejeiye ro'tajën, gare caye beoye baë'ë.

La pregunta sobre la resurrección

²⁷ Ja'nrëbi, yequëcua, saduceo bainbi Jesusni éñajëñ saë'ë. Bacua yua ju'insi'cua se'e go'ya raima'iñë cajën ba'icua'ë. Baguëna sani ti'anni, baguëni senni achahuë:

²⁸ —Ëjaguë, Moisés coca toyani jo'case'ere ro'tajë'en. Ñaca caji: Bainguëbi zin beo hua'guë junni huesëtoca, baguë yo'jeguëbi baguë jo'casi rënjoní huejani bani, baguë ma'yë ju'insi'quère zin cu'ecaija'guë, toyani jo'case'e ba'iji. ²⁹ Ja'nca ba'iguëna, yequëbi baguë yo'je hua'na naconi te'e éntë sara samu hua'na bateña. Ma'yëbi huejani yuta zin beoguë junni huesëguëñña. ³⁰ Junni huesëguëna, samu ba'iguëbi baguë jo'casi rënjoní huejani, baguë'ga zin beoguë junni huesëguëñña. ³¹ Junni huesëguëna, yequëcua'ga, te'ena, te'ena, güina'ru bagoni huejani, si'acuabi zin beojën junni huesëreña. ³² Junni huesëjënnna, ja'nrëbi yo'je, ba hua'go'ga junni huesëgoña. ³³ Ja'nca ba'ini tonjënnna, yua go'ya rai umuguse ti'anguëna, ¿jaroguë rënjo ba'ija'gogo'ne? ¿Si'acua, te'e éntë sara samucuabi bagoni basi'cua sëani, queaca sehuoguë'ne më'ë? senni achahuë.

³⁴ Senni achajënnna, Jesusbi sehuobi:

—Ën yija bain, èmëcua, romicua, bacuabi huejani bajën ba'icuata'an, ju'insi'cua go'ya

raijsa'cua, yë'ë bainreba ba'ija'cua, ³⁵ ja'ancuabi Riusu guënamë re'otona ti'anni, gare huejaye beoye ba'ija'cua'ë. ³⁶ Riusu guënamë re'oto yo'o con hua'na ba'ije'ru ba'ija'cua sëani, gare huejama'icua ba'ija'cua'ë. Ju'insi'cua go'ya raisi'cua sëani, Riusu mamacuareba ba'ija'cua'ë. ³⁷ Ja'an Moises'ga yequë ca'ncore maina toyani jo'cabi. Zëinsi sahua quë'rona toyani jo'caguëna, Mai Ëjaguëreba Riusu, gaña Riusu ba'iguëna, Abraham, Isaac, Jacob, bacuabi baguëni te'e zi'inni ujajën ba'icua baë'ë, toyani jo'cabi. ³⁸ Ja'nca toyani jo'caguëna, mai Ëjaguë Riusubi baguë bain huajëcua se'gare conji. Gare junni huesësi'cuare ro'tama'iji. Riusubi ro'taguëna, baguë bainreba si'acuabi huajë hua'na se'ga ba'iyë, caguë sehuobi Jesús.

³⁹ Ja'nca caguë sehuoguëna, yequëcua, ira coca te'e ruiñe masicuabi cahuë:

—Ai re'oye sehuohuë më'ë, Ëjaguë, cahuë.

⁴⁰ Cani, Jesusni se'e senni achaye huaji yëjën baë'ë.

¿De quién desciente el Mesías?

⁴¹ Ja'nrebi, Jesús yua bain hua'nani senni achaguë, ro'ta güesebi:

—¿Mësacua queaca ro'tajën, Cristo raosi'quë yua ira ejaguë ba'isi'quë David mamaquë ba'iji cajën, huacha ro'taye'ne? ⁴² Mësacua yua Salmo quë'rona eñajë'ën. Ira ejaguë ba'isi'quë David'ga ñaca toyani jo'cabi:

Riusubi yë'ë Ëjaguë raija'guëni cabi:

“Yë'ë jëja ca'ncona bëani, quë'rë ta'yejeiye ejaguë ba'ijë'ën,

43 Më'ë je'o bacua carajei ñësebë tëca” cabi.

44 Ja'nca toyani jo'caguë Cristo raosi'quière baguë mamaquë ba'iyé caye gare poremaji'i David, baguëre Ëjaguë casi'quë sëani, cabi Jesús.

Jesús acusa a los maestros de la ley

45 Cani, si'a bain hua'nabi achajënnä, baguëre yo'o concuana bonëni, yihuoguë quëabi:

46 —Ira coca toyani jo'case'ere ai masicua, bacua yo'ojën ba'iyete ëñare bajën, bacua ye'yoni yo'oye'ru yo'omajëن ba'ijë'ën. Ro ëja bain ba'iyé se'ga ëñoñe yëyë bacua. Zoa can re'o canre sayani, huë'e jobo si'a ca'ncoña ganini, ba huë'e joborebana ti'añë. Ti'anni, ta'yejeiye ëja bain ba'iyé ëñojëن, bain re'oye ëñajëن saludayete ëjojëن, ja'nrëbi bain ñë'ca huë'ena cacani, ëja bain ñu'i sei-huëanre cu'eni bëayë. Aon choisi'cua ba'ito, quë'rë re'oruan se'gare cu'eni bëayë bacua. **47** Ja'nca yo'ocua sëani, hua'je hua'nani ro coquejëن, bacua huë'ere ro tëteni bacuaë. Riusuni ujato, ai zoe ujajëن, bain ëñajëن achaja'bë cajëن, Riusuni ro ujacuaë. Ja'nca yo'ojën ba'ijënnä, Riusubi ja'ancuani ëñani, bacuani quë'rë ta'yejeiye bënni senjoguë ba'ija'guë'bi, quëabi Jesús.

21

La ofrenda de la viuda pobre

1 Quëani ja'nrëbi, bonëni ëñato, curi ejacuabi bacua curire Riusu huë'e curi gajonguna ayajëن, Riusuna insijëن baë'ë. **2** Insijëن ba'ijënnä, hua'je hua'go bonse beoreba beogo ba'i hua'gobi ti'anni, samu curi so'corëanre ayago. **3** Ayagona, Jesús cabi:

—Mësacuani ganreba caguë quëayë yë'ë. Ja'an hua'go, hua'je hua'go bonse beo hua'gota'an, yequécua ayani insise'e'ru quë'rë ta'yejeiye Riusuna insigo bago. ⁴ Ja'ancua yua bacua curi bani jëhuase'e se'gare rani ayani insijënnna, bago chao hua'gobi bago aon co curire rani, beoru ayani insigo, Riusure bojogo sëani, cabi.

Jesús anuncia que el templo será destruido

⁵ Caguëna, yequécuabi Riusu huë'e ba'iyete cajën, Aire'o gatabi yo'ose'e sëani, ai re'o huë'e bëaji cajën, Riusuna ro insise'ere bojojën cahuë. Cajënnna, ja'nrébi Jesusbi bacuani cabi:

⁶ —Mësacua yua ën huë'e jai huë'ere ëñajën, re'oye cajënnna, yequë umuguseñabi si'aye gare taonni senjose'e ba'ija'guë'bi. Gare te'e gatabë tuiye beoye ba'ija'guë'bi, cabi Jesús.

Señales antes del fin

⁷ Caguëna, Bacuabi baguëni senni achahuë:

—Ejaguë, ¿quejeito ja'an ba'ija'guëguë'ne? ¿Ja'an ba'ija'ye queaca masija'cua'ne yëquëna? senni achahuë.

⁸ Senni achajënnna, Jesús yihuoguë cabi:

—Mësacua ëñare bajën, coquejën cacuare achamajën ba'ijë'ën. Ai bainbi yë'ë ba'iyete coquejën, “Yë'ë yua Riusu raosi'quë'ë” cajënnna, yequécuabi “Carajei umuguse ti'anbi. Yua'ë” cajënnna, bacua coquejën case'ere achama'ijë'ën. Bacua naconi te'e saima'ijë'ën. ⁹ Yequécua'ga guerra huayete cato, ejá bainre etoni senjoñe cato, mësacua yua ja'anre achajën, gare huaji yëye beoye ba'ijë'ën. Ja'an si'aye ru'ru ba'iguëna, carajei umuguseña jë'te ti'anja'guë'bi cabi.

10 Ja'nca cani, ja'nrëbi bacuani se'e yihuoguë quëabi:

—Te'e yijaña bainbi yequë yijaña bainni guerra huajën, ai yo'o güesejën ba'ija'cua'ë. **11** Yija ñu'cueye'ga ai raijeija'guë'bi. Bain hua'nabi ja'an ro'ina ai yo'ojën, aon gu'ana ju'injën, si'a rau neni ju'injën, ja'an ba'ija'cua'ë si'a ën yija bain. Ja'nrëbi, güënamë re'otona bain gare ëñama'ise'ere ëñajën, ai quëquëjën, ai huaji yëjën, ro rënni ganocua se'ga ba'ija'cua'ë.

12 Ja'nca ba'iguëna, ru'ru, mësacuani preso zeanni, mësacuani je'o bajën, bain ñë'caruanna sani, mësacuare si'nseye cajën, ya'o huë'ena guaojën ba'ija'cua'ë. Mësacuabi yë'ë bainrebare sëani, mësacuare zeanni, bain ta'yeyejiye ejacuana nëconi, mësacuani coca sehuo güesaja'cua'ë. **13** Ja'nca yo'ojëenna, mësacuabi yë'ë ba'iyete te'e ruiñe cani achoye poreja'cua'ë. **14** Ja'nca cani achoye porejën, mësacua jëa coca sehuoye, ru'ru gare ro'taye beoye ba'ijë'ën. **15** Yë'ë se'gabi mësacuani te'e ruiñe masi güeseguëna, mësacuabi ja'anre sehuojëenna, mësacua je'o bacuabi achani, ro sehuoye beoye ba'icuareba ba'ija'cua'ë. **16** Ja'nrëbi mësacua te'e bainbi mësacuani gu'aye yo'oya'cua'ë. Mësacua pë'caguë sanhuë, yo'je sanhuë, bain hua'na, gaje hua'na, bacuabi mësacuare preso zeanni, yequë bainna insini senjojëenna, mësacua jubëre ba'icuani, te'ecuani huani senjoja'cua'ë. **17** Mësacua yë'ë yo'ore yo'ocuare sëani, si'a bainbi mësacuani je'o bajën mësacuani ai gu'a güejën ba'ija'cua'ë. **18** Ja'nca ba'ija'yeta'an, mësacua yua gare ja'si neñe beoye ba'ija'cua'ë. Huajë hua'na se'gabi etajeijën, gare

te'e rañarëte huesoye beoye ba'ija'cua'ë mësacua.
19 Ja'nca sëani, mësacuabi gare jo'caye beoye si'a jëja
 recoyo ro'tajën ba'itoca, yë'ë naconi te'e bojojën
 gare carajeiye beoye ba'ija'cua'ë.

20 Ja'nrëbi jai soldado jubëan guerra huajën
 raisi'cuabi Jerusalén huë'e jobo të'ijeiyе nëcajënnna,
 mësacuabi ëñani, ja'an huë'e jobo taonni
 carajeija'yeta'an ba'iyete masija'cua'ë. **21** Ja'nca
 carajei güese bi'rajënnna, Judea yija ba'icuabi cu
 re'otona te'e jëana sani gatija'bë. Jerusalén huë'e
 jobo ba'icuaga te'e jëana etani saija'bë. Zio re'otore
 ba'icuabi Jerusalenna go'iye beoye ba'ija'bë.
22 Ja'an umuguseña ti'anguëna, Riusu bënni senjo
 umuguseña ba'ija'guë'bi. Baguë coca toyani
 jo'case'e'ru ba'ije, güina'ru ba'ija'guë'bi. **23** Ja'anrën
 ti'anguëna, romi hua'na zinbë ba'icua, yequëcua
 zin chuchacua, ja'ancuabi jëja beocua sëani, ai
 yo'ojën ba'ija'cua'ë. Riusubi bainre ai bënni senjo
 bi'raguëna, si'a èn yija bainbi ai ja'sireba ja'siye
 ba'ijëen, ai yo'oreba yo'oja'cua'ë. **24** Ai yo'ojën
 ba'ijënnna, je'o bacuabi ti'anni, te'ecuani guerra
 hua hua'tiñabi huani senjoja'cua'ë. Yequëcuani
 zeanni, tin yijañana sajënnna, tin yijaña gu'a bain'ga
 ti'anni, Jerusalén huë'e jobore taonni senjojën, si'a
 bonsera za'nguni si'ajën, ai gu'aye yo'ojën, Riusu
 etoni saoye ba'irën tëca yo'ojën ba'ija'cua'ë.

El regreso del Hijo del hombre

25 Ja'nrëbi, ënsëguë, ñañaguë, ma'choco hua'i,
 ja'anre ëñato, ai ba'ije ai huaji yaye yo'ose'e
 ba'ija'guë'bi. Si'a yijaña bainbi ta'yejeiyе ai huaji
 yëjën, jai ziaya ai achoreba achoye, ziaya të'a
 ai jai të'a huëiguëna, ba hua'nabi ai quëquëreba

quëquëjën ba'ija'cua'ë. ²⁶ Ja'nrebi ën yijare ai huaji yaye ba'ija'yete ro'tajën, bacuabi ai ta'yejeiye ai huaji yëjën, guënamë re'oto'ga ai ta'yejeiye ñu'cueguëna, ai huaji yëjën, quëquëreba quëquëjën ba'ija'cua'ë. ²⁷ Ja'nca ba'irënbì guënamë pico re'otona ëñato, yë'ë, Riusu Raosi'quëreba ba'iguëbi ai ta'yejeiyereba ñatani saoye'ru gaje meni raija'guë'ë yë'ë. ²⁸ Ja'nca sëani, ën yija bainbi ta'yejeiye ai yo'o bi'rajënn, yë'ë yure case'e si'aye ba'iguëna, ja'anrën ti'anguëna, mësacua yua bojoreba bojobjë, Mai ëjaguë yuara ti'an raija'guëta'an ba'iji cajën, mësacua etajeiyete ëñajën ëjojën ba'ijë'ën, quëabi Jesús.

²⁹ Ja'nca quëani, bacuani se'e ye'yo cocare yi-huoguë quëabi:

—Mësacua yureca higo sunquiñë, yequë sunqui'ga ëñani Riusu ba'i jobo ti'anja'ñete masijë'ën. ³⁰ Sunquiñëbi ja'o sari bi'ruguëna, mësacuabi ëñani ënsérën ba'iyete masiyë. ³¹ Güina'ru, yë'ë yure case'e, ai huaji yaye yo'oya'yé, ja'an ba'iguëna, Riusu ba'i jobo te'e jéana ti'anja'ñete masija'cua'ë.

³² Mësacuani ganreba yihuoguë quëayë yë'ë. Yureña bainbi yuta junni huesëma'ijënnna, yë'ë yure quëase'e si'aye yua ru'ru ba'ija'guë'bi. ³³ Guënamë re'oto, yija re'oto, ja'an si'aye gare carajeija'guëta'an, yë'ë coca cani jo'case'e gare carajeiye beoye ba'ija'guë'bi.

³⁴ Yë'ë ti'anjai umugusere gare huanë yema'iñë cajën, mësacua ëñare bajëen, gu'aye yo'omajën ba'ijë'ën. Riusuni gu'a güeni senjomaiñë cajën, ro a'ta yo'oye, jo'chana güebeye, ën yija ba'ije, ja'anre recoyo huacha ro'tamajën ba'ijë'ën. Ja'an

se'gare ro'tatoca, yë'ëbi te'e jëana ti'an raiguëna, bain hua'nabi gue ro'taye beoye ba'ijën, ro gati èaye ba'ijën quéquëja'cua'ë. ³⁵ Taongu quëoñe'ru ba'ija'guë'bi bacuare, si'a ën yija re'oto bainre. ³⁶ Ja'nca ba'ija'guë sëani, mësacua'ga ëñare bajën, gare jo'caye beoye ujajën ba'ijën, yë'ë in raiye tëca ëñajën éjojën ba'ijë'ën. Ja'an ba'ija'ye, Riusu bënni senjoja'ñe, ja'anre jëani, yë'ë, Riusu Raosi'quëreba ba'iguëni bojojën tëhuojaiñu cajën, gare jo'caye beoye ujajën ba'ijë'ën, quëabi.

³⁷ Ja'nca quëaguë, si'a umuguse bain hua'nabi ñë'ca raijëenna, bacuani ye'yoguë na'ijani, ja'nrëbi Olivo cubëna sani bëani ñatajaji'i. Ñatajani, yequë umuguse güina'ru Riusu huë'ena ti'an raiguëna, ³⁸ si'a bain hua'nabi baguëre achajaiñu cajën, zijeirën ti'an bi'rahuë.

22

Conspiración para arrestar a Jesús

¹ Yureca, judío bain pascua umuguse, bacua aonbëan huo'coma'ise'ere anni Riusuni bojoñu cajënnä, ja'an umuguse ti'añe choa ma'carë se'ga carabi. ² Ja'nca ba'iguëna, pairi ejacua, ira coca re'oye masicua, bacuabi Jesusni huani senjoja'ma cajën, bain hua'nani huaji yëjën, yuta yo'omaë'ë.

³ Ja'nrëbi, zupai huatibi Judas Iscariote hue'eguë, Jesús bainreba jubë, si'a sara samucua ba'i jubë ba'iguëna ti'an rani, baguë recoyona cacani bëani baji'i. ⁴ Ja'nca bëani ba'iguëbi Judasni ta'nhue güeseguëna, ba hua'guëbi pairi ejacua, Riusu huë'e ejacua, bacuana sani, bacua naconi Jesusre insijai cocare cani achobi. ⁵ Ja'nca cani

achoguëna, bacuabi ai bojojën, baguëni curi ro'ija'yete cahuë. ⁶ Cajënnna, Judasbi Re'oji sehuoni, ja'nrébi Jesusre yahue insini senjoñe ro'ta bi'rabi.

La Cena del Señor

⁷ Ja'nrébi judío bain ta'yejeiye ba'i umuguse ti'anguëna, Aon huo'coma'ise'ere anni Riusuni bojoñu cajën yo'o bi'rahuë. Ja'nca yo'o bi'rajën, ru'ru bacua oveja bonsëguëre huani Riusuna boni mëoñe, ja'anre yo'o bi'rahuë. ⁸ Ja'nca yo'o bi'rajënnna, Jesusbi Pedro, Juan, bacuare choini, guansegüe cabi:

—Mësacua sani, mai pascua aon ainja'ñete re'hua bi'rajë'ën cabi.

⁹ Caguëna, bacuabi senni achahuë:

—¿Jarona sani re'huaja'ye'ne yéquëna? senni achahuë.

¹⁰ Senni achajënnna, sehuobi Jesús:

—Mësacua yua jai huë'e jobona saijë'ën. Sani ti'anni, ja'nrébi ocobë tuiguë saiguëni tëhuoja'cua'ë. Tëhuoni, ja'an hua'guëna be'teni, baguë cacajai huë'ena cacajë'ën. ¹¹ Cacani, ja'an huë'e ejaguëni senni achajë'ën: “Mai ejaguëbi më'ëni senni achaguë raobi: ¿Yë'ëre concua naconi pascua aon ainru, jaro sonohuë'ne?” ja'anre ja'an huë'e ejaguëni senni achajë'ën. ¹² Senni achajënnna, ba hua'guëbi mësacuare ëmëje'en ba'iruna mëani, jai sonohuë re'oye re'huase'ere éñoja'guë'bi. Ja'nca éñoguëna, ja'anruna cacani, mai pascua aon ainja'ñete re'huajë'ën cabi Jesús.

¹³ Caguëna, ba hua'nabi sani, Jesús case'e'ru güinareba'ru ba'iguëna, bacua pascua aon ainja'ñete re'huahuë.

14 Re'huajëenna, ja'nrébi pascua aon ainrën ti'anguëna, Jesusbi baguëre yo'o concua naconi sani, ja'an ñu'i seihuëanna bëani, **15** ja'nrébi ba hua'guë yua si'a jubëni quëabi:

—Yë'ë junni tonja'ñe yuara ti'an bi'raguëna, mësacua naconi pascua aon aiñete ai ro'taguë ba'isi'quëbi mësacua naconi aon anni tëjiza caguë quëayë yë'ë. **16** Ja'nca quëaguëbi Riusu ba'i jobona ti'anni ja'anru aon aiñe tëca, pascua aonre gare se'e ainma'ija'guë'ë yë'ë ënjo'on, cabi.

17 Cani ja'nrébi, baguë uncu ro'rohuëre inni, Riusuni Surupa cani, baguëre concuani ëñani cabi:

—Mësacua yua ñen ro'rohuëre coni, sa'ñeña huo'hueni uncujë'ën. **18** Mësacua achareba achajë'ën. Riusu ba'i jobo ti'añe tëca, ñen jo'cha, bisi ëye su'rise'ere se'e uncuye beoye ba'ija'guë'ë yë'ë, cabi.

19 Cani ja'nrébi, jo'jo aonbëte inni, Riusuni Surupa cani, aonbëte jë'jeni, bacuana insini cabi:

—Yë'ë ga'nihuë'ë. Mësacua gu'a jucha senjoja'ñe ro'ire Riusuna insija'yë'ë. Ja'an aonre jo'caye beoye ainjën, yë'ëre ro'tajën ba'ijë'ën cabi.

20 Cani, aon anni tëjijëenna, uncu ro'rohuëte inni, bacuana güina'ru insini cabi:

—Mësacua yua ñen ro'rohuëte ëñani, Riusu mame cani jo'case'ere ro'tajën ba'ijë'ën. Yë'ë zie, mësacua gu'a jucha senjoja'ñe ro'ire jañuni tonguëna, Riusubi mame cocare cani, mësacuana jo'caja'guë'bi.

21 Ja'nca jo'caguëna, yë'ëre insini senjoja'guëbi yurera'rë mai naconi ñu'iji. **22** Yureca yë'ë, Riusu Raosi'quëreba ba'iguëbi Riusu

cuencuese'e'ru junni tonguë saiyë yë'ë. Saiguëta'an, yë'ëre insini senjoja'guëte ai bënni senjoguë ba'ija'guë'bi Riusu, cabi.

²³ Caguëna, ba hua'nabi sa'ñeña senni acha bi'rahuë: “Mai jubë ba'icua, jaroguëbi insini senjoja'guëguë'ne?” quëquëni, sa'ñeña senni achajën baë'ë.

Quién es el más importante

²⁴ Ja'nrebi yo'je ba hua'nabi sa'ñeña coca cajën, “Mai jubë ba'iguë ¿jaroguëbi quë'rë ta'yejeiye ëjaguë ba'iguë'ne?” sa'ñeña senni achajënnna,

²⁵ Jesusbi bacuani cabi:

—En yija bain ta'yejeiye ëjacuabi bacua bainni ai jëja guansejënnna, bain hua'nabi bacuani ëñajëen, “Maini conreba concua'ë” bacuare cajën ba'iyë.

²⁶ Ja'nca ba'iyeta'an, mësacuabi bacua jëja guans-eye'ru guansemajën ba'ijë'ën. Mësacua jubë quë'rë ta'yejeiye ëjaguë ba'iguëbi quë'rë ta'yejeiye beo hua'guë'ru ba'ijë'ën. Quë'rë ta'yejeiye guanseguë ba'iguëbi bain hua'nani quë'rë ta'yejeiye conreba conguë ba'ijë'ën. ²⁷ Te'eguëbi aon ainguë ñu'iguëna, yequëbi baguë aonre aonguëna, ja'anre ro'tani, ¿jaroguëbi quë'rë ta'yejeiye ëjaguëguë'ne? Aon ainguë ñu'iguëbi quë'rë ta'yejeiye ëjaguë ba'iji, cayë yë'ë. Ja'nca caguëta'an, yë'ë yua mësacua naconi ba'iguë, mësacuani yo'o conguë ba'iyë yë'ë.

²⁸ Yureca, mësacua yua yë'ë naconi jo'caye beoye te'e ba'ijën, yë'ë naconi te'e oijën, ai yo'ojënnna,

²⁹ mësacuare ta'yejeiye ëjacuare re'huaja'guë'ë yë'ë. Yë'ë Taita Riusubi yë'ëre ëjaguëre re'huani jo'caguëna, mësacuare'ga güina'ru ëjacuare re'huani jo'caja'guë'ë yë'ë. ³⁰ Ja'nca re'huani jo'caguëna,

mësacuabi Riusu ba'i jobona ti'anni, yë'ë naconi te'e ñu'ijën, aon ainjën, gono uncujën ba'ija'cua'ë. Ja'nca ba'ijën, mësacua yua ëja bain ñu'i seihuëan güëna seihuëan si'a sara samuhuëanre ñu'ijën, Israel bain jubëan si'a sara samubëan bainni guansejën ba'ija'cua'ë, cabi Jesús.

Jesús anuncia que Pedro lo negará

³¹ Ja'nca cani, ja'nrëbi Pedroni quëabi:

—Simón, Simón, zupai huatibi Riusuni ai senji: Mësacua si'acuani tëani baza caguë, mësacuani ai yo'o güeseye yëji. Trigo aon jë'jebë suni toñe'ru mësacuare senjo güeseza caji. ³² Ja'nca caguëta'an, yë'ë yua më'ë ba'iyete ai senreba senni achaguë ba'iyë yë'ë. Më'ë gare caraye beoye si'a recoyo ro'taguë ba'ija'guë caguë, më'ë ba'iyete Riusuni senni achaguë ba'iyë yë'ë. Ja'nca senni achaguëna, më'ë yua gu'a jucha yo'ojayete senjoni, ja'nrëbi më'ë bain concuare oiguë conguë, bacuani jëja recoyo bacuare re'huajë'ën, cabi Jesús.

³³ Caguëna, Simón cabi:

—Éjaguë, je'o bacuabi më'ëni zeanni, ya'o huë'ena guaoni, më'ëni huani senjotoca, yë'ë'ga më'ë naconi te'e sani, më'ëre te'e conguë junni tonjaza caguë quëabi.

³⁴ Caguëna, Jesús sehuobi:

—Pedro, më'ëni ganreba quëayë yë'ë. Yure ñami, cura yu'ima'i ñësebë, më'ëbi yua yë'ëre huesëye samute ba'iyé caja'guë'ë më'ë, quëabi Jesús.

Se acerca la hora de prueba

³⁵ Quëani, ja'nrëbi si'a hua'nani senni achabi:

—Mësacuare cuencueni bainna saosirëñre ro'tajë'ën. Turubëan beo hua'na, curi ayahuë

beo hua'na, guëon ju'i coro beo hua'na, ja'nca ba'ijëñ saisi'cuabi ¿guere carajëñ bate'ne mësacua? senni achabi.

Senni achaguëna:

—Banhüë. Bonse caraye beoye gare baë'ë yëquëna, sehuohüë.

³⁶ Sehuojënnä, baguë cabi:

—Ja'nca ba'isi'cuata'an, yureca tin yo'ojeten ba'ijëñ. Mësacua yua turubë, curi ayahuë, ja'anre batoca, inni sajëñ. Guerra hua hua'ti beotoca, mësacua guayoni se canre bendieni, hua'tire coni sajëñ. ³⁷ Riusu coca toyani jo'case'ere èñani, yë'ë ba'ija'yete masijëñ. “Gu'a bain naconi huani senjosi'quë ba'ija'guë'bi” caguë, yë'ë ba'ija'yete cani jo'case'e sëani, güina'ru huani senjosi'quë ba'ija'guë'ë yë'ë, quëabi.

³⁸ Quëaguëna, bacuabi cahuë:

—Èñajëñ, Èjaguë. Samu hua'tiña ba'iji cahuë.

Cajënnä,

—Yua'ë, sehuobi Jesús.

Jesús ora en Getsemani

³⁹ Sehuoni ja'nrëbi, ja'an huë'ebi etani sani, baguë yo'oguë ba'ise'e'ru yo'oguë, Olivo cubëna mëni bëabi, baguëre yo'o concuabi conjënnä.

⁴⁰ Ja'nca ti'anni, bacuani yihuoguë quëabi:

—Mësacuabi gu'aye yo'o ëaye beoye ba'ijëñ caguë, Riusuni ujajëñ ba'ijëñ quëabi.

⁴¹ Quëani, ja'nrëbi bacuare jo'cani, so'orë ba'iyé sani, gugurini rëanni, Riusuni ujaguë cabi:

⁴² —Taita, më'ëbi yëtoca, yë'ëni ai yo'o güesema'ijëñ caguëta'an, ro yë'ë yëse'e se'gare yo'oma'ijëñ. Më'ë yëye se'gare yo'oje'ëñ cabi.

43 Caguëna, Riusu guënamë re'oto yo'o con hua'guëbi Jesusna gaje meni, baguëni jëja recoyo re'hua güesebi. **44** Re'hua güeseguëna, Jesús yua ai ta'yejeiye ai yo'oguë, quë're si'a jëja ujabi. Ja'nca ujaguëna, baguë të'ribë ja'su yajiye yua zie co'yohuëan jai co'yohuëan'ru ba'iyé yijana meni tonji'i.

45 Ja'nrëbi, ujani tëjini, baguë yua huëni, baguëre yo'o concua ba'iruna go'ini ëñato, yua cainsi hua'na uën'ë, ai sa'ntijëen oijëen ba'isi'cua sëani.

46 Ja'nca ba'ijëenna, bacuani cabi Jesús:

—¿Mësacua guere yo'o jëen, cainsi hua'na uiñe'ne? Huëni, gu'aye yo'o éaye beoye ba'ijë'ën caguë, Riusuni ujajëen ba'ijë'ën cabi.

Arrestan a Jesús

47 Ja'nca caguë, yuta cani tëjima'iguëna, ai jai jubë bainbi raë'ë. Raijëenna, Judas, Jesús bainguë cuen-cueni re'huasi'quë, baguë bain si'a sara samucua naconi te'e ba'isi'quëbi bacua rai ma'are ëñoguë raji'i. Rani, Jesusni muchaguë saludaza casi'quë ba'iguëbi Jesusna ti'anbi. **48** Ti'anguëna, Jesús cabi:

—Judas, yë'ëre, Riusu Raosi'quërebare ro co-queguë muchaguë, yë'ëre ro insini senjoza caguë ro'taguë raqué më'ë? senni achabi.

49 Senni achaguëna, Jesusre concua baru ba'icuabi baguëni zeanja'ñete ëñani, Jesusni cahuë:

—Ëjaguë, guerra hua hua'tiñabi zeanni, bacuani huani saoñu cahuë.

50 Cajëenna, te'eguëbi hua'tibi inni huani, pairi ta'yejeiye ejaguëre yo'o con hua'guëni, baguë jëja ganjorote te'ntoni tonbi. **51** Te'ntoni tonguëna, Jesús cabi:

—Se'e yo'oma'ijë'ën, cabi.

Cani, baguë ganjorote pa'roni, baguëni hua-chobi. ⁵² Huachoni ja'nrébi, pairi ejacua, Riusu huë'e ejacua, bain iracua, ja'ancua, baguëni preso zeanjën raisi'cuani cabi Jesús:

—¿Mësacua queaca ro'tajën, guerra hua hua'tiña, huai cabëan, ja'an naconi rani, jian hua'guëre'ru yë'ëni zeanjën rate'ne? ⁵³ Si'a umuguseña mësacua naconi Riusu huë'ere ba'iguëna, yë'ëre gare zeanmaë'ë mësacua. Ja'nca yo'oma'isi'cuata'an, yure'ga mësacua yua zijkei re'otore ba'ijënen zemosi'cua sëani, mësacua gu'aye yo'o yo'oye porecua'ë cabi.

Pedro niega conocer a Jesús

⁵⁴ Caguëna, ja'nrébi Jesusre zeanni, pairi ta'yejeiye ejaguë huë'ena sahuë. Sajëenna, Pedro yua bacuani so'orëbi be'tebi. ⁵⁵ Be'teni ti'anni, ja'an huë'e quë'ro ba'iruna toa suase'e ba'iguëna, ja'anru bain hua'nabi toa të'ijeiyen ñu'ijënnna, Pedrobi bacua naconi te'e bëani toare cunji'i. ⁵⁶ Cu'inguëna, ja'anru romi zingo yo'o con hua'gobi baguëni ëñareba ëñani, bago gaje bainni cago:

—Ja'anguë'ga Jesús naconi te'e ba'isi'quë'bi cago.

⁵⁷ Cagona, Pedro sehuobi:

—Bañë. Baguëre huesëguë'ë yë'ë, sehuobi.

⁵⁸ Sehuoguëna, ja'nrébi jë'te, yequëbi baguëni ëñani cabi:

—Më'ë'ga bacua jubë te'e ba'iguë'ë cabi.

Caguëna, Pedro sehuobi:

—Bañë. Bacua jubë ba'ima'iguë'ë yë'ë, cabi.

⁵⁹ Caguëna, ja'nrébi, te'e hora ba'ije ba'iguëna, yequëbi ti'anni, ai jëja caguë quëabi:

—Aito. Ën hua'guëbi Jesùs naconi te'e ba'isi'quë'bi, Galilea bainguë sëani, cabi.

⁶⁰ Caguëna, Pedro cabi:

—Më'ë coca caye, yë'ë gare huesëguë'ë, cabi.

Caguëna, ja'ansirën, Pedrobi coca cani tëjima'iguëna, cura hua'guëbi yuji'i. ⁶¹ Yu'iguëna, mai ejagüëbi bonëni, Pedroni ëñaguëna, Pedrobi baguë coca case'ere ro'tabi. “Yure ñami, cura hua'guëbi yuta yu'ima'iguëna, më'ëbi yua yë'ëre huesëyete samute ba'ije caja'guë'ë” ja'an coca quëase'ere ro'tani, ⁶² ba hua'guëbi etani sani, ai sa'ntiguë oji'i.

Se burlan de Jesùs

⁶³ Ja'nrebi, Jesusre zeanni bajën, baguëni ëñajën bacuabi baguëni jayajën hua bi'rahuë. ⁶⁴ Huani, baguë ñacore can të'ntëbi ta'pini gueonni, ja'nrebi baguë ziana huaijën, baguëni senni achahuë:

—¿Nebi më'ëre huate'ne? Më'ë ñacobi ëñani masini quëajë'ën cahuë.

⁶⁵ Ja'nca cajën, baguëni ai hui'ya jayajën, baguëni ai gu'aye yo'ohuë.

Jesùs ante la Junta Suprema

⁶⁶ Ja'nca yo'ojënna, ja'nrebi ñataguëna, judío bain iracua, pairi ejacula, ira coca ai masicua, si'a jubëbi ñë'ca raijën, Jesusre zeanni, bacua ta'yejeiye ejá bain jobona nëconi, baguëni coca senni achahuë:

⁶⁷ —¿Më'ë yua Riusu Raosi'quë'guë? Quëajë'ën yëquënaní, cahuë.

Cajënna, baguë sehuobi:

—Yë'ëbi quëatoca, yë'ëre te'e ruiñe achama'iñë mësacua. ⁶⁸ Yë'ë yua mësacuare'ga coca senni

achatoca, yë'ëre sehuoma'iñë. Ja'nca sehuomajën, yë'ëre etoni saoma'iñë mësacua. ⁶⁹ Ja'nca yo'oma'ijënnä, yë'ë, Riusu Raosi'quëreba ba'iguëbi yua Ta'yejeiye Ëjaguë Riusuna go'ini, baguë jëja ca'ncona bëani ta'yejeiguë ba'ija'guë'ë yë'ë, quëabi Jesús.

⁷⁰ Caguë quëaguëna, ba hua'nabi baguëni senni achahuë:

—Ja'nca ba'ija'guë ba'itoca, ¿më'ë yua Riusu Zin ba'iguë? senni achahuë.

Senni achajënnä:

—Ja'nca ba'iguë'ë yë'ë. Mësacua caye'ru ba'iguë'ë yë'ë, sehuobi.

⁷¹ Sehuoguëna, bacuabi bëinjën cahuë:

—Achajë'ën. Baguë se'gabi Riusure gu'aye caguëna, achahuë mai. Ja'nca casi'quëre sëani, baguë gu'aye case'ere achasi'cuani se'e ejoma'ina'a, cahuë.

23

Jesús ante Pilato

¹ Ja'nca cani, ja'nreëbi Jesusre se'e zeanni, romano ëjaguë Pilatona sani nëcohuë. ² Nëconi, baguëre gu'aye cahuë:

—Ënquëni ëñajë'ën, ëjaguë. Yëquëna bainni ai hui'ya coqueguë ye'yoguë, yëquëna bainre gu'aye yo'ocuare re'hua bi'rabi. Bain ta'yejeiye ëjaguëni impuesto curire ro'ima'ijë'ën quëabi baguë. Riusu Raosi'quëreba ba'iguë'ë yë'ë caguë, Ta'yejeiye ëjaguë runza caguë, maire ai hui'ya ye'yoguë caguëna, yëquënabi baguëni zeanni, më'ëna rahuë, ëjaguë, cahuë bacua.

3 Ja'nca cajënnna, Pilatobi Jesusni senni achabi:
—¿Më'ë yua judío bain ta'yejeiye ejaguë'guë?
senni achabi.

Senni achaguëna, Jesús sehuobi:
—Ja'nca ba'iguë'ë yë'ë, sehuobi.

4 Ja'nca sehuoguëna, Pilato yua pairi ejacua, si'a
bain hua'na, bacuani cabi:

—Enquëbi gare gu'aye yo'oma'iguë ba'iji.
Si'nseye beoye ba'iji baguëre, cabi.

5 Ja'nca caguëna, bacua yua quë'rë jëja achoni
quëahuë:

—Banji. Bain hua'nani coqueguë ye'yoguë,
bainre gu'aye yo'ocuare re'hua bi'rabi. Galilea
yijare ru'ru ye'yoni, si'a Judea yijana ye'yoguë,
ja'nrebi enjo'ona ti'anni, ai hui'ya caji, cahuë.

Jesús ante Herodes

6 Cajënnna, Pilatobi ¿Galilea bainguë'guë? senni
achaguëna, **7** Ba'iji sehuohuë bacua. Sehuojënnna,
Herodes hue'eguë, Galilea yija ejaguë Jerusalenre
yure ba'iguëna, Pilatobi Jesusre baguëna saobi.

8 Saoguëna, Herodesbi baguëni ëñani, ai bojoguë
ro'tabi. Yequëcuabi Jesús ba'iyete ai quëajënnna,
ai ba'irën baguëni ëña eaguëna, bojoguë ëñabi.
Ja'nca ëñaguë, Ta'yejeiye yo'ore yo'oni ëñojë'ën.
Ëñaza cabi. **9** Ja'nca caguë baguëni ai zoe senni
achaguëret'an, gare sehuoye beoye nécabi Jesús.

10 Nëcaguëna, pairi ejacua, ira coca ai masicua,
bacuabi huëni, Jesusre ai gu'aye cajën, si'a jëja
quëahuë. **11** Quëajënnna, Herodes, baguë soldado
hua'na naconi, bacuabi Jesusni ai hui'ya jayajën,
baguëni ai gu'aye cahuë. Cani ja'nrebi, ai re'o
caña ëja bain cañare inni baguëni jayaye'ru

sa'yeni, baguëte Pilatona se'e go'yahuë. ¹² Ja'nca go'yajënnä, Pilato, Herodes, bacua yua sa'ñeña ai je'o basi'cua ba'ijën, ja'ansi umuguse sa'ñeña bojojën, te'e gaje hua'na ruën'ë.

Jesús es sentenciado a muerte

¹³ Ja'nrebi, Pilatona go'yasi'quëbi ti'anguëna, Pilatobi pairi ejacua, bain ejacua, si'a bain hua'nare ñë'coni, ¹⁴ bacuani cabi:

—Mësacua yua ënquëre yë'ëna rani, Bainre gu'aye ye'yoguë ba'iji cahuë. Cajënnä, yë'ëbi baguëni senni achaguë, baguë ba'iyete masiguë, mësacua gu'aye case'e'ru ba'iyete gare yo'oma'isi'quë'bi cayë yë'ë. ¹⁵ Herodes'ga baguëni senni achani baguë ba'iyete masiguë, baguëte go'ya raoguë sëani, gu'aye yo'oma'iguë'bi ba'iji cabi baguë. Ja'nca gu'aye yo'oma'isi'quëre sëani, baguëni huani senjo güeseye gare porema'ïñë mai. ¹⁶ Ja'nca porema'icua sëani, ga'ni za'zabobi baguëni si'nse güesen, baguëni etoja'guë'ë yë'ë, cabi.

¹⁷ Yureca pascua umuguseña ba'irën ba'iguëna, Pilato yo'oguë ba'ise'e'ru si'a tëcahuëan preso zeanni basi'quë te'eguëte etoni bainna go'yaguë ba'ise'e'ru yo'oguë baj'i Pilato. Ja'nca yo'oguë ba'isi'quëbi Jesusre etoye caguëna, ¹⁸ si'a jubë bainbi ai güireba güijën, te'e cahuë:

—Baguëni huani senjojë'en. Barrabás hue'eguëte etoni yëquënani jo'cajë'en güijën cahuë.

¹⁹ Güijën cacuabi Barrabasre senni achajënnä, ai gu'a bainguë baj'i. Bain hua'nare huëoguë, Ëja bainni huani senjoñu caguë yo'oguëna, baguëni zeanni, ya'o huë'ena guaoni bahuë. ²⁰ Guaoni

bajënnna, Pilatobi Jesusre etojaza caguë, baguë eto-jaiyete bain jubëni caguëna,²¹ ba hua'nabi quë'rë si'a jëja güireba güijën cahuë:

—Crusu sa'cahuëna quenni reojë'ën. Crusu sa'cahuëna quenni reojë'ën cajën, si'a jëja te'e güijën baë'ë.

²² Güijën ba'ijënnna, Pilatobi samute ba'iye bacuani se'e cabi:

—Gare gu'aye yo'oma'isi'quère sëani, mësacua ¿guere güiye'ne? Baguëni huani senjoñe porema'iñë mai. Ga'ni za'zabobi huai güesenì, baguëni etoja'guë'ë yë'ë, cabi.

²³ Caguëna, bacua yua quë'rë si'a jëja jo'caye beoye güijën, Crusu sa'cahuëna quenni reojë'ën cajënna, ²⁴ Pilatobi se'e caye jo'caguë, bacua sense'e, pairi ejacuabi sen güesejënnna, ja'anre achani yo'o bi'rabi. ²⁵ Ja'an gu'a bainguë preso zeansi'quère senni achajënnna, Pilatobi baguëte etoni saobi. Etoni saoni ja'nrëbi, Jesusre bacuana jo'cani, Mësacua yua ënquéni bajën, mësacua yëse'e'ru baguëre bain be'ruijën ba'ijë'ën cabi.

Jesús es crucificado

²⁶ Caguëna, ba hua'nabi Jesusre zeanni, Crusu sa'cahuëna quenni reojaiñu cajën, baguëre sahuë. Sani ëñato, Simón hue'eguë, Cirene bainguë, zio re'otona saisi'quëbi huë'e jobona raiguë baj'i. Raiguëna, baguëni tëhuoni zeanni, Jesús crusu sa'cahuëte baguë tanta cubëna tëoni, Jesús yo'je hue'eguë sajë'ën cajënna, ja'nca yo'obi.

²⁷ Ja'nca hue'eguëna, ai jai jubë bainbi Jesusni be'tejën saë'ë. Yequëcua romi hua'nabi baguëte ai

jëja ota oijën be'tejën saë'ë. ²⁸ Be'tejën saijsüna, Jesusbi bacuana bonëni cabi:

—Mësacua Jerusalén romicua, yë'ëre oimajën ba'ijë'ën. Mësacua ba'iyé, mësacua zin hua'na ba'iyé, ja'an se'gare ro'tani oijën ba'ijë'ën. ²⁹ Mësacua ai yo'ojën ba'ija'yete ro'tajë'ën. Ja'an umuguseña ti'anguëna, bain hua'nabi mësacua ai yo'ojën ba'ija'yete ëñajën, ñaca caja'cua'ë: "Romi hua'na zin beo hua'na, zin të'ya raima'isi hua'na, zin chuchama'i hua'na, ja'an hua'na ba'itoca, ai bojöjen ba'ija'bë" cajën ba'ija'cua'ë bain hua'na. ³⁰ Ja'anrën ti'anguëna, bain hua'nabi cu re'otona gati ëaye yo'ojën saijsüna, ai yo'ojën, cubëanna caja'cua'ë: "Cubëan ñañani, yëquënan te'e jëana ta'pini pë'npëja'guë" caja'cua'ë. ³¹ Yureñabi juinja sunqui ba'irënbí ai gu'aye yo'ojën ba'itoca, ju'insi sunqui ba'irënbí ti'anguëna, quë'rë ta'yejeiye gu'aye yo'ojën ba'ija'cua'ë bain hua'na. Gu'aye yo'oma'isi'quëni yure gu'aye yo'otoca, yequëcua gu'aye yo'osi'cuani quë'rë ta'yejeiye gu'aye yo'ojën ba'ija'cua'ë, cabi Jesús.

³² Caguëna, yequëcua samucua gu'aye yo'osi hua'nare zeanni, Jesús naconi huani senjojën sahuë. ³³ Sani, sinjo gu'anbë casi cubëna ti'anni, Jesusre crusu sa'cahuëna quenni reohuë. Gu'aye yo'osi hua'nare'ga bacua crusu sa'cahuënanre reojën, te'eguëte Jesús jëja ca'ncona reohuë. Yequëre Jesús ari ca'ncona reohuë. ³⁴ Jesusre quenni reojënnna. Jesusbi ujaguë cabi:

—Taita, bacua gu'a juchare huanë yeni ro'tama'ijë'ën, bacua gu'aye yo'ose'ere huesëcuare sëani, ujaguë cabi.

Caguëna, soldado hua'nabi, Baguë cañare tëani huo'hueni bañu cajën, gata toyasira'carëanre sa'ñeña senjajén eñahuë. ³⁵ Eñajënnä, bain hua'nabi baguëni eñajén nëcajënnä, judío bain éjacuabi baguëte ai jayajén cahuë:

—Yequëcuani jéa güesesí'quëta'an, ja'ansi'quë jéaye porema'iji. Riusu cuencueni Raosi'quëreba banica, ja'nca yo'oja'guë, sa'ñeña cahuë.

³⁶ Cajënnä, soldado hua'na'ga baguëni jayajén, sënje jo'chare baguëni uncuani, ³⁷ baguëni cahuë:

—Më'ëbi judío bain ta'yejeiye ejaguë banica, ja'ansi'quë jéajé'ën cahuë.

³⁸ Ja'nrëbi yequëcuabi cocare toyani, baguë sinjobë ëmëje'en ca'ncona sëohuë. Griego coca, romano coca, hebreo coca, ja'anbi toyahuë: “Enquëbi judío bain ta'yejeiye ejaguë ba'iji” toyani sëohuë.

³⁹ Yequë, gu'aye yo'osi'quë cueñe reosi'quëbi baguëni hui'ya cabi:

—Më'ë yua Riusu Raosi'quë, ja'an Cristo banica, ja'ansi'quë jéani, yequënare'ga tëani sajé'ën, güiguë rejí'i. ⁴⁰ Güiguë reguëna, yequë reosi'quëbi baguë gajeguëni bëinguë sehuobi:

—¿Më'ë guere yo'oguë, Riusu bënni senjoñete huaji yëma'iguë'ne? Mai samutecuabi te'e reoni senjosí'cua ba'icuata'an, ⁴¹ mai samucua se'gare mai gu'aye yo'ose'ere masini, maire reoni senjoñë. Ja'anguë'ga, gare gu'aye yo'oma'isi'quë ba'iji cabi.

⁴² Cani, yua Jesusni eñani, baguëni senni achabi:

—Jesús, më'ë ba'i jobona ti'anni, yë'ë ba'iyete re'oye ro'taguë ba'ijé'ën, cabi.

⁴³ Caguëna, Jesús sehuobi:

—Ganreba më'ëni quëayë yë'ë. Yure umugusebi yë'ë naconi Riusu bojo güese re'oto, Riusu jo'ya re'ohuë, ja'anruna ti'anja'guë'ë më'ë, cabi.

Muerte de Jesús

⁴⁴ Ja'nrébi, mëñereba ba'iguëna, si'a re'oto zijei re'oto'ru runji'i, samute hora ba'i ñësebë teca.

⁴⁵ Ruinguëna, énsëguë na'ini huesëguëna, Riusu huë'e tëhuosi can yua jobora ye'reni saise'e baji'i.

⁴⁶ Ja'nrébi, Jesusbi ai jëja güiguë cabi:

—Taita, yë'ë recoyore coni bajë'ën, cabi.

Ja'nca cani, ja'nrébi junni reabi Jesús.

⁴⁷ Junni reaguëna, romano bainguë soldado ejaguëbi si'aye éñani, Riusuni bojoguë cabi:

—Aito. Ja'anguëbi te'e ruiñereba yo'oguë ba'isi'quë'bi, cabi.

⁴⁸ Caguëna, bain hua'nabi Jesús junni tonse'ere éñajën raisi'cuabi ai oijën, bacua coribare je'njujën, Ai gu'aye yo'ohuë cajën, bacua huë'eñana sa'ntijën goë'ë. ⁴⁹ Go'ijëenna, si'acua, Jesusni masijën ba'icua, romi hua'na Galileabi be'tejën raisi'cua naconi, bacuabi so'orëbi éñajën nëcahuë.

Jesús sepultado

⁵⁰ Ja'nrébi, yequë, re'o bainguë, José hue'eguë, Arimatea huë'e jobo bainguë, baguëbi te'e ruiñe yo'oguë ba'iguëna, bainbi baguëni te'e ruiñe éñajën baë'ë. Judío bain ta'yejeiye ejacua jubë bainguë baji'i. ⁵¹ Ja'nca ba'iguëbi Riusu bainrebare mame re'huaja'yete éñaguë ejoguë baji'i. Judío éja bain gajecua ro'tajën ba'iyeru te'e ro'tama'iguë baji'i. ⁵² Ja'nca ba'iguëbi yua Pilatona ti'anni, Jesús ga'nihuëre senji'i. ⁵³ Ja'nca senni, Pilatobi insi güeseguëna, Jesús ga'nihuëre gachoni, pojei canbi

ga'nebi. Ga'nени ja'nrebi, mame tan goje, gata tē'ntēbana te'ntosi goje ba'iguëna, ja'anruna sani, re'oye uanni, jai gatabëre bonani, ja'an gojere ta'pibi. ⁵⁴ Ja'an umuguse sábado ja'anré umuguse ba'iguëna, yo'o yo'oma'i umuguse yuara ti'anguë bají'i.

⁵⁵ Ja'nca uanni ta'piguëna, romi hua'na, Galilea yijabi Jesús naconi raisi'cuabi yua Josena be'teni, éñahuë. ⁵⁶ Éñani ja'nrebi, huë'na go'ini, ma'ñia sëñete baguë ga'nihuëre so'onja'ñete re'huahuë. Ja'nca re'huani, yequë umuguse yo'o yo'oma'i umuguse ba'iguëna, ira coca toyani jo'case'e'ru ba'kiye bëani huajéhuë.

24

La resurrección de Jesús

¹ Ja'nrebi, semana ja'anré umuguse ñataguëna, zijeirën ba'kiye cato, romi hua'nabi huëni, ma'ñia sëñe re'huase'ere inni, Jesusre tansi gojena saë'ë. ² Sani ti'anni, gatabë goje ta'pisibëbi quëñose'e ba'iguëna, ³ bacua yua ja'an gojena cacani éñato, Éjaguë Jesús ga'nihuë beobi. ⁴ Beoguëna, bacua yua huaji yéjën, gue ro'taye beoye ba'ijënnna, samucua go'sijei cañare ju'icuabi te'e jéana bacua ca'ncona eta rani nëcahuë. ⁵ Nëcajënnna, bacuabi ai quëquëjën, yijana éñañe se'ga baë'ë. Ba'ijënnna, bacuabi cahuë:

—Jesucristobi go'ya raisi'quë ba'iguëna, ¿mësacua guere yo'ojën ju'insi'cua ba'iruna baguëte cu'eye'ne? ⁶ Énjo'onre beoji. Go'ya rani yua saisi'quë'bi. Baguë Galilea yija ba'isirën quëase'ere ro'tajë'ën: ⁷ “Yë'ë, Riusu Raosi'quëreba

ba'iguëte zeanni, gu'a bainna insijënnna, yë'ëre crusu sa'cahuëna quenni reoni, huani senjojënnna, samute ba'i umuguse go'ya raija'guë'ë yë'ë" quëabi baguë, cahuë.

⁸ Cajënnna, bacuabi Jesús coca case'ere ro'tahuë.

⁹ Ro'tani, baguëre tansi gojebi etani, Jesusre conjën ba'isi'cua, ja'an oncecua, bacua ba'iruna go'ini, yequëcua'ga ba'ijënnna, bacuani si'aye beoru quëani achohuë. ¹⁰ Ja'an quëacua romi hua'nabi bacua mami hue'ecua yua María Magdalena, Juana, María Santiago pë'cago baë'ë. Yequë romi hua'na'ga bacua naconi baë'ë. ¹¹ Ja'nca quëajënnna, Jesusre conjën ba'isi'cuabi ro achajën, bacua quëase'ere ro'taye güehuë. "Ro cayë bacua" ro'tahuë.

¹² Ja'nca ro'tacuata'an, Pedrobi huëni, Jesusre tansiruna huë'huëguë saji'i. Sani ti'anni, rëanni, cacani ëñato, baguë ga'nihuë ga'nesi caña se'gabi ca'ncorëte unji'i. Ja'nca ëñani, gue ro'taye beoye huëni, baguë ba'i huë'ena bonëni goji'i.

En el camino a Emaús

¹³ Ja'nrëbi, ja'ansi umuguse, Jesusre conjën ba'isi jubë ba'icua samucuabi Emaús huë'e jobo tëca ganijëن saë'ë. Jerusalenbi sani, once kilómetro ba'ije ganiñe baë'ë. ¹⁴ Ja'nca sani, sa'ñeña cajën, yure umuguseña ba'ise'e si'aye senni achajën cahuë. ¹⁵ Ja'nca cajënnna, Jesusbi ti'anni, bacua naconi achaguë, te'e gani bi'rabi. ¹⁶ Achaguë conguë ganiguëna, baguëte ëñacuata'an, baguëni masimaë'ë. ¹⁷ Masimajënnna, baguë yua bacuani senni achabi:

—¿Mësacua gue cocare sa'ñeña cajën ganiñe'ne?
¿Mësacua guere sa'ntiye'ne? senni achabi.

18 Senni achaguëna, te'eguë Cleofas hue'eguëbi sehuobi:

—Yure umuguseña ba'ise'ere achamaquë më'ë?
Si'a ñijo'on bainbi ja'anre masiyë, cabi.

19 Caguëna:

—¿Gue ba'ise'ere caguë'ne më'ë? senni achabi Jesús.

Senni achaguëna, sehuobi:

—Jesús Nazarenoni gu'aye yo'ojën ba'ise'ere cayë. Riusu coca quëaguë raosi'quë ba'iguëna, Riusubi baguëni ai bojoguë ñabi. Bain hua'na'ga baguëni ai bojojën ñajënnä, baguë yua ai ta'yejeiyereba yo'oni, bain gare ñama'ise'ere yo'oni ñoni, te'e ruiñereba quëani achoguëna, **20** yëquëna ëja bainbi pairi ejacua naconi baguëte preso zeanni, baguëni huani senjo güesehuë. Baguëni crusu sa'cahuëna quenñi reoni senjohuë.

21 Yëquëna hua'nabi ro'tajën, “Israel bain zemosi'cuare etojani ëja bainre re'huaja'guë” cajën, baguë ja'an yo'oya'yete ñajënen ñojën baë'ë. Ñojën ba'ijënnä, yure umuguse samute umuguseña junni tonse'e ba'iguëna, **22** yëquëna jubë ba'icua romi hua'nabi coca quëajënnä, gue ro'taye beoye achahuë yëquëna. Yure zijeirën bacua yua Jesusre tansiruna sani ñato, **23** Jesús ga'nihuë beoguëña. Ja'nca ñani, se'e rani, Riusu güënamë re'oto yo'o concuabi toyare ñojënnä, bacuabi ñani rani quëahuë: “Go'ya raj'i baguë. Riusu toyare ñani masihuë yëquëna” quëajënen raë'ë. **24** Quëajënen raijënnä, yequëcua yëquëna jubë ba'icuabi baguëre tansiruna sani ñato, romi hua'na quëase'e'ru güina'ru baquëña. Ba'iguëna,

Jesusni gare ñamateña, baguëni sehuojën quëahuë.

²⁵ Quëajënna, ja'nrëbi, Jesusbi baguë te'e conni ganicuani sehuobi:

—Jesucristo ba'iyete ye'yeye ai caraji mësacuare. Riusu ira bain raosi'cua toyani jo'case'ere ñajën, mësacua ¿guere yo'ojën, si'a recoyo ro'tama'iñe'ne? ²⁶ Riusu raosi'quëbi yua ai ja'siye ai yo'oye babi. Baguëna, ja'nrëbi jë'te, go'ya raija'guë baji'i. ¿Ja'an coca toyani jo'case'ere, guere ye'yemate'ne mësacua? cabi Jesús.

²⁷ Cani ja'nrëbi, Riusu coca toyani jo'case'ere bacuani ñoni, si'a ca'ncoñare ñoni, baguë ba'ija'ye toyani jo'case'ere te'e ruiñe bacuani masi güesebi. Ru'ru, Moisés coca toyani jo'case'ere ñoni, ja'nrëbi Riusu ira bain raosi'cua si'acua bacua toyani jo'case'ere ñoni, baguë ba'ija'yeté bacuani te'e ruiñe masi güesebi. ²⁸ Ja'an cocare masi güeseguëna, ja'nrëbi bacua sai jobona ti'anjënna, Jesusbi se'e saiye ñobi. ²⁹ Ja'nca ñoguëna, bacuabi ñensejën, baguëni choë'ë:

—Yéquëna naconi te'e bëani ba'ijë'ën. Ai na'iji cahuë.

Cajënna, bacua naconi cacani te'e bëabi. ³⁰ Bëani ba'iguëbi bacua naconi bëani aonre ain bi'raguë, bacua jo'jo aonbëanre inni, Riusuni bojoguë cani, aonbëanre jë'jeni, bacuana huo'hueni insibi. ³¹ Insiguëna, ja'ansirën baguëni ñani masihuë. Masini, ja'nrëbi baguëni se'e ña bi'rato, gare beobi. Querë huesëbi. ³² Huesëguëna, sa'ñeña coca cahuë:

—Éñajë'ën, maire Riusu yo'ose'e, maibi baguë naconi te'e ganijën, baguë yua Riusu cocare quëani

achoguëna, maibi achajënnna, bojo recoyora ai re'o huanobi maire. Ja'anre ro'tana'a, cahuë bacua.

³³ Cani, bacua yua ja'ansirën huëni, besa sani, Jerusalenna goë'ë. Go'ini ti'anni, Jesusre yo'o conjën ba'isi'cua, baguë bain si'a sara te'ecua nacconi ba'icua, ja'ancuare tëhuohuë. ³⁴ Tëhuojënnna, bacua ja'ansirën quëani achohuë:

—Mësacua achare bajë'ën. Mai Ëjaguëbi go'ya raji'i. Simonbi baguëni ëñabi, si'a jéja quëani achohuë.

³⁵ Quëani achojënnna, ja'nrébi bacua ma'a ganijën tëhuose'ere quëahuë. Ja'nrébi baguë yua jo'jo aonbëan jé'jeni huo'hueguëna, ja'nrébi bacua mäsise'ere quëahuë.

Jesús se aparece a los discípulos

³⁶ Ba hua'na yuta sa'ñeña cani tëjima'ijënnna, Jesusbi te'e jéana bacua joborana gaje meni ëñobi. Ëñoni, bacuani saludaguë cabi:

—Mësacua bojo recoyo huanoñe ba'ijé'ën cabi.

³⁷ Caguëna, bacuabi na'oñe tëca quëquëjën, Huatibí raiji cajën ro'tahuë.

³⁸ Ro'tajënnna, baguë cabi:

—¿Mësacua guere yo'ojën quëquëye'ne? Ro huacha ro'taye beoye ba'ijé'ën. ³⁹ Yë'ë éntë saraña, yë'ë guëoña, ja'anre ëñani, yë'ëreba ba'iyete masijé'ën. Yë'ëni pa'roni, yë'ë ba'iyete masijé'ën. Hua'i, gu'an, ja'an bayë yë'ë. Huati banica, ja'anre beore'ahuë, cabi Jesú.

⁴⁰ Cani ja'nrébi, baguë éntë saraña, baguë guëoña, ja'anre bacuani ëñobi. ⁴¹ Ëñoguëna, ru'ru bojojën, ja'nrébi huaji yëjën, yuta baguë ba'iyete

recoyo ro'taye poremaë'ë. Poremajënna, baguë yua coca senni achabi:

—¿Mësacua gue aon baye'ne? caguë, senni achabi.

⁴² Senni achaguëna, ziaya hua'i bosi ma'carë, o'a baya, ja'anre inni, rani, baguëna insini èñato, ⁴³ baguë yua coni, si'aye anji'i. ⁴⁴ Anni ja'nrebi bacuani cabi:

—Mësacua naconi ba'isirënbì mësacuani coca quëaguë ba'nhuë yë'ë. Quëaguë ba'iguëna, si'aye güinareba'ru yë'ere yo'ose'e baji'i. Riusu coca, Moisés toyani jo'case'e, Riusu ira bain raosi'cua toyani jo'case'e, ja'anre èñato, yë'ë ba'ija'yete cani jo'case'e ba'iji. Ja'nca cani jo'case'e ba'iguëna, si'aye güina'ru baji'i yë'ere. Salmo coca cani jo'case'ere'ga güina'ru baji'i yë'ere, Riusu cuen-cueni jo'case'e sëani, cabi Jesús.

⁴⁵ Ja'nca cani ja'nrebi, Riusu coca toyani ja'case'ere bacuani te'e ruiñe masi güeseza caguë yo'oguë, ⁴⁶ bacuani quëani achobi:

—Ñaca toyani jo'cabi Riusu: Baguë Raosi'quë, Cristo hue'eguëbi ai ja'siye ai yo'oguëna, ja'nrebi samute umuguseña ba'ini, junni tonsi'quëbi go'ya raija'guë'bi, cani jo'case'e ba'iji. ⁴⁷ Go'ya raiguëna, ja'nrebi, baguë bainreba ba'icuabi ru'ru Jerusalén bainna sani, ja'nrebi si'a yijaña bainna sani, Riusu cocareba, gu'a jucha jo'cani senjoñe, mame recoyo re'huaye, ja'anre si'a bainni quëani achoja'cua'ë mësacua, cani jo'case'e ba'iji. ⁴⁸ Mësacua yua yë'ë yo'oguë ba'ise'ere èñani masicua sëani, si'a bainni quëani achocuare mësacuare re'huahuë yë'ë. ⁴⁹ Yë'ë Taita cani jo'case'ere ro'tani, baguë Espíritu raoja'yete cato, yë'ë se'gabi Espíritute

mësacuana ti'an güesení jo'caja'guë'ë yë'ë. Ru'ru, guënamëbi raoni jo'cani, mësacuani ai ta'yejeiye yo'ore yo'o güesaja'guë'bi. Ja'anrën ti'añe tëca ñenjo'on ba'i huë'e jobore ba'ijëñ ëjojë'ëñ, quëabi Jesús.

Jesús sube al cielo

50 Quëani ja'nrëbi, baguë bain cuencuesi'cuare sani, huë'e jobo ca'ncona sabi, Betaniana ti'añe tëca. Ti'anni, baguë ñentë sarañare mëiñe huëani, bacuani re'o coca cani jo'cabi. **51** Ja'nca cani jo'caguë, guënamë re'otona huahua mëni saji'i.

52 Mëni saiguëna, ba hua'nabi baguëni ai bojobjëñ, baguëni gugurini rëanni, baguëni ai ta'yejeiye coca cani achohuë. Ja'anre yo'oni, ja'nrëbi ai bojo recoyo re'huasi'cuabi Jerusalenna goë'ë. **53** Go'ini ti'anni, ba hua'na yua Riusu huë'ena cacani ba'ijëñ, Riusuni bojoreba bojobjëñ, Riusuni gugurini rëanjëñ, baguëni surupa cajëñ, jo'caye beoye ja'nca yo'ojëñ baë'ë. Ja'nca raë'ë. Amén.

**Riusu cocabera: mai ëjaguë Jesucristo
ba'iyete toyani jo'case'e'ë
New Testament in Siona (CO:snn:Siona)**

copyright © 2009 Wycliffe Bible Translators, Inc.

Language: Siona

Translation by: Wycliffe Bible Translators, Inc.

Siona [snn], Colombia

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Siona

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files

dated 29 Jan 2022

ce8413d6-ff57-5b18-bda5-72d8f77005b2